

## WACH I XQUI 'AN I APOSTELAB

*I Jesucristo xu bij chi ca c'un ni u Tewal i Dios*

<sup>1</sup> Che i nabe wuj\* xin tz'ibaj chawe, at nim laj winak mam Teófilo†, xin bij ronojel wach tak i xu 'an i Jesus, xak wach tak i xu c'ut canok. Che i wujle xin tz'ibaj ni'pa u 'anom, are xu jek li u chac, <sup>2</sup> c'a are xel bi chicaj. Are maja ca 'e chicaj, xe u pixabaj can i rapostelab chi je u chom lok. Rumal u Tewal i Dios 'o ru', xu bij can chique wach b chiquikul quiqui 'an na. <sup>3</sup> Q'uialmul u c'utum rib chique chi ire lic c'aslic. Cuarénta 'ij u wach, puwi i 'ij chi xcamsax wi, queje ile xu 'ano, quiquilbej-re chi katzij ire c'aslic; xak xu lap chique wach usuc' i atbal tzij re i Dios piqui c'ux i winak.

<sup>4</sup> I Jesus, are c'o cu' i rapostelab, xu bij can chique chi me 'el tan chupam i tinimit Jerusalen. Queje iri xu bij chique: —Chiwoy'ej na, c'a ca c'un ni Jun chi u bim in Kajaw cu ya na chiwe, pacha xak in bim yin chiwe chi ca c'unic. <sup>5</sup> Che tak i 'ij-i, ca kaj na li u Tewal i Dios piwi yix. I etz ma Wan xu kajsaj ya piquiwi i winak, xui-ri i Dios, are i u

---

\* **1:1:** Ixtz'ibaw i wuj-i are i San Lúcas. I nabe wuj chi xu bij-le are "I'utz laj tzij chirij i Jesucristo u tz'ibam i San Lúcas," chi ca rik che i u xak wuj 219. † **1:1:** I usuc' i biaj-i "Teófilo" are iri: jun chi c'ax cu na i Dios. Rumal-i, n-keta'am taj we i mam Teófilo are jun ramig i ma Lúcas, o we ire xa xu tz'ibaj i wuj-i chique conojel i winak chi c'ax quiqui na i Dios.

Tewal ire chi cu kajsaj na li piwi. (Queje xu bij can i Jesus ile chique are maja ca 'e chicaj.)

*I apostelab x quil u 'enam i Jesucristo chicaj*

<sup>6</sup> I apostelab, are c'a qui molom quib ru' i Jesus, xqui tz'onoj che: —Kajwal, ¿wo'or nawi ca ya na chic chake yoj oj aj Israel, we caka 'at tan chic tzij puwi i ka jyub pacha i ujer? —xe cha che.

<sup>7</sup> I Jesus xu bij chique: —In Kajaw, 'is 'o pu'ab ire umpa co'on tak i 'anic u ch'obom. N-ti iwe yix che i retamaxic pachique 'ij pachique tiémpo co'on na ire ile. <sup>8</sup> Xui-ri, mas ca ya' na i cho'ab chiwe are ca c'un ni u Tewal i Dios piwi. Te'uri qui paxsaj ni rason wach i tom, xak wach iwilom chi in 'anom yin. Ca paxsax in tzijol pa Jerusalen, xak ronojel i jyub Judéa, xak pa jyub Samária, xak ronojel u wach i jyub ta'aj —xu bij can i Jesus chique.

<sup>9</sup> Are xbitaj ile chique, tz'akat que takenic, i Jesus xel bi chicaj. Are 'uri xsach pa sutz'; n-xquil ta chic u wach. <sup>10</sup> Are ca tijin u 'enam, ique que tijin chu takexic chicaj; xak te'et xe winakir queb achiab cu', sak qui 'u'.

<sup>11</sup> —Achiab aj Galiléa —xqui bij—, ¿wach i qui takej chicaj? I Jesus-i chi xc'am bi chixol yix ca c'un tan chic; pacha i xiwilo are xa 'e chicaj, queje tan chic u c'unic ile —xe cha.

*I apostelab xqui cha u q'uexel i ma Júdas*

<sup>12</sup> Te'uri i apostelab xe kaj li tzam jyub pa i je 'o wi, chi Olívos ca bix che, y xe tzalij chic pa Jerusalen. Ile, n-naj taj 'o wi, colo jun kilómetro<sup>†</sup> u najtil. <sup>13</sup> Are xe upon pa tinimit, xe oc pa qui

---

<sup>†</sup> **1:12:** Xui u najtil ile yatal chique i aj Israel (rumal i ujer 'atbal tzij) we que bin che i uxlambal 'ij.

posar, xe 'el bi c'a pa caleja pa 'o wi qui q'uijibal. Are i apostelable je are i ma Pédro, i ma Jacóbo, i ma Wan, i ma Andres, xak i ma Felípe, i ma Tomas, i ma Bartolome, i ma Matéo, xak i ma Jacóbo chi u c'ojol i ma Alféo, xak 'o i ma Simon (chi jun chique i partido cananista), xak i ma Júdas chi catz qui cha' quib ru' i ma Jacóbo. <sup>14</sup> Ique-le 'is qui yom quib chu molic quib, quiqui tz'onoj che i Dios. Pacha 'ax quiqui 'an wi, quiqui mol quib cu' i u cha' i Jesus, xak ru' ixok Mariy chi u chuch i Jesus, xak cu' juban chic ixokib.

<sup>15</sup> Xu rik jun 'ij, xe moltaj colo ciénto véinte creyent. I ma Pédro xtaq'ui 'an chiquixol y xu bij chique:

<sup>16</sup> —Ix wachalal, 'o u chac ca 'antaj na pacha i tz'ibtal can chupam u wuj i Dios ujer. Rumal u Tewal i Dios, i mam David xu tz'ibaj canok wach tak cu 'an i ma Júdas co'on panok, chi aj c'utul re i be chique i que chapaw bi i Jesus. <sup>17</sup> I ma Júdas kachi'il te'ek; 'o te u chac ku' yoj. <sup>18</sup> Are xu c'ayij i Jesus, xu lo' rulew che i mer chi xu ch'aco rumal u mac chi xu 'ano-le. Xui-ri, chila ire xulc'atij lok, xu kajbej u jolom, xrakch'ij u pam, y xel li rixcol. <sup>19</sup> Conojel i aj pa Jerusalen xqui ta rason ile, rumal 'uri xqui ya pu bi i jyub-le, Acéldama, chi que'el pa ka ch'awbal: jyub pa xturuw wi i quic'. <sup>20</sup> 'O u chac ca 'antaj na pacha i tz'ibtal ujer chupam i wuj, Sálmos u bi; queje iri cu bij:

Ca ro'taj can i rachoch, mi jun ca q'uiji chic chupam§.

(Queje ile tz'ibtal canok.) Xak queje iri cu bij:

I u patan, chu c'ama chic jun chic\*.  
(Queje ile tz'ibtal can ujer.)

**21** Rumal-i, 'o u chac caka tzucuj chic jun chic, xui-ri we kachi'ilam lok che tak i 'ij are 'o wi i Kajwal Jesus ku'. **22** Chi, je 'o jujun je 'o ku' are xkajsax ya puwi i Jesus rumal i ma Wan, c'a are xel bi Jesus chicaj. Caka cha jun chique, ca 'e ku' chu bixquil chi Jesus c'un-nak chic sak chuwach —xu bij i ma Pédro.

**23** Te'uri, xe qui cha queb; jun ma Matías u bi; jun chic, ma Jose Barsabas† chi xak ma Jústo ca bix che. **24** Te'uri xe oc chu tz'onoxic che i Dios; xqui bij:

—Kajwal, yet aweta'am i kانيا konojel. Cha c'utu chake pachique a chom yet chique i queb-i. **25** Cha c'utu chake pachique cawaj yet ca 'anaw i patan re apóstol chi ro'tam can i ma Júdas, are xoc ire pu q'uijibal pacha ca majaw che rumal u mac. (Queje xqui bij ile che i Dios.)

**26** Are 'uri xqui 'an sac piquiwi i queb, y xtzak chirij i ma Matías; te'uri ire xoc cu' ique che i qui patan i julajuj apostelab.

## 2

*I u c'unic i u Tewal i Dios chuwach ijyub ta'aj*

**1** Are xu rik i nima'ij Pentecostes\*, conojel i creyent qui molom quib chupam jun ja. **2** Xak

---

\* **1:20:** Sálmo 109:8    † **1:23:** I mer tzij xu bij are iri: Barsabas ca bix che. "Barsabas" que'elok "u c'ojol i ma Sabas". \* **2:1:** I aj Israel winak, 'o jun qui nima'ij, Pentecostes u bi. I qui nima'ij-le, are u 'ij re u q'uisic i qui molonic re i cebáda. Are xqui 'an wi, are i cincuénta 'ij ric'awic i nima 'ij Pásqua.

te'et xqui ta pacha jun nim laj tew co' upam, xpe chicaj. Lic xch'aw chupam i ja pa i je cul wi.

<sup>3</sup> Are 'uri xwinakir pacha tak u rep 'a' xjacher bi piquiwi chi qui jujunal. <sup>4</sup> Te'uri i u Tewal i Dios xrajawin piquiwi conojel, y xqui jek ch'awic pa qui ch'awbal juban chic winak ne te cach aj tinimit. Are u Tewal i Dios xa 'anaw chique chi xe tiqui chi ch'awic re i jalajuj tak ch'awbal.

<sup>5</sup> Che i tinimit Jerusalen-le, xak je 'o aj Israel winak je petnak naj nakaj re u wach i jyub ta'aj. Ique qui yom qui c'ux chu cojic u 'ij i Dios. <sup>6</sup> Are xqui ta i que ch'okowic, xqui mol la quib. Xsach qui nojbal che, man 'is xqui ta chi xe tiqui chi ch'awic piqui ch'awbal ique chi qui jujunal. <sup>7</sup> Xe oc 'il che; lic xqui bisoj. Xqui bij chiquiwach:

—¿Wach u 'onquil ile? I que ch'a'atic-i, 'is je aj Galiléa, ne te kach aj tinimit. <sup>8</sup> ¿Wach u 'onquil 'uri chi caka ta chi qui qui rik i ka ch'awbal chaka jujunal yoj? <sup>9</sup> 'Is jalajuj ka ch'awbal chaka jujunal; 'o jujun chake oj aj Pártia, xak 'o i je aj Média, 'o i je aj Elam, 'o i je aj Mesopotámia, aj Judéa, aj Capadócia, aj Pónito, aj Asia; <sup>10</sup> xak 'o i je aj Frigia, aj Panfília, aj Egípto, xak 'o i je aj Africa c'a naj chuwash pan i Ciréne. Xak 'o i je c'un-nak naj c'a pa Róma; jujun chique je aj Israel chi calaxic pacha yoj, i juban xak je aj Israel, man qui yom qui wach ku', wach u cojic u 'ij i Dios. <sup>11</sup> Xak je 'o jujun chi je aj Créta, xak 'o i je aj Arábia. Lic n-xa ta jun tinimit oj petnak wi, ¿wuchac 'uri wo'or 'is caka ta pa ka ch'awbal chaka jujunal, wach i nim laj 'anic cu 'an i Dios? —que cha.

<sup>12</sup> Conojel lic qui qui bisoj, xsach qui nojbal che.

—¿Wach usuc' ile? —xqui bij.

<sup>13</sup> Xak 'o jujun que yo'yanic:

—Ile xa je 'abarelab —que cha.

### *I u tzij i ma Pédro chique i winak*

<sup>14</sup> Te'uri i cablajuj apostelab xe taq'ui 'anok; i ma Pédro co xch'aw chiquixol:

—Yix chi ix aj Judéa winak, yix chi ix jekel waral Jerusalen, ¡chitape wach usuc' iri! ¡Chi ta na wach i quin bij chiwe! <sup>15</sup> Qui bij yix, i achiab-i je 'abarelab, pero ne te 'abarel. Wo'or c'a we' na, maya a las nuéve, ne te 'abarel 'uri. <sup>16</sup> Are i quix tijin yix chi rilíc wo'or, are i u bim can i mam Joel, chi ajbil u tzij i Dios ujer. Queje iri u bim canok:

<sup>17</sup> I Dios cu bij: Are ca c'un tak i q'uisbal 'ij, quin tak bi in Tewal piquiwi i winak conojel; te'uri i mi'al iwalc'wal quiqui bij na chique i winak wach in tzij yin chique.

I alabom chixol yix, quin c'ut na chique piqui wach, wach in ch'obom chi quin 'an na; xak i rijab chixol, quiquil na pa cachic' wach i quin 'an na.

<sup>18</sup> Che tak i 'ij-le, xak quin tak bi in Tewal piquiwi i je ajchaquib we yin, chi ixokib chi achiab, te'uri quiqui lap na, ni'pa i quin 'alijsaj chique.

<sup>19</sup> Ajsic, chuwach i caj, quin c'ut ni nimak tak 'il chiwe;

Iquem, chuwach i jyub ta'aj, quin 'alijsaj ni nimak tak séña chiwe.

Quiwil quic', quiwil 'a', quiwil sib pacha sutz' ca bukukic.

<sup>20</sup> I 'ij ca 'ekumaric; i ic' co'on cak pacha quic'.

Queje ile co'ono chu xe'el i 'ij re i Kajwal;

I 'ij are ca c'un ire, are jun nim laj 'ij chiquiwach i  
winak;

<sup>21</sup> Chupam i 'ij-le pachin cu tz'onoj che i Kajwal, ca  
totaj 'uri.

(Queje ile u tz'ibam can i mam Joel<sup>†</sup> ujer.)

<sup>22</sup> Achiab ix aj Israel, chi cojo retaliil wach quin  
bij na chiwe: i Jesus aj Nazaret, lic ru' i Dios petnak  
wi; i Dios lic u c'utum na ile chiwe. Ire, ru' u 'ab i  
Jesus, q'ui i milágro xu 'ano, c'utbal re u 'ij i Jesus  
chiwe. Iweta'am chic yix ile; lic chiwach yix xu 'an  
wi ni'pa tak ile. <sup>23</sup> Nim i xu 'ano, pero are xjach  
pi'ab, xa xi camsaj. Xjach chiwe pacha u ch'obom  
i Dios ujer; reta'am ire wach ca 'ani che. Yix xi  
chap i Jesus, xi jach piqu'ab itzel tak winak; y xa  
iwumal yix xqui rip chuwatch cruz y xqui camsaj.  
<sup>24</sup> Pero i Dios xu c'unsaj sak chuwatch; xresaj pu'ab  
i camic. I camic, n-ta módo ca canaj i Jesus pu'ab.  
<sup>25</sup> I mam David ujer u bim chi Dios cu c'unsaj sak  
chuwatch i Jesus. Xu tz'ibaj i tzij-i chi pacha are i  
Jesus ca ch'a'atic; xu bij:

Xwil yin, i Kajwal 'o wu', pacha 'ax 'o wi,  
'o pin wikabim man mi jun quin u tzaksaj.

<sup>26</sup> Rumal 'uri, in c'ux lic ca quicotic; ru' in chi' xin  
bij in quicotemal.

N-quin c'achir taj man we xin camic, yet quin a  
c'astaj.

<sup>27</sup> Yet n-ca canaj ti wanima pa 'o wi i canima i je  
camnak;  
n-ca ya ta che in ch'acul ca jaric, man lic in awe yet,  
lic in lo'laj Awac'al.

<sup>28</sup> A c'utum i be chwe re i c'aslemal sakil; lic nim in  
quicotemal man at 'o wu'.

---

† **2:21:** Joel 2:28-32

(Queje ile tz'ibtal can rumal i mam David<sup>†</sup> ujer.)

<sup>29</sup> Ix wachalal, quin sakij na iri chiwe: i tzij chi xu bij i ka mam, mam David, n-re ti ire wach i xu bij. I mam David xcamic, xmukic, n-xwalij taj; c'a 'alaj pa muktal wi. <sup>30</sup> Xui-ri, ire ajbil u tzij i Dios; xu na pu c'ux wach cu 'an i Dios co'on panok. Reta'am ire chi Dios u bim chi katzij cu 'an na chi jun chique u muk u xiquin i mam David coc pu q'uijibal ire; co'on panok, i Crísto, chi are i Chatal<sup>§</sup> rumal i Dios, coc pu patan chi 'Atol Tzij pacha ire. <sup>31</sup> I mam David pacha rilom chic wach cu 'an ni Dios, rumal-i xu bij wach u c'astajbal i Crísto co'on panok. Xu bij chi i ranima i Crísto n-ca canaj ta cu' i que i camnak, xak i u ch'acul n-ca jar taj. <sup>32</sup> Are i Jesus-le chi Dios xu c'unsaj sak chuwach, y konojel yoj kilom u wach. <sup>33</sup> Te'uri xc'am bi chicaj pu wikabim i Dios. Are 'o chic chila, xya' i u Tewal i Dios che rumal u Kajaw, pacha u bim o'onom lok. Wo'or, ni'pa i quiwil yix waral, ni'pa i qui ta chi, xa rumal i Jesus, chi u takom li u Tewal i Dios ku'. <sup>34</sup> N-are ti ka mam, mam David, xel bi chicaj; are i Jesus xel bi chicaj, man i mam David xu bij:

I Kajwal Dios xu bij che i Wajwal:

"Chat cul na pin wikabim,

<sup>35</sup> c'a cu rik ni 'ij que in ya na pawakan ni'pa i je aj  
ch'o'oj chawij\*."

(Queje ile xu bij i Dios che i Kajwal Jesus.)

<sup>36</sup> Rumal 'uri iwonojel yix chi ix aj Israel winak, chiwetamaj chi lic katzij iri: i Jesus-i chi xi camsaj

<sup>†</sup> **2:28:** Sálmo 16:8-11    <sup>§</sup> **2:30:** I usuc' i tzij "Crísto" ca bixic, are iri: I Chatal rumal i Dios. I Jesucristo are i Tolke chatal rumal i Dios.

\* **2:35:** Sálmo 110:1

yix chuwach cruz, i Dios u yom pa Kajwal, xak u yom pa Tolke. (Queje u tzij i ma Pédro ile chique.)

<sup>37</sup> Are xqui ta ile, lic ca 'utut pa canima. Xqui tz'onoj che i ma Pédro xak chique i juban apostelab:

—Kachalal, ¿wach caka 'an 'ut? —xe cha.

<sup>38</sup> I ma Pédro xu bij chique: —Chi jalwachij u wach i nojbal chuwach i Dios, xak chi ya iwib chu kajsaxic ya piwi, c'utbal-re chi i yom chic iwib che i Jesucristo. Te 'uri i Dios cu cuy na i mac, xak cu tak li u Tewal piwi, chi are u siper chiwe. <sup>39</sup> Ile, cu ya na chiwe pacha u bim ujer, y n-xui ta chiwe yix cu ya'o, xak chique i muk i xiquin yix, xak chique i naj je 'o wi. Conojel ni'pa i que u siq'uij i Kajwal Dios ru' ire, 'is 'o que che wach i u sujum —xu bij.

<sup>40</sup> Queje xu bij i ma Pédro ile chique; xak 'o juban chic u tzij chique, yabal-re i qui nojbal. Xu bij chique: —Chi jalwachij i c'aslemal; chix el chiquixol i winak-i chi je sachnak chupam i qui mac —co'ono.

<sup>41</sup> Xe'elok, ni'pa i xqui coj u tzij i ma Pédro xqui ya quib chu kajsaxic ya piquiwi. Che i 'ij-le, colo oxib mil winak xqui ya qui wach cu' i jutzobaj creyent.

<sup>42</sup> Conojel lic xqui ya quib chu 'anic pacha i qui c'utunic i apostelab. Xai 'an che quib lic je cach'il quib; junam qui 'an qui tz'onic che i Dios; junam xui 'an qui wa'im 'ij 'ij.

### *Lic nam qui wach i creyent*

<sup>43</sup> Q'ui i nilágro, q'ui i nimak tak 'anic xqui 'an i apstelab ru' u cho'ab i Dios; i winak lic xqubisoj rumal. <sup>44</sup> Conojel ni'pa xqui cuba quc'ux che i Jesus lic je jutzobaj qui 'anom che quib; xak

junam qui wach puwi ubitak-ue. <sup>45</sup> 'Olic qui qui c'ayij i culew xak i pitak-que, tobal-que pachin 'o rajwaxic chiqe. <sup>46</sup> Ij 'ij qui qui mol quib pa rachoch i Dios, xak xqui tij qui wa junam chi tak cachch. Que quicotic xqui tij qui wa, n-ta jun xo'on nim che rib. <sup>47</sup> Xqui coj u 'ij i Dios yconojoel i winak xqui bij chi i creyent je 'u; laj tak winak. 'Ij 'ij ca tijin qui q'uiaric iutzobaj creyent man i Kajwal ca tijin chi ui to'ic i winak, 'elsabal que chupam i quinac.

### 3

#### *rutzirsaxic jun clis*

<sup>1</sup> Xo'on anok, i ma Pédro i ma Wan xe 'e pa rahoche i Dios a las tres re u kajbal 'ij, are i 'r re qui tz'onbal i aj Israel che i Dios. <sup>2</sup> 'Ojun achi chila, clis i rakan chi ralaxic. Ire 'i 'ij 'o i que yaw chuwach jun ocbal bic pa achoch i Dios; i ocbal bic-le, "Chom" ca ix che. Chila yatal wi i achi, man cu tz'onj mer chique i winak are que oc bi pa rachch i Dios. <sup>3</sup> I ma Pédro, i ma Wan que tijirbi coquic pa rachoch i Dios; i achi clis, are ril qui wach, xu jek u tz'oxic mer chique. <sup>4</sup> Ique che queb xqui c'am u takexic i achi. I ma Pédro xu bij che:

—Choj a tzupe' —co'on che.

<sup>5</sup> I clis lic xe u tzu, xroy'ej wach ca ya' che. <sup>6</sup> Are 'uri i ma Pédro xu bij che:

—N-ta mer wu', xui-ri wach i 'o wu' quin ya chawe. Rumal u cho'ab i Jesucristo aj Nazaret, 'o pin'ab quin bij chawe: ¡chat walijok y chat binok! —xu bij che.

<sup>7</sup> Te'uri xu chap pan che u 'ab wikabim y xu walijsaj. Juntir xq'uiji u cho'ab u kul tak rakan i

clis. <sup>8</sup> Xsac'canic xel chicaj y xtaq'ui 'anok, y xu jek binic. Te'uri xoc bi cu' pa rachoch i Dios; ca binic, ca sac'lin chicaj, ca tijin chu cojic u 'ij i Dios. <sup>9</sup> Conojel i winak xquilo chi ca binic, y ca tijin chu c'amwaxic che i Dios. <sup>10</sup> Rumal-i to' quiqui bisoj; xe oc 'il che, wach i 'antal che i clis. Conojel queta'am u wach, chi are ire-le cu tz'onoj u mer pa ocbal bic che i rachoch i Dios, chi "Chom" ca bix che.

*I ma Pédro xu 'alijinsaj chique i winak wach u patan i Crísto*

<sup>11</sup> I achi chi xutziric, lic n-que ro'taj ta chic i ma Pédro i ma Wan. Conojel i winak 'is xe oc 'il, xak que c'un pa'anem cu', pa i je 'o wi. Xe moltaj che uwach ja, chi "Re i mam Salomon" ca bix che. <sup>12</sup> I ma Pédro, are xrilo chi que moltaj i winak, xu bij chique:

—Ix achiab aj Israel, ¿wuchac quix oc 'il? ¿Wuchac xa coj i takej yoj? Mi ch'ob yix chi mas 'o ka cho'ab yoj, rumal-i ca bin i clis-le. Mi ch'ob yix mas oj 'utz chiwach yix y xa rumal-i xutzir i achi. N-are taj. <sup>13</sup> Are i Dios xcunawic; are i Dios chi xak are qui Dios i katit ka mam, mam Abraham, i mam Isaac, i mam Jacob. Queje xo'on ire ile, cu nimarsabej re u 'ij i Jesus, chi u C'ojol. Are i Jesus-le chi xi jach yix pu'ab i 'atbal tzij. Te'uri, are xraj i ma Piláto cro'taj te bic, yix n-xiwaj taj. <sup>14</sup> N-xiwaj ti ro'taxic i achi chi 'o u 'ij rumal i Dios, i achi chi n-tu mac. Are i xiwaj yix, are co'tax bi achi chi camsanel. <sup>15</sup> Queje xi 'an yix ile; xe'el na chi xi camsaj i Jun chi ca yawi ka c'aslemal. Xui-ri, i Dios xu c'unsaj sak chuwach;

yoj mísmo kilom ile. <sup>16</sup> Are i Jesus-le xcunaw i achi-ri man lic cul ka c'ux che ire; rumal-i xu cowirsaj i rakan i jun-i. Ya xiwil yix wach u 'anom che i achi-ri, chi lic iweta'am u wach. Are i cubibal ka c'ux che i Jesus are xa 'anaw che i achi chi xutziric, lic n-ta chic c'ax che, chi xak quix tijin yix chi rilic.

<sup>17</sup> Ix wachalal, weta'am chi are xi camsaj i Jesus, n-iweta'am ti usuc' wach i xi 'ano, mi yix, xak mi iwaj'atzil. <sup>18</sup> Xui-ri, are xi 'an ile, xe'elok pacha u bim i Dios ujer. Conojel i ajbil u tzij i Dios qui tz'ibam canok chi i Tolke chatal rumal i Dios cu tij ni c'ax. <sup>19</sup> Chi jalwachij 'uri i c'aslemal; chi jacha iwib pu'ab i Dios man cresaj i mac chiwij. Te'uri i Kajwal Dios cu ya ni uxlanem pi c'ux, <sup>20</sup> man 'o ni i Jesucristo iwu'; are ire, are i Chatal rumal i Dios o'onom lok, chi quix resaj chi sak. <sup>21</sup> Wo'or, 'o u chac chi Jesus ca q'uiji na chicaj c'a cu rik ni 'ij chi Dios cu 'an tan chic c'ac' che ronojel i 'olic. Cu 'an ire ile pacha u bim chake cumal i je lo'laj ajbil u tzij ujer. <sup>22</sup> Por ejémplo, i mam Moises xu bij chique i katit ka mam: "I Kajwal Dios cu tak li jun ajbil u tzij chiwe, chi jun chique i je kach aj tinimit; cu tak na lok pacha xin u tak li yin. Chi cojo retalil che wach cu bij ire chiwe. <sup>23</sup> Conojel ni'pa i n-que cojon ta che i ajbil u tzij i Dios-le que 'elsax bi chiquixol i aj Israel winak y ca sachsax ni qui wach," u bim i mam Moises\*.

<sup>24</sup> Conojel i ujer ajbil u tzij i Dios 'is xak jun i xqui bij wach ca tijin u 'onquil wo'or. Ca jekan li ru' i mam Samuel, conojel 'is queje qui bim can ile. <sup>25</sup> 'O iwe che i 'utz chi xu bij i Dios ujer cumal

---

\* <sup>3:23:</sup> Deuterónómio 18:15, 18-19

i je ajbil u tzij; 'o iwe che i trat chi xu 'an i Dios cu' i katit ka mam. I Dios xu bij che i ka mam, mam Abraham: "Cumal ni a muk a xiquin yet, quin ya ni 'utz piquwi conojel i winak chuwach i jyub ta'aj," xu bij. <sup>26</sup> Rumal-i, i Dios are xu cha† i u'Cojol y xu tak li chuwach i jyub ta'aj, nabe xu tak li chiwe yix; xraj ire cu ya ni 'utz piwi yix xak quix u to man qui mayij i macunic —xu bij i ma Pédro chique.

## 4

### *Ima Pédro, i ma Wan xe yaj cumal i nuc'bal t'isbal*

<sup>1</sup> Ima Pédro, i ma Wan, c'a que tijin chi tzij are xe c'un li juban winak lic que oywaric. I winaki je are jujun sacerdóte, xak i caj'atzil i policía re i rachoch i Dios, xak jujun chique i aj Saducéo\*.

<sup>2</sup> Ique que oywaric man i ma Pédro i ma Wan que tijin chu c'utic chique i winak chi i camnak ca c'un chic sak chiquiwach. Quiqui bij chi 'etamam ni ile man i Jesus walijnak chic che i camic. <sup>3</sup> I policía xe qui chap i ma Pédro i ma Wan y xe qui tz'apij pa cárcel. Ya xkaj i 'ij, rumal-i c'a chucab 'ij que 'elsax-lok, (que ya' chuwach i 'atbal tzij). <sup>4</sup> Xui-ri, je q'ui chique i xqui ta i qui tzij i ma Pédro i ma Wan, xqui cuba qui c'ux che i Jesucristo. Rumal 'uri xe q'uiar i creyent, colo je jo'ob mil achiab chique. <sup>5</sup> Chucab 'ij i caj'atzil i aj Israel winak xqui

---

† **3:26:** I mer tzij xu bij waral are iri: Are xu walijsaj i Rajchac. I tzij-le, 'olic craj u bixquil: "xu c'unsaj sak chuwach," xui-ri, i usuc' waral-i que'elok: "xu cha" o "xu ya u patan nim." \* **4:1:** I aj Saducéo je are jutzobaj i aj Israel winak chi n-qui qui coj taj we que walij chic i camnak. Je q'ui aj Saducéo je sacerdóte piquwi i cach aj Israel.

mol quib pa tinimit Jerusalen junam cu' i nimak tak mam'ib, xak cu' i tijonel re i ujer 'atbal tzij. <sup>6</sup> Xak xupon i mam Anas chi 'atz laj sacerdóte, xak i ma Caifas, i ma Wan, i ma Alejándro, xak conojel i cachalal i caj'atzil i sacerdóte. <sup>7</sup> Xqui tak qui c'amic i ma Pédro, i ma Wan. Xe qui tac'ba chiquiwach, y xe oc chu tz'onoxic chique:

—¿Pachin xyaw ile pi'ab? ¿Pachin xix takaw chu 'onquil iri? —xe cha chique.

<sup>8</sup> Ima Pédro, lic rumal i u Tewali Dios 'o ru', queje iri xu bij chique:

—Ix nimak tak kaj'atzil, ix nimak tak mam'ib quin ya rutzil i wach. <sup>9</sup> Yix quix tijin chi tac'alem pa rakan wach u 'onquil jun utzil chomal 'antal che jun achi iwab. Qui tz'onoj chake wach i utziric xu 'ano. <sup>10</sup> Wo'or caka 'aljinsaj chiwe. Cakaj caquetamaj conojel i aj Israel winak chi xa rumal u 'ab i Jesucristo aj Nazaret xutzir i achi-ri chi 'o chiwach iwonojel; xa rumal i Jesucristo, yijinak chic u ch'acul. Are i mismo Jesucristo chi xi camsaj yix chuwach cruz, chi xak xc'astax u wach rumal i Dios, are ire 'anawnak iri. <sup>11</sup> Chupam u wuj i Dios cu bij:

I abaj chi xi xutuj yix ix aj 'anol ja,  
are i abaj-le chi xe'elok mas nim ni u chac.

(Queje ile tz'ibtal canok†. Are i Jesus are i abaj-le chi xutux canok, xui-ri i Dios u 'anom che chi nim u patan.) <sup>12</sup> Xui i Jesus coj 'elsaw chupam i ka mac; n-ta chic jun chic chuwach i jyub ta'aj. Xui ire-le yatal pu'ab rumal i Dios chi coj u to —xu bij i ma Pédro chique.

---

† **4:11:** Sálmo 118:22

<sup>13</sup> I nimak tak mam'ib lic xqui bisoj are xquilo chi ma Pédro i ma Wan lic co qui c'ux. Xquil u be chi ne te tijoitalic, n-ti qui patan, to' je winak. Te'uri xquil u be chi je rachi'il can i Jesus (rumal-i n-quiqui xij ti quib; 'is quilom ni'pa i xqui bij). <sup>14</sup> Nxui ta la ile, xak i achi chi utzirnak chic, tac'al chila chiquiwach, rumal-i n-quiqui rik taj wach u la'ic u wach quiQUI 'ano. <sup>15</sup> Xe qui tak bi i ma Pédro i ma Wan chi sak, te'uri xe oc chu bixquil chiquiwach wach quiQUI 'ano. <sup>16</sup> Xqui bij:

—¿Wach caka 'an chique i achiab-le? Conojel i winak waral pa Jerusalen queta'am wach i nim laj 'anic xqui 'ano; n-ta que'el wi we cakuwaj u wach. <sup>17</sup> ¿Wach caka 'ano chi n-ca pax ta rason chiquixol i winak? 'Utz we que ka xibij; caka bij chique chi miqui lapla chic i Jesus chique i winak. (Queje xqui bij ile chiquiwach.)

<sup>18</sup> Te'uri xe qui siq'uij chic i ma Pédro i ma Wan chiquiwach, y xqui bij chique chi quiQUI mayij i u c'utic u tzij i Jesus, xak miqui lapla chic wach u 'anom. <sup>19</sup> I ma Pédro i ma Wan xqui bij chique:

—Chi bij pe yix pachique i 'utz chuwach i Dios, ¿we caka 'an pacha cu bij i Dios, o caka 'an pacha i qui bij yix? <sup>20</sup> Yoj n-caka mayij tu bixquil wach i kilom, wach i ka tom, n-coj tiQUI ta che —xqui bij chique.

<sup>21</sup> Are 'uri i aj nuc'bal t'isbal xe qui coj bi 'il, xui-ri xe co'taj bic. N-xqui 'an ti 'atbal tzij chique, man xqui xij quib chique i winak. Conojel i winak que tijin chu cojic u 'ij i Dios rumal i milágro u 'anom, <sup>22</sup> man i achi, are xutzirsaxic, ya nim chic, mas che i cuarénta junab 'o che.

*I creyent xqui tz'onoj u cowil qui c'ux che i Dios; ire xu ya chique*

<sup>23</sup> I ma Pédro i ma Wan, are xe o'tax bic, xe 'e cu' i cachí'il y xqui bij chique ronojel wach i xqui bij i caj'atzil i sacerdóte, xak i nimak tak mam'ib. <sup>24</sup> I creyent, are xqui ta ique ile, 'is xe oc chu tz'oniche i Dios. Xqui bij:

—Kajwal Dios, are yet xat 'anaw i jyub ta'aj, xat 'anaw i caj, xak i mar; xak ronojel ni'pa i 'o chupam, 'is yet xat 'anawic. <sup>25</sup> Yet xa tak li a Tewal ru' i ka mam, mam David ujer, xol u bij a tzij che. Te'uri i awajchac mam David xu tz'ibaj can i tzij-i: I ne te aj Israel winak, ¿wuchac que ch'ujer rumal i coywal?

I winak, ¿wuchac qui qui tzucuj tzaksabal re i Kajwal?<sup>‡</sup>

<sup>26</sup> I je 'atol tzij re u wach i jyub ta'aj xqui yijba quib; i caj'atzil i tinimit xqui mol quib qui qui 'anbej ch'o'oj chirij i Kajwal Dios,

xak chirij i Tolke chatal rumal i Dios.

(Queje ile u tz'ibam can i mam David§ ujer, y queje coj tijin yoj chi rilic wo'or.)

<sup>27</sup> Katzij i ma Heródes, junam ru' i ma Póncio Piláto, xqui mol quib waral pa Jerusalen cu' i ne te aj Israel winak, xak cu' i je aj Israel. Xqui tzucuj tzaksabal re i lo'laj Awac'al Jesus, i Jun chi a yom yet che i lo'laj u patan. <sup>28</sup> Are xqui 'an ique ile, xe'elok pacha i a nuc'um yet ujer chi ca 'ani na. <sup>29</sup> Wo'or, Kajwal Dios, chawila chi ique coj qui 'atij, coj qui coj 'il. Yoj oj a takon, cha ya 'uri u cowil

---

‡ **4:25:** I mer tzij xu bij are iri: "I winak, ¿wuchac qui qui nojij tak u 'onquil wach i n-que tiqui ta che?" § **4:26:** Sálmo 2:1-2

ka c'ux chu bixquil a tzij chique i winak. **30** Caka tz'onoj chawe coj a to chi cutzirsaxic iwabib, xak chu 'onquil i milágro, xak chu 'onquil i nimak tak 'anic chiquiwach i winak. Choj a to are caka 'an tak ile chi yatal chake rumal i lo'laj Awac'al Jesucristo\*. (Queje ile xqui tz'onoj che i Dios.)

**31** Are xe utzin chu tz'onic che i Dios, xsilab i ja pa qui molom wi quib. Are 'uri, xc'un i u Tewal i Dios piquiwi conojel; lic xoc pa qui c'ux. Te'uri co qui c'ux xqui jek u bixquil u tzij i Dios.

*I creyent 'is junam qui wach puwi ubitak-que*

**32** I u q'ual creyent, xak jun qui wach xak jun qui nojbal. Mi jun xo'on xuy che rib puwi ubitak-re. Ni'pa i ubitak-que, 'is junam ni qui wach puwi.

**33** I apostelab n-xqui mayij tu paxsaxic i tzij chique i winak chi katzij i Kajwal Jesus walijnak chic che i camic. I qui tzij mas 'o u cho'ab; i Dios, nim i 'utz xu ya piquiwi conojel. **34** Mi jun chique xu tij uyej, man ni'pa 'o qui jyub, ni'pa 'o cachoch, qui qui c'ayij tobal que i creyent je niba'ib. **35** We xc'aytajic, qui qui c'am li mer, y qui qui ya na piqui'ab i apostelab. Te'uri i apostelab qui qui ja-cho, chirij wach i rajwaxic chique chi qui jujunal.

**36** Por ejemplo, 'o jun chique, ma Jose u bi, queje xu 'an ire ile. Ire aj Chípre, jun jyub setel chuwi mar; ire jun u muk u xiquin can i mam Lewi. I apostelab xqui ya pu bi: ma Bernabe, chi que'el pa ka ch'awbal: "aj cubsanel re qui c'ux i winak."

**37** I achi-le xu c'ayij jun rulew, xu c'am li mer, y xu ya chique i apostelab.

\* **4:30:** I mer tzij xu bij are iri: pu bi i lo'laj Awac'al Jesucristo.

## 5

*I ma Ananías, i ati Safíra quiui 'an jun t'oronic,  
quiui ch'ob ique*

<sup>1</sup> Xak 'o jun chic achi, ma Ananías u bi; i rixokil, ati Safíra u bi. Ique xqui c'ayij jun culew; <sup>2</sup> xui-ri, che i rajil i ulew, i achi 'o i xu c'ol canok, xak 'o i xu c'am li cu' i apostelab. Xu 'ano pacha are ronojel xu c'am lok, xui-ri n-ronojel taj. Xak i rixokil reta'am wach i xu 'ano. <sup>3</sup> I ma Pédro xu bij che:

—Ma Ananías, ¿wuchac xa ya che itzel xu yoj a nojbal? ¿Wuchac cawaj ca t'or i u Tewal i Dios? Yet 'o i mer a c'olom canok re i jyub xa c'ayij. <sup>4</sup> I ulew, awe yet te'ek. Are xa c'ayij, xak awe yet i mer. ¿Wuchac xa ch'ob i t'oronic-le? Che i Dios xa 'an wi i mentir, n-are ta chique i winak —xu bij.

<sup>5</sup> I ma Ananías, are xu ta ile, xtzak pulew y juntir xcamic. Ni'pa i xqui ta rason ile, lic xqui xij quib. <sup>6</sup> Te'uri, xe c'un juban creyent alabom, xqui yac bi i ma Ananías, xqui pasij y xe 'e chu mukic.

<sup>7</sup> Colo oxib 'or u 'onquil iri, xoc chali i rixokil i ma Ananías. N-reta'am taj wach i xa 'anic. <sup>8</sup> Are 'uri i ma Pédro xu bij che:

—Cha bij chwe, ¿xi c'ayij iwulew pacha i rajil xi bij chake? —co'ono.

Are, —xu bij i ixok—. Are pacha i rajil ka bim chiwe —co'ono.

<sup>9</sup> —¿Wuchac xi ch'ob yix u 'anic ile, chi qui c'am u pam i u Tewal i Kajwal? Ya que tzalij li i xe 'e chu mukic awachijil; wo'or xak cat qui c'am chubi yet —xu bij i ma Pédro che i ixok.

<sup>10</sup> Are xbitaj che, juntir xtzak pulew chuwach i ma Pédro, y xcamic. Are xe oc chali i alabom, xqui

rik tan chic ixok camnak. Xqui c'am chubic, xe 'e chu mukic chu c'ulel i rachijil. <sup>11</sup> Conojel i creyent, xak ni'pa i xe tawic, lic xqui xij quib che, wach i xa 'anic.

*Q'ui i milágro xqui 'an i apostelab*

<sup>12</sup> I apostelab, mas i milágro, mas i nimak tak 'anic xqui 'an chiquiwach i winak. Conojel i creyent nic are wi qui qui mol quib pa rachoch i Dios; qui qui mol quib chila che uwach ja chi "re i mam Salomon" ca bix che. <sup>13</sup> Xqui bij i winak chi i creyent je 'utz laj tak winak, xui-ri qui qui xij quib quicach'ilaj quib cu'. <sup>14</sup> Mas ca tijin qui q'ui aric i creyent; je q'ui achiab, xak je q'ui ixokib xqui cuba qui c'ux che i Kajwal. <sup>15</sup> I winak xe qui c'am bi iwabib chi tak be, xe qui ya can chila chuwi tak qui ch'at, chuwatch tak qui pop. Queje ile xqui 'ano man we xic'aw i ma Pédro, tz'akat ne u mujbal quic'aw piquiwi, ru' ile que utzir na. <sup>16</sup> I tinimit chi nakaj je 'o wi, je q'ui i winak que qui c'am li qui iwabib pa Jerusalen; xak que qui c'am li je ch'ujernak cumal itzel tew; conojel xe utzir sax na.

*I ma Pédro i ma Wan xya' qui lo'xic rumal u bixquil u tzij i Kajwal*

<sup>17</sup> Entónces i 'atz laj sacerdóte, cu' i rachi'il, chi jutzobaj Saducéo, xpe coywal man mas i winak xe terej chiquij i apostelab. <sup>18</sup> Rumal-i xe qui chap i apostelab y xe qui min pa cárcel. <sup>19</sup> Are cha'ab, i Kajwal xu tak li jun ángel, xol u jaká u chi' i cárcel, y xe resaj li apostelab. I ángel xu bij chique:

<sup>20</sup> —Jix pa rachoch i Dios. Chix tac'al chiquiwach i winak chila, chi 'alijinsaj chique wach i mer usuc' i c'ac' laj c'asle mal —xu bij.

**21** I apostelab xqui 'an pacha i xu bij i ángel. Are xsakiric xe 'e pa rachoch i Dios y xqui jek u c'utic chique i winak chila.

Tz'akat que tijin ique chu 'anic ile, i 'atz laj sacerdóte, junam cu' i je rachi'il, xe qui mol i nimak tak aj Israel pa nuc'bal t'isbal. (Ique n-queta'am taj wach xu 'an i ángel cha'ab.) Are xe moltajic, te'uri xqui tak qui c'amic i apostelab pa cárcel. **22** I policía, are xe upon pa cárcel, n-xe qui rik ta chic i apostelab. Rumal-i xe tzalij pa nuc'bal t'isbal y xqui bij chique:

**23**—Are xoj upon chu chi' i cárcel, lic tz'apilic xka riko; i je chajal re, 'is je 'o chu chi'. Xui-ri, i chupam, are xka jak bic, n-ta xka riko. (Queje ile xqui bij i policía chique i qui nimakil.)

**24** I caj'atzil i sacerdóte xak i caj'atzil i policía pa rachoch i Dios, junam cu' i ajwab sacerdóte, are xqui ta ile, lic xqui bisoj. Xqui tz'onoj chiquiwach:

—¿Wach nawi ca 'e q'uis wi ni'pa iri? —que cha.

**25** Are 'uri xupon jun achi cu'; xu bij chique:

—I achiab chi xe i tz'apij, je 'o pa rachoch i Dios; que tijin chu c'utic chique i winak chila —xu bij.

**26** I caj'atzil i policía xe u c'am bi i rakan u 'ab, xe 'e qui c'ama i apostelab. Xui-ri, n-xe qui yaj taj, n-xe qui ch'ay taj, man qui qui xij quib chique i winak, mokxa coxsax abaj chique. **27** I apostelab, are xe c'am lok, xe tac'bax chiquiwach i nimak tak aj nuc'bal t'isbal. Are 'uri i 'atz laj sacerdóte xoc chi qui yajic, xu bij chique:

**28**—Yoj lic ka bim chic chiwe chi mi lapla i Jesus-le. Y yix xi kelo. Je i tijojsam chic conojel i winak aj Jerusalen. Xak quiwaj qui 'abaj u camic i Jesus

chikij yoj —que cha chique. <sup>29</sup> Te'uri i ma Pédro cu' i juban apostelab xqui bij chique:

—Lic 'o chakakul caka cojo wach cu bij i Dios chake, n-are ta wach quiqui bij i winak chake. <sup>30</sup> I Kajwal Dios, chi xqui coj u 'ij i katit ka mam, are ire xc'unsaw sak chuwach i Jesus. Are i Jesus-le chi xi rip yix chuwach cruz, camsabal-re. <sup>31</sup> Are i Jesus-le chi Dios xu ya chicaj pu wikabim, cojbal re u 'ij. Xu 'an che chi Kaj'atzil yoj, xak Tolke, man queje ile 'o módo chi yoj oj aj Israel caka jalwachij ni ka nojbal chi n'-us taj, xak caka rik u cuytajic ka mac. <sup>32</sup> Yoj waral kilom wach i xa 'anic; oj 'o chu bixquil wach i kilom. Xak i u Tewal i Dios cu 'alijinsaj chi katzij wach coj tijin chu bixquil. I Dios u yom i u Tewal-le chique ni'pa i que cojow u tzij. (Queje i qui tzij i apostelab ile chique.)

<sup>33</sup> I achiab chi je 'o pa nuc'bal t'isbal, are xqui ta, xpe coywal; cacaj ique que qui camsaj. <sup>34</sup> Xui-ri, 'o jun achi, mam Gamaliel u bi, xtaq'ui 'an chiquixol. Ire jun chique i jutzobaj aj Fariséo, jun nim laj c'utunel re i ujer 'atbal tzij re i Dios. Ire lic ocsam u 'ij cumal i winak. I mam-le xu bij chi que quesaj bi jubi' i apostelab chi sak. <sup>35</sup> Te'uri xu jek u bixquil chique i nimak tak mam'ib. Xu bij:

—Ix wach aj tinimit, chi 'ana cwent wach qui 'an chique i achiab-le. <sup>36</sup> Cha c'un chi c'ux, maja naj u 'anic, 'o jun achi, ma Téudas u bi, ire xo'on nim che rib. Xe moltaj u q'uial achiab ru', colo cajib ciénto, xui-ri, ire xcamsax na, y ni'pa i je teren chirij xe quicher bic. Wach tak u nojim, to' xsachic. <sup>37</sup> Xo'on chupan jubi', are 'ij wi chi xe 'ajlax wi i winak, xak 'o jun achi aj Galiléa chi xe moltaj u q'uial

achiab ru'; ire ma Júdas u bi. Xui-ri, xak xcamsax ire, te'uri i je teren chirij xak xe quicher bic. <sup>38</sup> I in tzij yin chiwe yix: me i yinya. Chiqui 'ana ni quib. Ni'pa i que tijin chu c'utic, we xa piqui nojbal winak petnak wi, ca sach ni u wach 'uri. <sup>39</sup> We ru' i Dios petnak wi, n-quix tiqui ta 'uri chu chupic. Chi 'ana cwent, mokxa chirij i Dios quix tijin wi chi ch'o'oj —co'on i mam Gamaliel chique.

<sup>40</sup> Conojel i nimak tak mam'ib 'utz xqui ta ile. Xe qui siq'uij 'uri i apostelab, xqui jic qui lo'xic, y xqui bij chique chi miqul lapla chic i Jesus. Te'uri xe co'taj bic. <sup>41</sup> I apostelab, are xe 'el pa nuc'bal t'isbal, lic que quicotic, man i Dios u yom utzil chomal chique chi xqui tij ni q'uix rumal re i Jesus. <sup>42</sup> Ique n-xqui mayij ti u c'utic chi Jesus are i Tolke. 'Ij 'ij que tijin chu bixquil pa rachoch i Dios, xak pa cachoch i winak.

## 6

*Xe qui cha wukub achiab je aj 'anol opis chiquixol i creyent*

<sup>1</sup> Pa tak 'ij-le, i creyent ca tijin qui q'uiaric. Je 'o juban ixokib malcanib chiquixol; 'ij 'ij, i creyent qui qui ya qui wa. Jujun chique i creyent que ch'aw pa qui ch'awbal i aj Griégo, xak 'o jujun que ch'aw pa qui ch'awbal i aj Israel. I aj Griégo xe oc chu cojic qui mac i aj Israel; xqui bij chi i malcanib aj Israel mas que tzukic, xui-ri, i malcanib aj Griégo xa jubi' i qui wa ca ya'ic, que cha. <sup>2</sup> I cablajuj apostelab xe qui siq'uij 'uri conojel i creyent. Xqui bij chique:

—N-ca majaw taj we cako'taj ni u bixquil u tzij i Dios rumal u jachic qui wa i winak. <sup>3</sup> Ix kachalal,

che i cha 'uri wukub achiab chixol, chi iwilom yix je 'utz laj tak achiab. 'O u chac lic 'o u Tewal i Dios cu', xak lic 'o i qui no'oj. Chi ya 'uri chique que qui chajij i malcanib-le. <sup>4</sup> Te'uri yoj caka ya na kib chu tz'onic che i Dios, xak chu c'utic u tzij. (Queje ile xqui bij i apostelab.)

<sup>5</sup> Conojel i creyent 'utz xqui ta ile. Are 'uri xqui cha i ma Estéban; ire lic cul u c'ux che i Dios, xak mas 'o i u Tewal i Dios ru'. Xak xqui cha i ma Felipe, i ma Prócoro, i ma Nicanor, xak i ma Timon, i ma Parménas, xak i ma Nicolas chi aj pa tinimit Antioquía. Ire u yom u wach cu' i aj Israel wach u cojic u 'ij i Dios quiqui 'ano. <sup>6</sup> Are xe utzin chi qui chayic i je wukub, xe qui c'am bi cu' i apostelab. Ique xqui tz'onoj che i Dios piquiwi, xak xqui ya qui 'ab piquiwi.

<sup>7</sup> I u tzij i Dios ca tjin u paxic u wach. Pa Jerusalen mas je q'ui i winak xe oc cu' i creyent; xak je q'ui i sacerdóte xqui cuba qui c'ux che i Jesus.

### *Xqui chap i ma Estéban y xqui c'am bi chiquiwach i nuc'bal t'isbal*

<sup>8</sup> I ma Estéban lic 'o u cho'ab i Dios ru', lic 'o utzil chomal i Dios puwi. Rumal-i, mas i milágro, mas i nim laj 'anic xu 'an chiquiwach i winak. <sup>9</sup> Xui-ri, 'o juban achiab xe oc chu to'taxic chi tzij. Ique je re i molbal'ib que i aj Israel chi "Achiab n-ta chic cajaw" ca bix chique. Ique junam cu' i je aj pa tinimit Ciréne, xak i je aj pa tinimit Alejandría, xak i je aj pa Cilicia, xak i je aj pa Asia, 'is xe oc chu chapic quib chi tzij ru' i ma Estéban. <sup>10</sup> Xui-ri, n-que tiqui ta che i ma Estéban man ire, are ca ch'awic,

are i u Tewal i Dios ca yaw u nojbal che. <sup>11</sup> Ique xe qui tzucuj 'uri juban aj nuc'ul tzij chirij i ma Estéban. Xe qui toj na chi qui qui bij: "Yoj xka ta i achi-le cu bij itzel tzij chirij i ka mam, mam Moises, xak chirij i Dios," que cha. <sup>12</sup> Ru' i tzij-le, xe qui ch'ujersaj i winak, xe qui petsaj coywal i nimak tak mam'ib, xak i tijonel re i ujer 'atbal tzij. Xe 'e chirij i ma Estéban, xqui chapo, y xqui c'am bi chuwach i nuc'bal t'isbal. <sup>13</sup> Xak xe qui coj juban aj tzucul u mac i ma Estéban chi xqui bij:

—I achi-ri nic are wi cu bij itzel tzij chirij i lo'laj rachoch i Dios, xak chirij i 'atbal tzij tz'ibtal can rumal i mam Moises —que cha—. <sup>14</sup> Ka tom ni ire cu bij chi Jesus aj Nazaret cu wulajsaj ni rachoch i Dios, xak cu jalwachij ni ka costúmbre chi u yom can i ka mam, mam Moises. (Queje ile xqui bij i aj tzucul tzij.)

<sup>15</sup> Are 'uri i nimak tak mam'ib, xak ni'pa i je cul chila, xqui tzu pan i ma Estéban y xquil u palaj pacha u chomal u palaj jun ángel.

## 7

### *I u tzij i ma Estéban chiquiwach i nuc'bal t'isbal*

<sup>1</sup> I 'atz laj sacerdóte xu bij che i ma Estéban:

—¿Sak laj tzij ile, ni'pa i xqui bij? —co'on che.

<sup>2</sup> Ire xu bij:

—Nimak tak wachalal, nimak tak mam'ib, chin i ta na pe'. I ka nim laj Dios, ujer xu c'ut rib che i ka mam, mam Abraham are 'o pa jyub Mesopotámia. Are xu 'an i Dios ile, i mam Abraham maja ca 'e jeki pa jyub Haran. <sup>3</sup> I Dios xu bij che: "Cha canaj can a jyub, cha canaj can awachalal, y jat che jun

jyub quin c'ut na chawe,” xu bij. <sup>4</sup> Are ’uri i mam Abraham xel che i jyub Caldéa y xa ’e jekel chila pa Haran. Xo’on panok, xcam u kajaw, te’uri i Dios xu c’am li mam Abraham y xol jekel chi, pa oj ’o wi wo’or. <sup>5</sup> I Dios n-xu ya ta che i mam Abraham we cu chap ni jyub waral, mi xa ta jubi’. Xu bij che chi co’on panok i jyub-i re ni ire, xak que ni u muk u xiquin. Xui-ri, are xu ta i tzij-le, i mam Abraham n-ta rac’al. <sup>6</sup> I Dios, xak xu bij che chi u muk u xiquin que ’e jekel na che jun tinimit naj, chi n-que taj. Xu bij chi quiqui tij ni uyej piqui’ab i winak chila; i winak-le quiqui ’an che quib pacha je cajaw piquiwi. Queje ile quiqui tij ni c’ax cajib ciénto junab u wach. <sup>7</sup> “Xui-ri, i tinimit chi que u rajawij, quin ya na pa tojpen,” xu bij i Dios che. “Are que o’tax a muk a xiquin, que ’el chila y que pe chi, pa at ’o wi, y quiqui coj in ’ij waral,” xu bij i Dios che i mam Abraham ujer. <sup>8</sup> Xak xu bij che chi chu ’ana retal che u ch’acul, ’ilbal-re chi lic re i Dios, xak ’ilbal-re chi Dios cu ’an na pacha i u bim che. I retal-le, circumcision ca bix che. I mam Abraham, are xalax i rac’al, are ’o chic wajxakib ’ij che, xak xu ’an i retal che, pacha u bim i Dios. I rac’al, a-Isaac u bi. Are achi chic i ma Isaac, xak queje xu ’an ire ile che i rac’al, chi a-Jacob u bi. Are achi chic i ma Jacob-le, xak queje xu ’an ire ile chique i cablajuj rac’al chi xe’elok je katit ka mam yoj.

<sup>9</sup> Xo’on panok, i rac’al i mam Jacob xpe coywal chirij i qui cha’, a-Jose, man ire mas c’ax ca na’ rumal u kajaw. Rumal-i, xqui c’ayij bi i a-Jose che jun aj naj, chi xu c’am bi ru’ c’a pa Egípto. Xui-ri, i Dios ’o ru’ i a-Jose, <sup>10</sup> y xresaj chi sak che ni’pa i c’ax

xu tijo. Xu ya mas u nojbal i a-Jose, xak xu 'an che i 'atol tzij pa Egípto lic c'ax cu na ni a-Jose. I 'atol tzij, ma Faraon ca bix che, ire xu ya i a-Jose puwi i tinimit, xak piquiwi i je 'o pa rachoch ire.

<sup>11</sup> Xo'on panok, xc'un jun nim laj wa'jal; xqui tij ueyj i winak pa Egípto, xak pa Canaan pa i je 'o wi u kajaw i ma Jose, xak i ratz u cha'. I katit ka mam-le n-xqui rik taj wach quiqui tijo. <sup>12</sup> I ma Jacob, are xu ta rason chi 'o ixim chila pa Egípto, xe u tak bi u c'ojol chu tzucuxic. (Ique je are i katit ka mam yoj oj aj Israel winak.) Are i nabe cakan 'uri pa Egípto. <sup>13</sup> Xo'on panok, che ucamul cakan, i ma Jose xu bij chique chi ire are i qui cha'. C'a te'uri i ma Faraon xu ta u be chi ma Jose aj Israel winak.

<sup>14</sup> Te'uri i ma Jose xu tak u c'amic u kajaw, xak ni'pa i rachalal; i rachalal je seténta y cinco chic.

<sup>15</sup> Are u 'onquil 'uri xqui 'an i katit ka mam chi xe 'e jekel c'a naj pa tinimit Egípto. Xo'on panok, xcam i mam Jacob chila, xak queje i ralc'wal chi je katit ka mam, y xe muk na pa Egípto. <sup>16</sup> Xo'on panok xquesaj li qui bakil\* y xqui c'am li che i camposant re i 'etz mam Abraham pa jyub Siquem. O'onom lok i mam Abraham u lo'om i jubi' jyub-le re u camposant; u lo'om chique i rac'al i ma Hamor chi je aj Siquem.

<sup>17</sup> Xo'on panok i aj Israel lic xq'uiar qui wach chila pa Egípto. Lic je q'ui chic are ya cu rik i 'ij chi Dios craj que resaj piqui'ab i aj Egípto, pacha i u bim che i mam Abraham ujer. <sup>18</sup> Te'uri xoc chic jun 'atol tzij piquiwi i aj Egípto chi n-xretamaj tu wach i 'etz ma Jose. <sup>19</sup> Ire n'-us ti xu 'an chique i

---

\* <sup>7:16:</sup> Are i qui bakil i ma Jacob y ma Jose.

kach aj Israel; lic xu 'an c'ax chique i katit ka mam. I xu 'an i 'atol tzij-le are iri: xu bij chi caco'taj can i cac'al c'a je noch', camsabal-que. <sup>20</sup> Che tak i 'ij-le, xalax i ka mam, mam Moises. Ire, chom xa 'iltaj rumal i Dios. I u kajaw u chuch xcuwaj oxib ic' ru' ja. <sup>21</sup> (Are n-qui qui rik ta chic pa cacuwaj wi, xqui yijba jun ral chicach, xqui ya chupam, y xe 'e qui ya chuwi ya)† te'uri i u mi'al i 'atol tzij xu riko. Xu c'am bic y xu q'uitsaj; xu 'an pacha rac'al che. <sup>22</sup> Rumal 'uri, i aMoises, pa rachoch i 'atol tzij xq'uiy wi; xnawsax che, ronojel ni'pa i queta'am i nimak tak aj Egípto winak. Ire, xnimar u cho'ab; ni'pa i cu bij, ni'pa i cu 'ano, 'is ca tiqui che.

<sup>23</sup> Xo'on panok, are 'o chic cuarénta junab che, xu ch'ob pu c'ux que 'e rila i rach aj Israel; y xa 'ec. <sup>24</sup> Chila xril wi jun aj Egípto ca tijin chu 'anic c'ax che jun aj Israel. Xu to i rach aj Israel y xu camsaj i aj Egípto. <sup>25</sup> Xu ch'ob ire chi ni'pa i rach aj Israel qui qui ta ni u be chi ire are i tolque, chi rumal ire, i Dios que resaj ique pa c'ax piqui'ab i aj Egípto winak. Péro n-xqui ta tu be. <sup>26</sup> Chucab 'ij, i ma Moises xe u rik chic queb aj Israel winak qui qui 'an ch'o'oj chiquiwach. Craj ire qui qui chomaj quib chiquiwach. Rumal-i xu bij chique: "Yix iwachalal iwib. ¿Wuchac 'uri qui 'an ch'o'oj?" xu bij chique. <sup>27</sup> I jun chi u jekom i ch'o'oj xu tacpuj bi i ma Moises. Xu bij che: "¿Pachin xyaw chawe ca 'an i 'atbal tzij pakawi? ¡Mi jun! <sup>28</sup> ¿Cawaj quin a camsaj yin pacha xa 'an che i aj Egípto iwir?" xu bij che. <sup>29</sup> I ma Moises, are xu ta ile, xa 'anmajic; xa 'e c'a naj che i jyub Madian; chila xjeki wi, n-mer

---

† **7:21:** Exodus 2:1-10

tu tinimit. Are 'o chila, xe alax queb rac'al.

<sup>30</sup> I ma Moises, are 'o chic cuarénta junab che u jekelem chila pa Madian, ire ca bin che jun ta'aj tz'inilic chu c'ulel i ral jyub Sinai; xak te'et xril jun ral che' ca tjin u juluwic, y xwinakir jun ángel chupam i 'a'-le. <sup>31</sup> Ire lic xoc 'il che, wach i xrilo. Xtejeb pan jubi' ru', crilbej-re wach ropis. Are 'uri xu ta u ch'awbal i Kajwal chi xu bij che: <sup>32</sup> "Yin in Dios que awatit a mam. In qui Dios i mam Abraham, i mam Isaac, i mam Jacob," co'ono. I ma Moises ca sicsat chic rumal u xibriquil, n-tu cowil u c'ux cu takej. <sup>33</sup> I Kajwal xu bij che: "Waral pa at tac'al wi, 'o u 'ij; chawesaj ni a xajab. <sup>34</sup> Yin wilom wach uyej quiqui tij i wac'al chila pa Egípto; in tom wach o'ej quiqui 'ano. In kajnak lok que ol in to na; que wesaj na chupam i c'ax pa je 'o wi. Sa'aj wu', cat in tak bi pa Egípto," xu bij i Dios che i ma Moises.

<sup>35</sup> I mam Moises-le, chi chatal rumal i Dios, are i jun chi qui xutum i aj Israel winak. Qui bim che: "¿Pachin xyaw chawe at 'atol tzij ke yoj? ¿Pachin xyaw chawe ca 'an i 'atbal tzij pakawi?" qui bim na che. Are ire-le chi chatal rumal i Dios cu 'at na tzij piquiwi i aj Israel, xak que resaj pa c'ax. I Dios u takom li ángel ru', che i ral che' chi ca juluwic, xol u bij che wach u patan ca ya' che rumal i Dios. <sup>36</sup> Are i mam Moises-le xe resaj li katit ka mam pa Egípto. Are ire-le xa 'anaw nimak tak milágro nimak tak 'anic chila pa Egípto, xak che i mar "Cak", xak chila pa tak jyub tz'inilic pa xbin wi cu' i katit ka mam cuarénta junab. <sup>37</sup> Are i mam Moises-le xu bij chique i aj Israel winak: "Dios cu tak na li jun ajbil u tzij chiwe pacha yin, chi are

na jun chique i kach aj tinimit. Chi cojo retalil che wach cu bij na ire chiwe.” Queje ile xu bij i mismo mam Moises† ujer. <sup>38</sup> Are i mam Moises-le ‘o cu’ i aj Israel winak are qui molom quib che i jyub tz’inilic. Are ire-le chi xa ’ijlax rumal i ángel che i ral jyub Sinai; are ire-le chi ‘o chila cu’ i katit ka mam. Che i mam Moises-le, xya’ wi i tzij re i ka c’aslemal, cu yabej-re chake yoj.

<sup>39</sup> I mam Moises chatal rumal i Dios, xui-ri i katit ka mam n-xcaj ta quiqui cojo. Xcaj ique caquesaj bi che u patan; xcaj ique que tzalij chic pa Egípto. <sup>40</sup> Are mayal i mam Moises tzam jyub Sinai, ique xqui bij che i mam Aaron; “N-keta’am taj wach xa ’ani che i ma Moises-le, chi xoj resaj li Egípto. Mok n-ca c’un ta chic. Cha ’ana ’uri juban ka tiox, caka nabsaj bi chakawach,” xe cha. <sup>41</sup> Are ’uri xqui ’an jun tiox pacha ral me’ ca tzunic. Te’uri xe qui camsaj i chicop quiqui sujuj chuwach. Lic xe quicot ru’, wach qui ’anom ru’ qui ’ab. <sup>42</sup> Rumali, i Dios xu jec’ rib cu’ ique. Xe ro’taj canok; xu ya chique quiqui coj ni u ’ij i ch’umil aj chuwacaj, pacha cacaj ique. Xu ’an ire chique pacha tz’ibtal can cumal i ajbil u tzij i Dios ujer. Xu bij i Dios: Ix aj Israel winak, che i cuarénta junab chi xix bin pa tak jyub tz’inilic,

¿xataba chwe yin xi camsaj wi i chicop? ¿Xataba chinwach yin xi poroj wi, cojbal in ’ij yin? N-chwe taj.

<sup>43</sup> N-chwe ti yin xi coj wi in ’ij; xa xiwekaj bi i cárpa§ re i tiox Moloc.

---

† **7:37:** Deuteronomio 18:15, 18    § **7:43:** I cárpa-le, pacha jun ja ’antal che c’ul lic pim, pacha tz’um.

Xak xiwekaj bi u q'uemexwach ch'umil, cojbal na re u 'ij i tiox Renfan.

I tiox-le, xa yix ix 'anawnak man qui coj na qui 'ij. Rumal 'uri, quix wesaj chuwach i jyub yix; quix in tak bi che jun jyub naj, mas c'a chuwach pan i Babilónia —xu bij i Dios.

(Queje ile tz'ibtal canok.)

<sup>44</sup> I katit ka mam, are xe bin pa jyub tz'inilic, 'o qui cárpa pa quiqui c'ol wi i tz'alam abaj chi 'o u tzij u pixab i Dios tz'ibtal chuwach. I cárpa-le are i rachoch i Dios cu' ique; i mam Moises xu tak u 'onquil xak jun ru' pacha u bim i Dios che. Xu yijba, lic pacha i u q'uemexwach c'ut-tal che rumal i Dios. <sup>45</sup> I cárpa-le, i katit ka mam xqui ya can piqui'ab i qui muk qui xiquin pa tak lemajil. Queje ile xqui 'an che c'a xu rik i 'ij xe oc che i jyub yatal chique rumal i Dios. Xqui c'am li cu' are xe oc li chi, junam ru' i ma Josue, chi qui capitán. I aj ch'o'oj cu', i Dios xe roktaj bi chiquiwach, te'uri xe jeki i katit ka mam chuwach ulew-i. I cárpa-le are i rachoch i Dios cu', c'a are xoc i 'atol tzij mam David. <sup>46</sup> Ire-le, xu rik utzil chomal chuwach i Dios chi xak are i Dios re i ka mam, mam Jacob. I mam David-le xu tz'onoj che i Dios chi cu ya che cu yijba jun mer rachoch i Dios pu q'uemexel i cárpa. <sup>47</sup> Xui-ri, i Dios n-xu ya ta che we cu yijba; are che u c'ojo xu ya wi, chi ma Salomon. <sup>48</sup> Queje xo'on ire ile, xui-ri i Dios, chi 'Atz u 'Ij, n-jekel ta chupam jun ja 'antallic. Queje pacha u tz'ibam jun ajbil u tzij i Dios ujer, i Dios u bim i tzij-i:

<sup>49</sup> I chicaj are in cubibal pa quin 'at wi tzij; i u wach ulew are u q'uijibal i wakan.

¿Wach u 'onquil ni jun wachoch qui 'an yix? cu bij i Kajwal.

¿Xataba qui yijba jun in muj in soc pa quin uxlan wi?

<sup>50</sup> I abaj, i che', ronojel ni'pa i 'olic, ¿xataba n-yin ta in yibawnak? Yin pues\*.

(Queje u tzij i Dios ile chi tz'ibtal canok.)

<sup>51</sup> Yix xa ix buy —xu bij i ma Estéban che i 'atz laj sacerdóte, xak chique i juban aj nuc'bal t'isbal—, n-quiwaj ta qui ta u be i Dios. Iwanima yix queje pacha i canima i winak chi n-ta Dios cu'; xak queje i xiquin. N-quiwaj ti u tayic are ca ch'aw u Tewal i Dios iwu', xak jun ru' pacha xqui 'an iwatit i mam ujer. <sup>52</sup> Conojel i ujer ajbil u tzij i Dios xqui tij c'ax piqui'ab iwatit i mam. Are xqui bij u c'unic i Jun chi n-tu mac, 'is xe qui camsaj. Te'uri are xc'un i Jun chi qui bim na ique chi ca c'un na, ¿wach xi 'an yix che? Xi jach piqui'ab i tzel que 'ilawic, y xi camsaj. <sup>53</sup> Queje xi 'an yix ile, tupu i Dios xe u tak li u ángel, cu yabej re i lo'laj u 'atbal tzij chiwe. Chiwe yix xu ya wi, pero n-quix cojon ta che. (Queje u tzij i ma Estéban ile chique.)

### *I u camsaxic i ma Estéban*

<sup>54</sup> Ique, are xqui ta ile, lic xpe coywal. Quiqui kach'ach'ej uwaque chirij i ma Estéban, c'utbal re i coywal che. <sup>55</sup> Ire lic 'o i u Tewal i Dios ru', xtzun chicaj y xril i nim laj u chomal i Dios ca walch'inic. Xak xril i Jesus 'o pu wikabim i Dios. <sup>56</sup> Xu bij:

—¡Chiwilape', cwil upam i caj! Cwil i Achi aj Chicaj 'o pu wikabim i Dios —xu bij.

---

\* **7:50:** I mer tzij xu bij are iri: ¿Pa quin uxlan wi yin? ¿Xataba n-yin ta xin 'anaw ronojel iri? 1 Réyes 8:27

<sup>57</sup> I nimak tak mam'ib, are xqui ta ile, xe siq'uinic xqui tz'apij i qui xiquin y xe 'e la chirij i ma Estéban. <sup>58</sup> Xquesaj pa tinimit, y xe oc chu cojic abaj che, camsabal-re quiqui 'ano. Xquesaj i qui chaquet y xqui ya can ru' jun achi c'a ala, a-Sáulo u bi. <sup>59</sup> Are que tijin chu cojic abaj che, i ma Estéban xu tz'onoj che i Kajwal:

—Kajwal Jesus, cha c'ama i wanima —xu bij.

<sup>60</sup> Are xu bij ile, xuqui'ic; co xch'awic:

—Kajwal, cha cuyu i qui mac-i —xu bij. Are xbitaj ile rumal, xcamic.

## 8

*I a-Sáulo ca titat u pam chique i creyent; cu tzucuj chapbal-que*

<sup>1</sup> I a-Sáulo le, junam u wach cu' ique chi xe camsaw i ma Estéban. Are xcamsax i ma Estéban, are 'ij wi xjekan i ch'o'oj chiquij i creyent pa Jerusalen. Conojel i creyent xe quicher bi pa tak tinimit re i jyub Judéa, xak pa tak tinimit re i jyub Samária. Xui i apostelab n-xe 'anmaj taj. <sup>2</sup> Je 'o jujun achiab qui yom quib chi terejic chirij i Dios. Ique xe 'e qui muku i ma Estéban. Lic xe o' che. <sup>3</sup> Xui-ri, i a-Sáulo craj cu sach qui wach i jutzobaj creyent pa Jerusalen. Are i xu 'ano, xoc chi tak ja, que u jucuquej li creyent, chi achiab, chi ixokib, y que u tz'apij pa cárcel.

*I 'utz laj tzij re i Jesucristo cupon pa Samária*

<sup>4</sup> I juban creyent chi xe 'anmaj Jerusalen, xa ipa xe 'e wi, que tijin chu bixquil chique i winak wach i 'utz laj tzij re i quelbal chupam i qui mac. <sup>5</sup> 'O jun chique, ma Felípe u bi, are xa 'ec, xoc che jun

tinimit re i jyub Samária; xu jek u bixquil chique i winak chi Jesucrístico are i Tolque. <sup>6</sup> I winak lic xqui mol quib ru', lic xqui ya quib chu tayic u tzij i ma Felípe. Lic xqui coj retalil che wach i xbix chique, xak xquilo ni'pa tak i milágro xu 'ano. <sup>7</sup> Je q'ui winak xelsax itzel tew chique rumal i ma Felípe. I itzel tew que siq'uinic xe 'elic. Xak je q'ui i clis, xak je q'ui i siquirnak xe utzirsaxic. <sup>8</sup> Rumal 'uri 'is que quicot i winak pa tinimit Samária.

<sup>9</sup> Xak pa tinimit-le, 'o jun achi, ma Simon u bi, chi aj 'itz. Ire 'ax co'on wi chi que u t'or i aj Samária winak ru' nimak tak 'il chi xu 'ano. Lic xu 'an nim che rib chiquiwach. <sup>10</sup> Conojel i winak, we 'o i qui 'ij, o we n-ta qui 'ij, 'is xqui coj retalil che u tzij i ma Simon. Xqui bij chiquiwach:

—I achi-le, mas 'o u cho'ab i Dios ru' —que cha.

<sup>11</sup> Lic xqui coj retalil che, man 'o tan chi 'ij je u t'orom ru' i u q'ual tak 'anic chi u 'anom. <sup>12</sup> Xui-ri, are xupon i ma Felípe, xqui coj 'uri wach cu bij ire. Xu sakij chique wach i 'utz laj tzij chirij i 'atbal tzij re i Dios\*, xak chirij i Jesucristo. Are xqui ta u tzij, je q'ui xqui cojo, xak xqui tz'onoj u kajsaxic ya piquowi, chi achiab, chi ixokib. <sup>13</sup> Xak i ma Simon-le xu cojo y xu tz'onoj u kajsaxic ya puwi. Te'uri lic xterej chirij i ma Felípe. Lic xu bisoj are xril i nimak tak 'anic, i nimak tak milágro xu 'an i ma Felípe rumal u cho'ab i Dios.

---

\* **8:12:** I usuc' i tzij-le, are iri: ya c'un-nak chic i u Tewal i Dios chuwach i jyub ta'aj, chu 'atic tzij piquowi conojel ni'pa i qui qui cuba qui c'ux che i Jesucristo, man i Jesucristo are i 'atol tzij chi coy'em te'ek. Xui-ri, i 'atbal tzij re i Jesucristo, pa qui c'ux i winak 'o wi, n-are ta pa nim laj rachoch i Dios pa Jerusalen.

**14** I apostelab chi xe canaj can pa Jerusalen xqui ta rason chi 'o chic i aj Samária que tijin chu cojic u tzij i Dios. Rumal-i xe qui tak bi i ma Pédro i ma Wan chila cu'. **15** Are xe uponic, xqui tz'onoj che i Dios chi coc u Tewal piqui c'ux i creyent aj Samária. **16** Xqui 'an ile man maja ca c'un i u Tewal i Dios piquiwi; xui kajsam i ya piquiwi, c'utbal-re chi je re chic i Kajwal Jesus†. **17** Are 'uri i ma Pédro i ma Wan xqui ya qui 'ab piquiwi i creyent, te'uri xoc li u Tewal i Dios piqui c'ux.

**18** I ma Simon, are xrilo chi xoc i u Tewal i Dios pa canima are xqui ya qui 'ab piquiwi, xu sujuj mer chique i apostelab. **19** Xu bij chique:

—Chi ya na chwe yin wach u 'onquil ile, man pachin jun quin ya in 'ab puwi, xak ca c'un ni u Tewal i Dios ru' —co'on chique.

**20** I ma Pédro xu la' u wach che:

—¡Cha porox ni a mer pa 'a' junam awu' yet! Xa ch'ob yet to' ru' mer ca lo' ni u sipon i Dios. **21** Yet n-ta awe che u chac i Dios, mi xa ta jubi'; n-awe ti yet u 'onquil, man awanima n-suc'ul taj chuwach i Dios. **22** Chawo'taj i n'-us taj-le chi a nojim pa c'ux. Cha tz'onoj 'uri che i Dios we cu cuy a mac, wach cat tijin chu ch'obic. **23** Cwil yin mas at rayinel re u wach i n-awe taj, lic c'a i a c'ux rumal; lic at 'o pu'ab i mac atzalal —xu bij i ma Pédro che.

**24** Are 'uri i ma Simon xu bij:

—Chi tz'onoj che i Kajwal pinwi, man n-quin c'ulmaj ti pacha i xi bij yix-le —co'ono.

**25** Te'uri i ma Pédro i ma Wan xqui bij chique i aj Samária wach tak quilom ique chi u 'anom i

---

† **8:16:** I mer tzij xu bij are iri: pu bi i Kajwal Jesus.

Kajwal Jesus, xak wach tak u bim canok. Te'uri xqui maj chali qui be pa Jerusalen. Are que tijin chi be, xqui paxsaj i 'utz laj tzij re i Jesucristo chique i winak chupam u q'ual aldéa re i jyub Samaria. Te'uri xe upon pa Jerusalen.

*I ma Felípe cu bij usuc' u tzij i Dios che jun aji Etiopía*

<sup>26</sup> Xo'on panok i ma Felípe, 'o jun ángel re i Kajwal xupon ru' y xu bij che:

—Cha yijba awib y jat pa sur. Cha maja i be chi que'el pa Jerusalen, chi ca 'e kaj c'a pa tinimit Gáza —co'ono.

Are i be ile chi quic'aw chakij jyub pa n-ta wi winak. <sup>27</sup> I ma Felípe xu yijba rib y xu maj bi u be. Are ca tijin chi be xril pan jun achi aj naj re i jyub Etiopía. Ire-le, nim i u patan†, aj chajinel re u mer i ixok chi qui 'atol tzij i aj Etiopía. I achi-le, xupon chu cojic u 'ij i Dios pa Jerusalen; xutzin u 'onquil ile, <sup>28</sup> ya tzalijic chic re. Ire ca tijin chi be, cul chupam u careta, ca tijin u jeq'uic cumal caway. Tz'akat ca binic, crajlaj u wach i wuj u tz'ibam can i mam Isaías, ajbil u tzij i Dios ujer. <sup>29</sup> Are 'uri i u Tewal i Dios xu bij che i ma Felípe:

—Chat tejeb ru' i caret-a-le y chat bin pu tzal —co'on che.

<sup>30</sup> I ma Felípe xa 'e pa'anem; are xu riko, xu ta i achi crajlaj u wach i wuj chi u tz'ibam can i mam Isaías. Xu tz'onoj che i achi:

—¿Ca ta u be wach i cawil chuwach i wuj? —co'on che.

---

† **8:27:** I achi-le are jun eunúco. Are i eunúco ca bix che, are jun achi chi n-cu min ta rib cu' ixokib rumal jun operacion 'antal che.

<sup>31</sup> —¿Wach u tayic u be quin 'ano we n-ta jun cu bij usuc' chwe? —xu bij i achi che.

Are 'uri xu bij che i ma Felípe chi ca 'an chupam u caretta, que cubi junam. <sup>32</sup> Are u xak wuj chi cu takej, are i pa tz'ibtal wi i tzij-i:

Ire xc'am bi che u camsaxic pacha jun chij.

Jun chij, are ca c'atzix rismal, n-ca ch'aw taj.

Xak queje xu 'an ire ile: n-ti xu bij; n-xu jak ti u chi' (are xqui 'an c'ax che).

<sup>33</sup> Xkajsax u 'ij; mi jun xu 'an 'atbal tzij puwi pacha usuc'.

Ire, mi jun u muk u xiquin xu canaj canok§, man i u c'aslemal xelsax che, waral chuwach i jyub ta'aj.

Queje i tzij ile u tz'ibam can i mam Isaías\*.

<sup>34</sup> I achi, are xutzin chi rajlasic u xak i wuj, xu tz'onoj che i ma Felípe:

—Cha 'ana utzil chomal chwe: cha bij chwe, ¿are i tz'ibawnak iri, are ire xu bij rib? ¿O are jun chic xu lapo? —co'ono.

<sup>35</sup> Are 'uri i ma Felípe xu jek u bixquil che wach i 'utz laj tzij re i Jesus; xu jek u c'utic che ru' i mer jupaj tzij-le pa i xrajlaj wi chuwach wuj. <sup>36</sup> Te'uri, are que tijin chi be, xe ic'aw pa 'o wi i ya; are 'uri i achi xu bij:

—Chi 'o i ya. ¿'Utz nawi ca kajsax ni ya pinwi wo'or? ¿O nawi ca 'atiw u 'onquil? —co'on che.

<sup>37</sup> I ma Felípe xu bij che:

—N-taj; we lic cul a c'ux che i Jesucristo —co'ono.

---

§ **8:33:** I mer tzij xu bij are iri: ¿Pachin que ch'aw chirij u muk u xiquin? \* **8:33:** Isaías 53:7-8

—Cul in c'ux che chi are i Jesucristo are u C'ojol i Dios —xu bij che i ma Felípe.

<sup>38</sup> Te'uri xu tak u tac'baxic u caretta. Xe kaj bi che queb, xe 'e chi ya. Are 'uri i ma Felípe xu kajsaj ya puwi i achi. <sup>39</sup> Are xe 'el chu chi' i ya, i u Tewal i Dios xu c'am bi i ma Felípe. I achi n-xril ta chic u wach, xui-ri ca quicotic xu maj tan chic u be. <sup>40</sup> I ma Felípe, xril ire chi 'o pa tinimit Azoto. Are 'uri xu maj u be che i tinimit Cesárea. Are ca tijin chi be, xu paxsaj i 'utz laj tzij re i Jesucristo pa tak tinimit pa xic'aw wi.

## 9

### *I u c'utic rib i Kajwal che i ma Sáulo*

<sup>1</sup> I ma Sáulo n-xu mayij tu bixquil i qui cam-saxic ni'pa i qui jachom quib pu'ab i Kajwal Jesus. Rumal 'uri xa 'e ru' i 'atz laj sacerdóte, <sup>2</sup> xe u tz'onoj u wuj re i rocbal pa tak molbal'ib pa tinimit Damásco, que u tzucbej que i creyent. Craj ire que u c'am lok, que u tz'apij pa Jerusalen, chi achiab, chi ixokib. <sup>3</sup> Xui-ri, are ca tijin chi be, ya cupon chu nakaj i tinimit Damásco, xak te'et xpe jun 'a' chicaj, xrepcañ chirij chuwach. <sup>4</sup> I ma Sáulo xtzak pulew; are 'uri xu ta jun ch'awbal chicaj chi xu bij:

—A-Sáulo, a-Sáulo, ¿wuchac ca 'an ch'o'oj chwij yin? —xbix che.

<sup>5</sup> I ma Sáulo xu tz'onoj che:

—¿At pachin yet, Nim laj Winak? —co'ono.

Te'uri xbix che:

—Yin in Jesus; chwij yin cat tijin wi chu 'anic ch'o'oj. Xui-ri, xa atuquel yet ca 'an c'ax che awib, pacha co'on jun boyex are cu coj akan che jun

puyu; utuquel co'on c'ax che rib, queje ca 'an yet ile —xbix che.

<sup>6</sup> I ma Sáulo ca sicsat rumal u xibriquil.

—Kajwal, ¿wach cawaj yet quin 'ano? —xu bij.

I Kajwal xu bij che:

—Chat walijok, jat pa tinimit. Chila ca bix wi chawe wach i ca 'ano —xbix che.

<sup>7</sup> I achiab chi je rachi'il i ma Sáulo je ocnak 'il man xqui ta i ch'awbal, xui-ri n-xquil tu wach i xch'awic. <sup>8</sup> I ma Sáulo xwalij chuwach ulew, pero are xu jak u ba'wach, n-ca tzun ta chic. Rumal'uri, xqui ch'elej bi che u 'ab, y xqui c'am bi pa tinimit Damásco. <sup>9</sup> Chila xu ch'ij oxib 'ij n-ca tzun taj; n-cu tij ta chic u wa, n-cu tu' ta chic u ya'.

*I Kajwal cu tak i ma Ananías chi rutzirsaxic i ma Sáulo*

<sup>10</sup> O jun creyent, ma Ananías u bi, jekel chila pa Damásco. Ire xril pu wach chi i Kajwal xu c'ut rib chuwach.

—¡Ananías! —co'on che.

—¿Wach cawaj, Kajwal? —xu bij ire.

<sup>11</sup> Are 'uri i Kajwal xu bij che:

—Chat walijok, jat pa be chi “Suc'ulic” ca bix che. Chila, che i rachoch i ma Júdas, cha tzucuj wi jun achi, ma Sáulo u bi, aj pa tinimit Társo. Wo'or ca tijin chu tz'oxic che i Dios. <sup>12</sup> I achi-le, at roym, man rilom chic pu wach chi cupon jun achi ru', ma Ananías u bi. Xak xin bij che chi yet ca coj ni a 'ab puwi man ca tzun tan chic —co'on che i ma Ananías.

<sup>13</sup> I ma Ananías, are xu ta, xu bij:

—Kajwal, je q'ui je bin-nak chwe chi i achi-le, are 'o pa Jerusalen, mas i c'ax xu 'an chique i je

awe yet. <sup>14</sup> Y ya xc'un chi, col u chapbej-que ni'pa i quiqui tz'onoj i tobaj-que chawe. I caj'atzil i sacerdóte xqui ya che chi cu 'an ile —co'on i ma Ananías.

<sup>15</sup> Are 'uri i Kajwal xu bij che:

—Jat; ya xin cha i achi-le ca 'e u bij in tzij chique i ne te aj Israel winak, xak chique i qui 'atol tzij, xak chique i aj Israel. <sup>16</sup> Quin c'ut na che ni'pa u q'uijal i c'ax cu ch'ij na xa wumal yin, are cu bij in tzij chique i winak —xu bij i Kajwal che.

<sup>17</sup> Te'uri i ma Ananías xa 'e ru' ja pa 'o wi i ma Sáulo. Xoc bic, xu ya u 'ab puwi y xu bij che:

—Wachalal ma Sáulo, i Kajwal Jesus chi xu c'ut rib chawe pa be, are i xin takaw li awu'. Xin u tak lok man cat tzun tan chic, xak coc li u Tewal i Dios pawanima —xu bij i ma Ananías che.

<sup>18</sup> Are 'uri i ma Sáulo pacha xc'ojwan u ba'wach, y xtzun chic. Te'uri xwalijic, y xkajsax ya puwi.

<sup>19</sup> Te'uri xu tij u wa; xq'uiji chic u cho'ab. Xnajtin jubi' chila pa tinimit Damásco cu 'i creyent.

### *I ma Sáulo xoc chu c'utic u tzij i Kajwal pa Damásco*

<sup>20</sup> I ma Sáulo, are 'utz chic, juntir xu jek qui solixic i tak molbal'ib que i aj Israel, y xoc chu bixquil chique chi Jesus are u C'ojol i Dios.

<sup>21</sup> Conojel i xe tawic lic xqui bisoj:

—I achi-le, ¿xataba n-are ti ire-le chi xu 'an ch'o'oj chiquij i creyent? Ire-le, are 'o pa Jerusalen, xe u chap ni'pa i quiqui tz'onoj i tobaj-que che i Jesus. Te'uri xc'un waral que u chapbej bi que i creyent; xraj ire que u c'am bi pa Jerusalen, que u jacha chique i caj'atzil i sacerdóte. (Queje xqui bij i winak ile pa molbal'ib.)

<sup>22</sup> Xui-ri, i ma Sáulo xa xu cowij mas u c'utunic chique. Lic xu 'alijinsaj chique chi are i Jesus are i Tolque chi coy'em. Xe'elok chi ni'pa i aj Israel je jekel pa tinimit Damásco n-quiqui rik ta chic wach quiqui bij che.

*I ma Sáulo xa 'anmaj chiquiwach i nimak tak aj Israel*

<sup>23</sup> Xo'on chupan jubi', i nimak tak aj Israel xqui junamsaj qui no'oj chi quiqui camsaj i ma Sáulo, <sup>24</sup> xui-ri, ire xu ta rason wach i qui ch'obom. Ique, chi pa'ij chi cha'ab cacoy'ej pa tak 'elbal bic re i tinimit, quiqui camsabej-re. <sup>25</sup> I creyent xqui to i ma Sáulo; xqui ya chupam jun nim laj chicach cha'ab, y xqui kajsaj chirij i tapia chi u sutim rij i tinimit. Queje u totajic ile xqui 'ano.

*Wach i xu c'ulmaj i ma Sáulo pa Jerusalen*

<sup>26</sup> I ma Sáulo xa 'e chic pa Jerusalen; are xuponic, craj ire coc cu' i creyent. Xui-ri ique xqui xij quib che, n-xqui coj taj we katzij u yom chic rib pu'ab i Jesus. <sup>27</sup> O jun creyent, ma Bernabe u bi, xu c'am bi i ma Sáulo cu' i apostelab, man caquetamaj u wach. I ma Bernabe xoc chu bixquil chique wach u c'ulaxic i Kajwal xu 'an i ma Sáulo pa be, xak wach u 'ijlaxic xu 'an i Kajwal. Xak xu bij chique chi i ma Sáulo co i u c'ux xu lap i Jesus chique i aj Damásco. <sup>28</sup> Te'uri i ma Sáulo xnajtin cu' i creyent pa Jerusalen; pa i que 'e wi ique, xak ca 'e ire cu'. <sup>29</sup> Ire lic co u c'ux xu lap i Kajwal chique i winak. Xlapan cu' i aj Israel winak chi que ch'aw piqui ch'awbal i aj Griégo; 'olic xqui chap quib chi tzij cu'. Xui-ri, ique xqui tzucuj wach camsabal-re. <sup>30</sup> I creyent, are xqui ta ile, xqui c'am bi che

i tinimit Cesaréa, te'uri xqui tak bi che i tinimit Társo\*. (Queje u totajic ile xqui 'ano.)

**31** Are 'uri, xuxlan jubi' i ch'o'oj chiquij i tak tzobajil creyent chi je 'o pa tak tinimit re i jyub Judéa, xak re i Galiléa, xak re i Samária. Ique lic xcowir u cubibal qui c'ux che i Kajwal, lic quiqui coj u 'ij, lic quiqui coj u tzij, xak xe q'uiar rumal u Tewal i Dios.

### *I ma Pédro xrutzirsaj jun achi pa tinimit Lída*

**32** I ma Pédro are ca tijin chi qui solixic i creyent pa tak tinimit, xak xa 'e bin cu' i je 'o pa tinimit Lída. **33** Chila xu rik wi jun achi, ma Enéas u bi; 'o chic wajxakib junab che chi cotz'ol puwi u ch'at, siquirnak u ch'acul. **34** I ma Pédro xu bij che:

—Ma Enéas, i Jesucristo cat rutzirsaj. Chat wali-jok y cha yijba a ch'at —co'on che.

I ma Enéas juntir xwalijic. **35** Conojel i aj pa tinimit Lída xquilo wach i xa 'anic, xak queje i aj pa ta'aj Saron; rumal 'uri xqui jalwachij qui nojbal chi n'-us taj, y xqui ya quib pu'ab i Kajwal.

### *I ma Pédro xu c'unsaj sak chuwach i ati Dórcas*

**36** Che i Lída, nakaj 'o wi i tinimit Jópe pa jekel wi jun ixok creyent, ati Tabíta u bi. (Piqui ch'awbal i aj Griégo winak, ati Dórcas quiqui bij che.) I ixok-le, 'utz laj winak, mas que u to i niba'ib. **37** Che tak i 'ij-le (are 'o i ma Pédro pa Lída), i ati Dórcas xiwajic y xcamic. 'O i xch'ajaw u ch'acul y xqui ya pu caleja. **38** I tinimit Jópe n-naj ta 'o wi che i tinimit Lída, pa 'o wi i ma Pédro. I creyent pa Jópe queta'am chi chila 'o wi, rumal-i xqui tak u siq'uixic. Xe qui tak

\* **9:30:** Ile are u tinimit i ma Sáulo.

bi queb achiab chu bixquil che chi we' u wach cha petok.

<sup>39</sup> I ma Pédro xa 'e cu'; are xuponic, xc'am bi chila pa 'o wi i camnak. Je q'ui ixokib malcanib que o'ic; xqui mol quib chirij chuwach i ma Pédro. Xqui c'ut che ni'pa i camix, ni'pa i qui 'u' u yijbam, u si pam can i ati Dórcas chique are c'aslic. <sup>40</sup> I ma Pédro xu bij chique chi que 'el bi jubi'. Te'uri xuqui ru' i camnak y xu tz'onoj che i Dios. Xu maj u takexic i camnak:

—Tabítá, chat walijok —xu bij che.

Xak te'et, i ixok xu jak u ba'wach; are xu takej i ma Pédro, xcubi 'anok. <sup>41</sup> Te'uri i ma Pédro xu chap che u 'ab y xu yaco. Xe u siq'uij i creyent, xak i ixokib malcanib, y xu jach i ati Dórcas chique, c'as tan chic. <sup>42</sup> Ile, xpax rason ronojel i tinimit Jópe; te'uri je q'ui i winak xqui cuba qui c'ux che i Kajwal. <sup>43</sup> I ma Pédro xnajtin jubi' che i tinimit-le. Xq'uiji pa rachoch jun aj tucul tz'um, ma Simon u bi.

## 10

*I Dios xu tak bi i ma Pédro ru' rachoch i ma Cornélio, chi n-aj Israel taj*

<sup>1</sup>'O jun achi jekel pa tinimit Cesaréa, ma Cornélio u bi. I u patan ire, capitan piquiwi cien soldádo. I u bi i jutzobaj soldádo-le: Italiáno ca bix che. <sup>2</sup> I ma Cornélio-le lic u yom rib che i Dios, lic quiqi coj u 'ij i Dios junam cu' i rixokil ralc'wal. Nic are wi xu tz'onoj che i Dios, xak xu ya mer, tobal-que i aj Israel winak. <sup>3</sup> Chupam jun 'ij, colo a las tres re u kajbal 'ij, sakil xril ire puwach 'o jun ángel petnak ru' i Dios; xoc ru' y xu bij che:

—¡Ma Cornélio! —co'ono.

<sup>4</sup> Ire, are xrilo, xcanajic to' ca takenic rumal u xibriquil.

—¿Wach cu bij a c'ux, Nim laj Winak? —xu bij che.

I ángel xu bij che:

—I Dios, ni'pa i a tz'onom che, ni'pa i a yom chique i niba'ib, 'utz crilo; ya 'o chic chuwach ire.

<sup>5</sup> Che a taka bi 'uri juban achiab pa tinimit Jópe chu siq'uixic i ma Simon, chi xak ma Pédro ca bix che.

<sup>6</sup> Ire 'o i u posar chila ru' jun chic ma Simon, aj tucul tz'um; i rachoch 'o chu c'ulel i mar. Ire col u bij na chawe wach i ca 'ano. (Queje xu bij i ángel ile che i ma Cornélio.)

<sup>7</sup> Are xa 'e i ángel, i ma Cornélio xe u siq'uij queb u mocom, xak i jun u soldádo chi lic teren chirij, chi lic cu coj u 'ij i Dios. <sup>8</sup> I ma Cornélio xu bij chique ronojel wach i xrilo, wach i xu ta; te'uri xe u tak bi pa tinimit Jópe.

<sup>9</sup> Chucab 'ij, i achiab que tijin chi be, ya que nakajab che i tinimit Jópe. Are tiq'uil 'ij, i ma Pédro craj cu tz'onoj che i Dios. Xel bi 'uri puwi i ja, chi ta'aj u wi. <sup>10</sup> Ire ca num chic, lic craj u wa. Are que tijin chu yibbaxic u wa, ire 'o i xril puwach. <sup>11</sup> Xril ire pacha xjaktaj i caj y xkaj li pacha jun nim laj c'ul pulew, ximtal pa tak u tzam. <sup>12</sup> Chupam i c'ul xrilo je 'o u q'ual chicop q'ui qui wach. 'O i cajib cakan, xak je 'o i cumatz, xak je 'o i tz'iquin; 'is q'ual qui wach. <sup>13</sup> Xu ta ire chi xbix che:

—Chat walijok, a-Pédro, cha camsaj y cha tija — cutixic.

<sup>14</sup> Ire xu bij:

—Cuyu in mac, Kajwal. Yin lic n-quin tij ti n-ch'am ta laj tak chicop. Lic n-quin tij ti awas chicop\* —co'on i ma Pédro.

**15** Xbix chal che chicaj:

—Ni'pa u 'anom chic ch'am i Dios che, ma bij yet 'uri che chi n-ch'am taj —cutixic.

**16** Queje xbix ile che, oxmul; te'uri xtzalij chic i c'ul chicaj. **17** I ma Pédro to' ch'obonic xcanajic, wach usuc' ile chi xril puwach. Tz'akat xu 'an ire ile, are 'uri i u takon i ma Cornélio je 'o chuwach uchija. Que tjin chu ch'obic rakan pa 'o wi i rachoch i ma Simon. **18** Are je 'o chuwach uchija, co xe ch'aw pan pa ja:

—¿N-chi ta 'o wi u posar i ma Simon, chi xak ma Pédro ca bix che? —xe cha.

**19** I ma Pédro c'a ca tjin chu ch'obic wach i xril puwach. Are 'uri i u Tewal i Dios xu bij che:

—Tape', cat qui tzucuj oxib achiab. **20** Chat walijok, chat kaj bic, y jat cu'. Ma xij awib, man yin je in takom li awu' —co'on u Tewal i Dios che.

**21** I ma Pédro xkaj li 'uri pa je 'o wi u takon i ma Cornélio. Xu bij chique:

—Yin-i, chi quin i tzucuj. ¿Wach i quiwaj yix wu'? —co'on chique.

**22** —Yoj oj u takom li capitan ma Cornélio. Ire 'utz laj winak; cu coj u 'ij i Dios; lic cajwax cumal i aj Israel winak. Jun ángel re i Dios xbin che chi xoj u tak li cha siq'uixic yet, man cat 'e ru' chila che i rachoch. 'O u chac cu ta chawe wach i ca bij na che —xe cha che.

\* **10:14:** Ujer, i Dios u bim chique i aj Israel ni'pa tak qui wach i chicop chi n-us taj ca tijawic. (Levítico 11)

**23** I ma Pédro xu bij chique chi que oc ru' pa ja; xe canaj 'uri jun a'ab ru'. Chucab 'ij, xa 'e i ma Pédro cu', xak je 'o jujun creyent aj Jópe xe 'e cu'. **24** Churox 'ij xe upon pa tinimit Cesaréa. I ma Cornélio je coy'em chic cu' i rachalal, xak cu' i queta'am qui wach chi je u siq'uim ru'. **25** Are xupon i ma Pédro, xel li ma Cornélio chu c'ulaxic, y xuqui chuwach, cu cojbej re u 'ij. **26** I ma Pédro xu yaco.

—Chat walijok —xu bij che—, yin xa in winak pacha yet—co'ono.

**27** Que tijin chi tzij, xe oc bi pa ja; are 'uri xe ril u q'ual winak qui molom quib, coy'em ruponic.

**28** Te'uri i ma Pédro xu bij chique:

—Yix lic iweta'am chi i ka costúmbre yoj oj aj Israel, n-cu ya ta chake coj oc iwu' che iwachoch yix chi n-ix ta aj Israel. N-cu ya ta chake cakuc'aj kib iwu' yix; xui-ri i Dios u c'utum chwe chi n'-us taj we quin bij itzel winak che chic jun chic. N'-us taj we quin bij chi i ne te aj Israel ne te 'utz chuwach i Dioſ†. Queje ile u c'utum chwe. **29** Rumal-i, are xin i siq'uij, juntir xin petic. N-ta co'ono we n-ix ti aj Israel; n-ta xin bij che ile. Cwaj cwetamaj wuchac xin i siq'uij iwu' —co'on i ma Pédro chique.

**30** Te'uri i ma Cornélio xu bij che:

—Che can i cajib 'ij, pacha i 'or-i, ya co'on a las tres re u kajbal 'ij, 'o i xwil pinwach. Yin in 'o waral ru' wachoch; in canam can in wa'im man quin tijin chu tz'oxic che i Dios. Xak te'et, xwinakir

---

† **10:28:** I mer tzij xu bij are iri: I Dios u c'utum chwe chi n'-us taj we quin bij chi jun winak n-ch'am taj chuwach i Dios, o we tz'il chuwach i Dios.

jun achi chinwach, i u 'u' lic ca walch'inic. <sup>31</sup> Xu bij chwe: "Ma Cornélio, Dios u tom wach i ca tz'onoj che; xc'un pu c'ux chi lic que a to i niba'ib," xu bij chwe. <sup>32</sup> "Cha taka u c'amic i ma Simon, chi xak ma Pédro ca bix che," co'ono. "Ire 'o pa tinimit Jópe; 'o u posar ru' jun chic ma Simon chi aj tucul tz'um. I rachoch 'o chu c'ulel i mar. Ire col u bij chawe wach i ca 'ano." Queje ile xu bij i ángel chwe. <sup>33</sup> Rumal-i, juntir xin tak a siq'uixic; 'utz xa 'ano xat c'unic. Wo'or ka molom kib chi, chuwach i Dios; cakaj caka ta wach ca bij chake, pacha u bim i Dios chawe chi ca bij chake—co'on i ma Cornélio.

*I u tzij i ma Pédro chi rachoch i ma Cornélio*

<sup>34</sup> Are 'uri i ma Pédro xoc chu bixquil chique:

—Wo'or quin ta u be chi katzij i Dios xak jun kilic cu 'ano. <sup>35</sup> Ire 'is 'utz que rilo ni'pa i quiqui coj u 'ij, xak quiqui 'an i 'utz; n-ta co'ono bi chi jyubal je petnak wi. <sup>36</sup> Are ile, are i 'utz laj tzij xu tak bi chique i aj Israel winak; xu bij chi rumal i Jesucristo, i winak 'is quiqui rik i chombal quib ru' i Dios. Are i Jesucristo are i Cajwal i winak conojel.

<sup>37</sup> Iweta'am yix wach i xa 'ani pa ronojel i jyub Israel, chi xjekan li c'a Galiléa, are xq'uis u chac i 'etz ma Wan, chi xu c'ut chique i winak chi 'o u chac quiqui jalwachij qui c'aslemal, xak ca kajsax ya piquiwi. <sup>38</sup> Iweta'am yix chi Jesus aj Nazaret, i Dios lic xu ya i u Tewal che, xak i u cho'ab; ire xbin pa tak tinimit chu 'onquil i 'utz, xak chi cutzirsaxic ni'pa i je 'o pu'ab itzel. Xtiqui chu 'onquil, man i Dios lic 'o ru'. <sup>39</sup> Yoj oj apostelab, 'is xkilo ronojel wach xu 'an i Jesus pa tak jyub re i Judéa xak pa tinimit Jerusalen, c'a are xqui rip chuwach cruz,

camsabal re. <sup>40</sup> Are i mísmo Jesucristo chi Dios xu c'astaj churox 'ij, y xu winakirsaj chic chakaxol yoj. <sup>41</sup> N-xu c'ut ta chique i winak conojel, xui chake yoj, man yoj oj chatal ujer rumal i Dios, caka yabej rason. Ku' yoj xu tij wi u wa, i u ya', are walijnak chic chiquixol i camnak. <sup>42</sup> Xoj u tak yoj chu ya'ic rason chique i winak; xoj u tak bi chu bixquil chi Dios yawnak i Jesus-le aj 'anol 'atbal tzij piquiwi i je c'aslic, xak i je camnak, wach tak i qui 'anom. <sup>43</sup> Conojel i ajbil u tzij i Dios, 'ax qui bim wi wach u patan i Jesus. Qui bim chi ni'pa i qui qui cuba qui c'ux che ire, 'is ca cuytaj qui mac; rumal ire que cuytaj na. (Queje i u tzij i ma Pédro ile chique.)

*Xc'un i u Tewal i Dios piquiwi i ne te aj Israel  
winak*

<sup>44</sup> Are ca tijin i ma Pédro chi tzij, are 'uri xc'un i u Tewal i Dios piquiwi conojel i xe taw u tzij. <sup>45</sup> I aj Israel creyent chi je petnak ru' i ma Pédro, ique to' xqui bisoj are xkaj u Tewal i Dios piquiwi i ne te aj Israel. (Qui qui bij ique, xui chique i aj Israel winak ca ya'ic, péro n-xui taj.) <sup>46</sup> 'Alaj chi petnak piquiwi, man xqui ta ique chi junwi chic que ch'awic, xak que tijin chu cojic u 'ij i Dios. <sup>47</sup> Te'uri i ma Pédro xu bij:

—Xak ique xkaj li u Tewal i Dios cu' pacha u 'anom chake yoj. Rumal-i, 'utz we ca kajsax ya piquiwi —co'ono.

<sup>48</sup> Xu tak 'uri u kajsacic ya piquiwi, c'utbal-re chi je re chic i Jesucristo<sup>‡</sup>. Te'uri, ique xqui tz'onoj che i ma Pédro chi ca najtin cu'.

---

<sup>‡</sup> **10:48:** I mer tzij xu bij are iri: Pu bi i Kajwal Jesus.

**11**

*Ijutzobaj creyent aj Israel xqui ta u be chi xak 'o i cuybal mac chique i ne te aj Israel*

<sup>1</sup> I apostelab chi je 'o pa Judéa, xak i juban creyent chila, xqui ta rason 'uri chi 'o i ne te aj Israel chi xak xqui coj u tzij i Dios. <sup>2</sup> I ma Pédro, are xtzalij pa Jerusalen, xyaj cumal jujun creyent chi je aj Israel winak; cacaj ique chi conojel i creyent ca 'an i retal circuncision chique. <sup>3</sup> Xqui tz'onoj che:

—¿Wuchac xat 'e bin cu' i ne te aj Israel winak?  
¿Wuchac xa tij wa cu'? —xe cha che.

<sup>4</sup> Are 'uri i ma Pédro 'is xu bij chique ronojel wach i xu c'ulmaj. Xu jek u bixquil chique wach u jekanic lok. Xu bij:

<sup>5</sup> —Yin, are in 'o pa tinimit Jópe, quin tijin chu tz'onic che i Dios. Are 'uri 'o i xwil pin wach. Xwilo chi xkaj li pacha jun nim laj c'ul chicaj, ximtal pa tak u tzam; xkaj li wu', pa in 'o wi yin. <sup>6</sup> Are xin takej coq'uil, xwilo je 'o tak chicop chupam, cajibakan, jujun chique lic je itzel chicop; xak je 'o cumatz, xak je 'o tz'iquin chupam. <sup>7</sup> Are 'uri xin ta jun ch'awbal chi xu bij: "Chat walijok, a-Pédro," xu bij chwe, "cha camsaj y cha tija," xin utxic. <sup>8</sup> "Cuyu in mac, Kajwal," xin bij, "yin n-ta xak ocnak pin chi' chi n-ch'am taj; lic n-ta xak ocnak pin chi' chi awasim chicop," xin bij che. <sup>9</sup> Are 'uri i ch'awbal chicaj xin u 'ijla chic; xu bij: "Ni'pa u 'anom chic ch'am i Dios che, ma bij yet 'uri che chi n-ch'am taj," co'on chwe. <sup>10</sup> Oxmul xu 'ano, te'uri xel chubi chicaj. <sup>11</sup> Are 'uri xe upon oxib achiab ru' ja. Je taktal bi chin tzucuxic, je petnak

c'a pa tinimit Cesaréa. <sup>12</sup> I u Tewal i Dios xin u tak bi cu', n-ta chic quin na wib che. Xak i wakib aj Israel creyent chi je aj Jópe xe 'e wu', y konojel yoj xoj oc chi rachoch i achi chi xin u siq'uij. <sup>13</sup> Ire xu bij chake chi xwinakir jun ángel chi rachoch, chi xu bij che: "Che a taka bi achiab pa Jópe chu tzucuxic i ma Simon chi xak ma Pédro ca bix che. <sup>14</sup> Ire cu bij na chawe wach u rikic a c'aslemañ chi n-tu q'uisic, yet cu' awixokil awalc'wal." Queje ile xbix che, xu bij chwe. <sup>15</sup> Are xin uponic y xin jek u c'utic chique, xc'un u Tewal i Dios piquiwi, xak jun ru' pacha xu 'ano are xc'un ku' yoj are xka jek i ka chac. <sup>16</sup> Te'uri xc'un chin c'ux wach u bim can i Kajwal. Xu bij ire chi i ma Wan xu kajsaj ya piquiwi i winak, pero co'on panok i Dios cu kajsaj li u Tewal piquiwi i winak. (Queje xu bij ire ile chake.) <sup>17</sup> Xwil yin chi xu 'an i Dios chique ique xak jun ru' pacha u 'anom chake yoj chi ka jachom kib pu'ab i Kajwal Jesucrísto. We queje xu 'an i Dios ile, ¿xataba quin 'atij yin wach craj i Dios? N-taj. (Queje xu bij i ma Pédro ile chique.)

<sup>18</sup> I creyent pa Jerusalen, are xqui ta ile, n-xe ch'aw ta chic, xa xqui c'amwaj xqui tioxij che i Dios. Xqui bij:

—Alaj 'uri chi Dios xak u yom chique i ne te aj Israel chi qui qui jalwachij qui no'oj chi n'-us taj, ch'acbal re qui c'aslemañ sakil. (Queje ile xqui bij chiquiwach.)

### *I u q'uiaric i jutzobaj creyent pa Antioquia*

<sup>19</sup> I creyent pa Jerusalen, are xcamsax i ma Estéban, xak xpe ch'o'oj chiquij ique. Rumal-i, xe 'el chila; 'o i xe 'e pa jyub Fenicia, 'o i xe 'e pa Chípre,

xak 'o i xe 'e c'a pa Antioquía. Are xe upon pa tak jyub-le, xe oc chu bixquil i'utz laj tzij re i Jesucristo; xui chique i aj Israel winak xqui bij wi; n-xqui bij ta chique i ne te aj Israel. <sup>20</sup> Xui-ri, je 'o jujun creyent aj pa Chípre, xak juban aj pa Ciréne, xe upon che i tinimit Antioquía y xe oc chu c'utic i'utz laj tzij re i Kajwal chique i ne te aj Israel. <sup>21</sup> Are xqui 'an ique ile, lic 'o u cho'ab i Dios cu'. Je mas i winak xqui jach quib pu'ab i Kajwal, xak xco'taj can i qui nojbal re ujer.

<sup>22</sup> I jutzobaj creyent pa Jerusalen xqui ta rason chi je q'ui aj Antioquía qui jachom quib pu'ab i Kajwal; rumal-i xqui tak bi i ma Bernabe cu'. <sup>23</sup> Ire, are xupon chila, xrilo chi lic 'o utzil chomal re i Dios cu', lic xquic平rumal. Te'uri xe u pixabaj conojel, chi jiquil qui c'ux che 'olok, lic ma co'taj i Kajwal. <sup>24</sup> Queje ile xu bij ire chique, man ire 'utz laj winak, lic 'o i u Tewal i Dios ru', xak lic cul u c'ux che i Dios. Rumal-i, mas tan chic i winak xqui jach quib pu'ab i Kajwal.

<sup>25</sup> Te'uri i ma Bernabe xa 'e pa tinimit Társo chu siq'uixic i ma Sáulo. Are xu riko, xu c'am li pa tinimit Antioquía. <sup>26</sup> Are xe uponic, xe q'uiji jun junab cu' i jutzobaj creyent chila. Je q'ui i winak xe qui tijoj che i junab-le. I creyent pa Antioquía, "Cristian" ca bix chique cumal i winak. Are i nabe u bixquil ile chique i je re i Jesucristo.

<sup>27</sup> Pa tak 'ij-le, je 'o juban creyent aj pa Jerusalen xe c'un pa Antioquía. Je ajbil-re chique i winak wach i ca 'ani na. <sup>28</sup> Jun chique, ma Agábo u bi, xtaq'ui 'an chiquixol i creyent pa qui molom wi quib; rumal u Tewal i Dios chi 'o ru', xu bij chique

chi ca pe jun wa'jal ronojel u wach i jyub ta'aj. Xo'on panok, ni'pa i xu bij, queje xe'elok. Xpe jun wa'jal pa tak 'ij re i ma Cláudio, are 'atol tzij wi ire. <sup>29</sup> Entónces i creyent pa Antioquía xqui ch'obo chi que qui to pan i creyent aj Judéa. Chi qui jujunal xqui ya qui mer, ni'pa i que tiqui chu ya'ic. <sup>30</sup> I ni'pa i mer chi xqui molo, xqui tak bi chique i qui wi qui jolom i creyent aj Judéa. Piqui'ab i ma Bernabe i ma Sáulo xqui tak wi bic.

## 12

*I ma Heródes xu tak u camsaxic i ma Jacóbo, xak i u tz'apixic i ma Pédro*

<sup>1</sup> Che tak i 'ij-le, i 'atol tzij ma Heródes, xu jek ch'o'oj chiquij jujun creyent. <sup>2</sup> Xu tak u camsaxic i ma Jacóbo ru' ch'ich'; are i ma Jacóbo chi catz qui cha' quib ru' i ma Wan. <sup>3</sup> I ma Heródes, are xrilo chi que quicot i nimak tak aj Israel rumal ile, xu tak 'uri u chapic i ma Pédro. Are 'ij chi xu 'an ire ile, are i nima'ij que i aj Israel chi ca tijaw wi i caxlanwa n-ta cunbal che. <sup>4</sup> Are xchaptaj i ma Pédro, are 'uri i ma Heródes xu tz'apij pa cárcel. Xe u coj cajib tzobaj soldádo chu chajoxic; je cajcaj chu chajoxic jutak ch'ay, chi pa'ij chi cha'ab. Xu ch'ob i ma Heródes, are ca q'uis i nima'ij, cresaj li ma Pédro chiquiwach i winak, man xu ch'ob ire quiqui 'an qui 'atbal tzij i winak che. <sup>5</sup> Rumal-i, i ma Pédro 'o pa cárcel, lic chajtalic. Xui-ri, i jutzobaj creyent n-xqui mayij tu tz'oniche che i Dios puwi; lic ronojel qui c'ux xqui 'ano.

*I relic i ma Pédro pa cárcel rumal i Dios*

<sup>6</sup> I ma Pédro 'o pa cárcel, kus u waram chiquixol i queb soldádo. Ire ximom u 'ab ru' queb carena chi xak yukul chique i soldádo. Xak je queb chic soldádo je tac'al xol uchija, quiqui chajij i cárcel. U ch'obom i ma Heródes cu ya i ma Pédro chiquiwach i winak chucab 'ij. <sup>7</sup> (Maja ca pe u sakiric) xak te'et xwinakir jun ángel re i Kajwal ru' i ma Pédro. I pa cárcel lic xo'on sak rumal. I ángel xu yin pan u c'alc'ax i ma Pédro y xu c'astaj.

—¡Chat walij la! —co'ono.

Are 'uri, xtzak i carena pulew chi 'o che u 'ab i ma Pédro. <sup>8</sup> I ángel xu bij che:

—Cha bajij a pam, y cha cojo a xajab —co'on che.  
Are xu 'an i ma Pédro ile, te'uri xu bij i ángel che:

—Cha cojo a chaquet, y chat terej chwij —xutixic.

<sup>9</sup> I ma Pédro xterej li chirij i ángel, y xel lok. Xu ch'ob ire mok n-katzij taj wach ca tijin chi rilic, mokxa xa cachiq'uic cu bij ire. <sup>10</sup> Xe ic'aw pa je 'o wi i nabe jutzobaj soldádo, te'uri xe ic'aw chic che i ucab tzobaj soldádo. Xe upon che uchibe, lic ch'ich', xui-ri utuquel xu jak rib. Xe 'el lok, y xe bin jubi' che jun be. Te'uri i ángel xu canaj can i ma Pédro utuquel pa be. <sup>11</sup> Are 'uri i ma Pédro xrilo chi katzij wach i ca tijin chi rilic. Xu bij:

—Wo'or xwilo chi katzij ile. I Kajwal u takom li u ángel, tobal we chuwach i ma Heródes xak chiquiwach i nimak takaj Israel, wach qui ch'obom quiqui 'an chwe —co'ono.

<sup>12</sup> Ca tijin chu ch'obic queje ile, xa 'e chi rachoch i ati Mariy, chi u chuch i a-Wan, chi xak a-Márcos ca bix che. Chila qui molom wi quib u q'ual winak, que tijin chu tz'onoxic che i Dios. <sup>13</sup> I ma Pédro xu

c'ojc'a i sawan. Are 'uri xel li jun ali, al-Róde u bi, xol u ta pachinok. <sup>14</sup> Are xu ta u ch'awbal i ma Pédro, xsach u no'oj rumal u quicotic. Xtzalij la, n-xu jak ti sawan. Xa 'e pa'anem chu bixquil chique i je 'o pa ja, chi ma Pédro tac'al chic pa ocbal bic.

<sup>15</sup> Ique xa xqui bij che:

—¡At ch'uj! —xe cha che.

I ali xu bij chi lic katzij are ire. Ique xqui bij chic chi n-are taj:

—Ile xa u ninox —xe cha che.

<sup>16</sup> I ma Pédro n-xu mayij tu c'ojc'axic i sawan. I creyent, are xqui jak uchibe, xquilo chi katzij are ire; lic xe oc 'il che. <sup>17</sup> I ma Pédro xu c'ut ru' u 'ab chi me ch'awic. Te'uri xu bij chique wach i relsaxic xu 'an i Kajwal che, pa cárcel. Xak xu bij chique:

—Chi ya rason che i ma Jacóbo, xak chique i juban creyent—co'ono.

Te'uri xel bic, xa 'e chic che jun tinimit.

<sup>18</sup> Are xpe u sakiric, i soldádo lic que c'achiric; que bisonic man n-ta chic i ma Pédro, n-queta'am taj wach relic xu 'ano. <sup>19</sup> I ma Heródes xu tak u tzucuxic coq'uil, pero n-xqui rik taj. Xu ya quekan 'uri i soldádo, y xu tak qui camsaxic. Te'uri xel i ma Heródes pa Judéa; xa 'e jekel pa tinimit Cesaréa.

### *I u camic i ma Heródes*

<sup>20</sup> Xo'on panok i ma Heródes xpe royal chique i winak aj pa tak tinimit Tíro y Sidon. Rumal-i, ique xqui yijba chiquiwach chi conojel 'is que 'e chuwach i ma Heródes. Ire 'o jun achi ru', nim u patan, ma Blásto u bi. I winak aj Tíro, i aj Sidon xqui bij che i ma Blásto chi cu coj qui tzij chuwach i ma Heródes, chomarsabal quib ru'. 'O u chac chique qui qui chomaj chic quib ru', man chila pu

tinimit i ma Heródes xpe wi wach i quiqui tijo. <sup>21</sup> I ma Heródes xu ch'ic 'uri jun 'ij chique, are quiqui mol quib y quiqui yijba chiquiwach. Are xu rik i 'ij, xu coj u 'u' lic chom y xcubi pu cubibal re u 'atbal tzij. Xu bij 'uri jun nim laj bixquil chiquiwach. <sup>22</sup> I winak, are xqui ta, xe siq'uinic:

—¡Ire-le n-to' ta winak! ¡ile lic jun dios! —que cha.

<sup>23</sup> Xak te'et jun ángel re i Kajwal xu petsaj yobil chirij i ma Heródes, man n-xu bij taj chi xa jun i Dios chi ca majawic quiqui coj u 'ij. Rumal-i, xu 'an che chi xtijaw cumal amol, y xcam rumal.

<sup>24</sup> I u tzij i Kajwal ca tijin u paxic u wach; xa ipa ca tataj wi.

<sup>25</sup> I ma Bernabe i ma Sáulo, are xq'uis i qui chac pa Jerusalen, xe 'el chila, xqui c'am bi i a-Wan cu', chi xak a-Márcos ca bix che.

## 13

*I Dios xe u cha i ma Bernabe i ma Sáulo chu 'onquil u chac*

<sup>1</sup> Che i jutzobaj creyent re i tinimit Antioquía, je 'o jujun ajbil u tzij i Dios, xak je 'o jujun aijtijonel que i creyent: je are i ma Bernabe, i ma Simon chi xak ma 'Ek ca bix che; xak 'o i ma Lúcio chi aj tinimit Ciréne; 'o i ma Manaen (chi xe q'uitsax junam ru' i ma Heródes, chi gobernador pa Galiléa); xak 'o i ma Sáulo. <sup>2</sup> Xu rik jun 'ij, ique que tijin chu cojic u 'ij i Kajwal, co'tam qui wa'im rumal u tz'onoxic che i Dios. Are 'uri i u Tewal i Dios xe u 'ijla:

—Che i jacha i ma Bernabe i ma Sáulo chwe, man 'o jun qui chac quin ya'o —co'ono.

<sup>3</sup> Are xquelej u tz'onoxic che i Dios, xak xq'uis i tiémpo chi co'tam can i qui wa'im, are 'uri xqui ya i qui 'ab piquiwi i ma Bernabe, i ma Sáulo, y xe qui 'ijla bi che qui chac.

*Jun aj'itz xo'on potz' rumal u mac*

<sup>4</sup> Te'uri i ma Bernabe i ma Sáulo xe 'e che qui viáje, je taktal bi rumal u Tewal i Dios. Nabe xe 'e pa tinimit Seléucia. Chila xe oc wi pa bárco, 'enam que c'a pa Chípre, jun ral jyub setel chuwi mar. <sup>5</sup> Are xe upon pa Chípre, xe kaj che i tinimit Salamína, pa que c'un wi i bárco pa mar. Are 'uri xqui jek u bixquil i u tzij i Dios pa tak molbal'ib que i aj Israel winak. Xak i a-Wan xa 'e cu', aj tolque.

<sup>6</sup> Xe bin pa tak tinimit c'a xe upon che i tinimit Páfos, chi 'o chi ya. Chila xqui rik wi jun aj Israel, ma Barjesus u bi, (chi xak ma Elímas ca bix che). I achi-le, aj'itz; ire xa aj t'orонel, cu bij chi ajbil u tzij i Dios péro n-are taj. <sup>7</sup> Ire 'o ru' i gobernador, ma Sérgio Páulo, chi lic 'o u no'ojo. I gobernador xu tak qui siq'uixic i ma Bernabe i ma Sáulo, man craj cu ta u tzij i Dios. <sup>8</sup> I aj'itz xu jek u la'ic u wach i qui tzij i ma Bernabe i ma Sáulo; craj ire chi n-cu coj ti gobernador u tzij i Dios. <sup>9</sup> I ma Sáulo (chi xak ma Pablo ca bix che) lic 'o u Tewal i Dios ru'. Xu maj u takexic i aj'itz; <sup>10</sup> xu bij che:

—¡At t'orонel; lic at mal; at rac'al itzel; at aj ch'o'ojo chirij i 'utz! ¿Wuchac xa ca jech'absaj i sak laj tzij re i Kajwal? <sup>11</sup> Wo'or i Kajwal cat u ya na pa c'ax. Cat potz'ir na; n-cawil ti sak, queb oxib 'ij —co'ono.

Juntir xoc i 'ekum che u ba'wach; pacha pa 'ekum 'o wi. Te'uri xu tzucuj pachin ca ch'elew bic,

man n-ca tzun ta chic. <sup>12</sup> I gobernador, are xril ile, xu coj u tzij i Dios; lic xu bisoj che i c'utunic re i Kajwal.

*I u tzij i ma Páblo xutux cumal i aj Israel re i jyub Pisídia*

<sup>13</sup> I ma Páblo cu' i rachi'il xe 'el pa Páfos; xe oc bi pa bárco, xe 'e c'a pa tinimit Pérge, u cwenta i jyub Panfilia. Xui-ri, i a-Wan (chi xak a-Márcos u bi) n-xa 'e ta cu'; ire xtzalij chic Jerusalen. <sup>14</sup> I juban xe 'el pa Pérge, xe 'e che jun chic Antioquía, chi u cwenta i jyub Pisídia. Are xu rik i 'ij chi uxlambal 'ij, xe oc pa ja re i molbal'ib, y xe cubi chila. <sup>15</sup> Xqui coj retalil are xa 'ajlax u wach i wuj pa tz'ibtal wi i ujer 'atbal tzij xak i qui tzij i ujer ajbil u tzij i Dios. Are xutzin i rajlaxic-le, i caj'atzil i molbal'ib xqui tak u tz'onoxic chique i apostelab:

—Kachalal, mokxa 'o jun tzij quiwaj qui bij, pixbal que i winak. 'Utz qui bij na —xbix chique.

<sup>16</sup> Are 'uri i ma Páblo xwalijic, xu c'ut u 'ab chique chi n-que ch'aw ta chic. Te'uri xu bij chique i winak:

—Ix wach aj Israel, xak yix chi n-ix ta aj Israel chi qui coj u 'ij i Dios, chi ta na pe'. <sup>17</sup> I ka Dios yoj oj aj Israel, xe u cha i katit i ka mam ujer, cu yabej re i 'utz piquiwi. C'a are je 'o pa Egípto, naj che i qui tinimit, i Dios xe u q'uiarsaj, te'uri ru' u cho'ab xe resaj pa jyub Egípto. <sup>18</sup> Are xe 'el pa Egípto, i Dios xu ch'ijo wach i xqui 'ano are xe bin pa jyub tz'inilic cuarénta junab u wach. <sup>19</sup> Xu sach qui wach wukub tinimit, cu yabej re i jyub chique i katit ka mam. Are i jyub-le, are i Canaan. <sup>20</sup> Te'uri, cajib ciénto cincuénta junab u wach, i Dios xu ya

juban aj c'amol\* u tzam chique; ique xqui 'at tzij piquiwi i winak c'a are xic'aw i q'uisbal-re, chi are i nim laj ajbil u tzij i Dios, mam Samuel. <sup>21</sup> Te'uri i katit ka mam n-xcaj ta chic ile, xqui tz'onoj jun qui 'atol tzij piquiwi. I Dios xu ya 'uri chique wach i xqui tz'onoj. Cuarénta junab u wach, 'o jun qui 'atol tzij, ma Saul u bi. I ma Saul-le, u c'ojol i mam Sis; i mam Sis, jun canok chique u muk u xiquin can i mam Benjamin. <sup>22</sup> Xo'on panok, i Dios xresaj i ma Saul che u patan, y xu ya can i ma David pu q'uxel. Xu bij 'uri: "I a-David le, chi u c'ojol i ma Isai, kus cwil yin u c'ux; cu 'an na ire ronojel pacha i cwaj yin." Queje xu bij i Dios ile. <sup>23</sup> Bay, are jun canok chique u muk u xiquin can i mam David-le chi Dios xu cha, tobal ke yoj oj aj Israel, pacha u bim ujer. Ire are i Jesus chi quin bij chiwe wo'or. <sup>24</sup> Are maja cu jek u chac i Jesus, i 'etz ma Wan xoj u pixabaj yoj oj aj Israel, chi caka jalwachij i ka nojbal chi n-us taj, xak ca kajsax ya pakawi. <sup>25</sup> I 'etz ma Wan, are ya mer cu rik i 'ij ca q'uis u c'aslemal, xu bij: "Qui bij yix mok yin ne i toliwe, pero n-yin taj. Ire ca c'un c'a chwijil yin, lic nim ni u 'ij. N-nim ti in 'ij yin chuwach ire, n-ca majaw ta chwe quin 'an mocom che wib chirij, mi tene quin tor u wach u xajab." Queje ile xu bij i 'etz ma Wan.

<sup>26</sup> Ix wachalal, chi ix u muk u xiquin can i mam Abraham, xak yix chi n-ix ti aj Israel chi xak qui coj u 'ij i Dios, chiwe yix, i Dios cu tak i tzij-i, man quiwetamaj wach iwelbal chi sak. <sup>27</sup> I aj Jerusalen winak, xak i caj'atzil ique chi xqui camsaj i Jesus, n-queta'am taj chi ire ru'i Dios petnak wi. N-xqui

---

\* **13:20:** I aj c'amol u tzam-le, "juéces" ca bix chique.

ta ti usuc' i tzij chi cacajlaj pa molbal'ib pa tak uxlambal 'ij. Xe'elok chi je are ique xe 'anaw ile pacha i tz'ibtal can ujer; queje ile xe'elok are xqui tak u camsaxic i Jesus. <sup>28</sup> Ire lic n-tu mac; tupu n-xqui rik tu mac chirij, xqui tz'onoj che i ma Piláto chi cu tak u camsaxic. <sup>29</sup> Are xqui q'uis u 'onquil che, ronojel pacha i tz'ibtal can ujer, te'uri xqui kajsaj li chuwach i cruz y xqui muku. <sup>30</sup> Xui-ri, i Dios xu c'unsaj sak chuwach. <sup>31</sup> Te'uri i Jesus q'ual 'ij xa 'iltaj u wach cumal i u tijoxelab. Je are ique-le chi je rachi'il o'onom lok. Je teren chirij are xu jek u patan pa Galiléa, c'a are 'o wi are xe u q'uisa pa Jerusalen. Y wo'or, je are ique-le que tijin chu bixquil chique i winak wach xu 'an i Jesus.

<sup>32</sup> Wo'or, yoj oj 'o chi, chu bixquil i 'utz laj tzij chiwe, chi are iri: i Dios ca tijin chu 'onquil wach i u bim ujer chique i katit ka mam. <sup>33</sup> Yoj oj qui muk qui xiquin canok; i Dios ca tijin chu 'onquil pacha i u bim chique ique ujer (chi cu c'unsaj sak chuwach i Jesus). Xe'elok pacha cu bij u tzij i Dios tz'ibtal can chupam i wuj Sálmos†. Xu bij: "Yet at in C'ojol; wo'or in yom a c'aslemal." (Queje ile tz'ibtal canok.) <sup>34</sup> I Dios u bim ujer chi cu c'unsaj sak chuwach i Jesus; u bim chi u ch'acul n-ca jar taj, man xu bij chupam u wuj: "Quin ya ni utzil chomal chiwe pacha xin bij che i mam David ujer‡." (Queje ile tz'ibtal canok.) <sup>35</sup> 'O jun chic tzij pa wuj Sálmos cu bij: "Yet n-ca ya ta che, chi ca jar u ch'acul i lo'laj a takon§," co'ono. <sup>36</sup> (Mix sachic, i

---

† **13:33:** I wuj "Sálmos" ca bixic, are juban bix, cojbal re u 'ij i Dios.  
I tzij xu bij waral-i 'o chupam i ucab bix. ‡ **13:34:** Isaías 55:3

§ **13:35:** Sálmo 16:10

tzij-i n-chirij ti mam David tz'ibtal wi; chirij i Jesus tz'ibtal wi.) Katzij, i mam David xcamic are xutzin u patan pacha i u ch'obom i Dios. Xcamic, xmuk chiquixol i ratit u mam, y u ch'acul xjaric. <sup>37</sup> Xui-ri, i Jesus, chi c'astam rumal i Dios, i u ch'acul ire n-xo'on ta mal. <sup>38</sup> Wachalal, 'o u chac chi ta u be chi rumal i Jesus xoj c'un chu bixquil chiwe wach u rikic i cuybal mac. <sup>39</sup> Ni'pa i winak quiqui cuba i qui c'ux che i Jesus, ca cuy ni qui mac rumal. Rumal ire 'o i cuybal mac chi o'onom lok n-cuytajnak ta rumal i 'atbal tzij chi tz'ibtal can rumal i mam Moises. <sup>40</sup> Chi 'ana cwent mi petsaj i royal i Dios piwi, pacha qui tz'ibam can i ajbil u tzij i Dios ujer: \* (I Dios xu bij):

**41** ¡Chiwilape', yix chi ix yo'yanel che in tzij!

Cha sach i nojbal che, cha sachsax i wach rumal i nimak tak 'anic, rumal i nimak tak xibin'ib, quin 'an ni yin, in Dios, che tak i 'ij-i, che tak i ic'-i. N-qui ta ti u be, n-qui coj taj wach i quin 'an na, tupu 'o i ca lapaw chiwe.

(Queje u tzij i Dios ile chi tz'ibtalic, xu bij i ma Páblo chique.)

**42** Te'uri xel i ma Páblo pa molbal'ib junam cu' i rachi'il. I winak chi ne te aj Israel chi calaxic, lic xqui tz'onoj chique chi que c'un chic cu' pa wukub 'ij, chi are tan chic i uxlambal 'ij. Cacaj ni u tayic tan chic i qui tzij. **43** Are xe utzinic, xe 'el li conojel pa molbal'ib, je q'ui xe terej chiquij i ma Páblo i ma Bernabe. Je 'o i aj Israel winak, xak 'o i juban chi ne te aj Israel, xui-ri lic xqui coj u 'ij i Dios junam cu'.

---

\* **13:40:** Habacuc 1:5

I ma Páblo i ma Bernabe xe qui pixabaj chi qui qui jicba qui c'ux che i rutzil u c'ux i Dios.

**44** Che chic i wukub 'ij, xe u rika i 'ij re chic jun ux lambil 'ij. Xqui mol quib laj conojel i winak re i tinimit chu tayic u tzij i Dios. **45** I aj Israel, are xquilo xe moltaj i winak je q'ui, xpe coywal. Xe oc chu la'ic u wach che i ma Páblo, xak xqui yo'ya. **46** I ma Páblo i ma Bernabe, co qui c'ux xqui bij chique:

—'O u chac xka bij u tzij i Dios chiwe yix nabe, ix aj Israel winak. Xui-ri, cakil yoj chi yix n-quiwaj ti qui cojo; cakil yoj chi qui bij yix n-ca majaw ta chiwe we qui rik i c'asle mal chi n-ca q'uis ta chic. Rumal-i coj 'ec; coj 'e cu' i winak ne te aj Israel. **47** Man queje ile xoj u tak i Kajwal chu 'onquil; ire xu bij can i tzij-i:

At in cojom pacha jun 'a' qui quilbej re qui be ni'pa  
i ne te aj Israel;

at in cojom tobal que i winak ronojel u wach i jyub  
ta'aj chu rikic i quelbal chi sak.

(Queje u tzij i Dios ile chi tz'ibtalic<sup>†</sup>, xqui bij i ma Páblo i ma Bernabe chique.)

**48** I ne te aj Israel winak, are xqui ta ile, lic xe quicotic. Xe oc chu bixquil chi u tzij i Kajwal lic 'utz. Are 'uri ni'pa i je chatal rumal i Dios chi qui qui rik qui c'asle mal n-tu q'uisic, ique 'is xqui coj u tzij i Kajwal. **49** Queje ile xu 'an i u tzij i Kajwal, lic xpax u wach che i jyub-le. **50** Xui-ri, i aj Israel xe 'e cu' i nimak qui patan pa tinimit, qui qui coj bej re qui mac i ma Páblo i ma Bernabe. Xak xe 'e cu' juban ixokib 'o qui 'ij chi lic qui yom qui c'ux che i 'atbal tzij tz'ibtal can rumal i mam Moises. 'Is xe

---

† **13:47:** Isaías 42:6 v 49:6

oc 'uri chi ch'o'oj chiquij i ma Pábilo i ma Bernabe, y xe quesaj bi che i jyub-le. <sup>51</sup> Ique, are xe 'el chila xqui su can i ulew che i cakan, c'utbal re chique chi c'ó can i qui mac chiquij. Te'uri xe 'e che i tinimit Icónio. <sup>52</sup> Xui-ri, i creyent chi je 'o pa Antioquía, lic que quicotic rumal i Kajwal; xak i u Tewal i Dios lic 'o cu'.

## 14

### *Xpe ch'o'oj chiquij i ma Pábilo i ma Bernabe pa Icónio*

<sup>1</sup> I ma Pábilo i ma Bernabe, are xe upon che i tinimit Icónio, xe oc pa molbal'ib que i aj Israel. Lic 'utz u bixquil u tzij i Dios xqui 'ano, rumali je q'ui aj Israel xqui coj u tzij i Kajwal, xak je q'ui i ne te aj Israel xqui cojo. <sup>2</sup> Xui-ri, i aj Israel chi n-xqui coj taj, xe oc chi qui tunic i ne te aj Israel winak; xqui 'an chique chi tzel que quil i creyent. <sup>3</sup> Rumal-i i ma Pábilo i ma Bernabe xe najtin pa tinimit Icónio; co qui c'ux xe c'utunic, lic cul qui c'ux che i Kajwal. I Dios xu c'ut chiquiwach i winak chi lic katzij wach i xqui bij, chi nim i utzil chomal re i Kajwal; man xu ya piqui'ab qui qui 'an i milágro, xak i nimak tak 'anic chiquiwach i winak. <sup>4</sup> I winak re i tinimit qui 'anom queb che qui wach: 'o i qui yom qui wach cu' i aj Israel, xak 'o i qui yom qui wach cu' i apostelab. <sup>5</sup> Xe'elok 'o i aj Israel, junam cu' i ne te aj Israel xe 'e cu' i qui wi qui jolom, y xqui yac ch'o'oj chiquij i ma Pábilo i ma Bernabe. Xqui nuc' chiquiwach chi que 'e chiquij xak que qui c'ak che abaj, xqui ch'ob ique. <sup>6</sup> Xui-ri, i ma Pábilo i ma Bernabe, are xqui ta rason wach i qui nuc'um, xe 'el chila; xe 'e c'a

pa tinimit Lístra, xak i tinimit Dérbe; i queb-le, u cwenta i jyub Licaónia; xak xe 'e che i jyub chirij chuwach. <sup>7</sup> Xak chila xqui bij wi wach i 'elbal chi sak rumal i Jesucristo.

*Laj xqui camsaj i ma Páblo pa Lístra*

<sup>8</sup> Pa tinimit Lístra, 'o jun achi chi n-ca bin taj. Ire clis chi ralaxic, mi xa ta jub'i bin-nak. <sup>9</sup> Ire ca tijin chu tayic wach cu bij i ma Páblo. I ma Páblo xu takej i achi, xrilo chi lic 'o u cubibal u c'ux, rumali ca tiqui chi rutzirsaxic. <sup>10</sup> Are 'uri, i ma Páblo co xch'aw che:

—Chat tac'al 'anok suc'ulic —co'on che.

I achi xsac'canic xel chicaj y xtaq'ui 'anok; te'uri xu jek binic. <sup>11</sup> I winak, are xquilo wach i milágro xu 'an i ma Páblo, xe oc chi sic':

—¡Je dios je kajnak li ku' yoj! ¡Ique-le je dios pacha que tzun achiab! (Queje ile xqui bij pa qui ch'awbal i aj Licaónia.)

<sup>12</sup> Xqui bij chi ma Bernabe are i dios Júpiter\*; xak xqui bij chi ma Páblo are i dios Mercúrio<sup>14.12</sup>, man xch'aw chiquiwach i winak. (I dios Mercúrio qui qui bij che, aj ch'awel, que cha.) <sup>13</sup> I winak le 'o i rachoch i qui dios Júpiter tzamja pa ocbal bic. I sacerdóte re i dios-le xe u c'am li torib xak juban cotz'ij, cojbal re qui 'ij i ma Bernabe i ma Páblo. Craj ire, xak cacaj i winak, qui qui camsaj i torib chiquiwach ique pacha je dios. <sup>14</sup> I ma Páblo i ma Bernabe, are xquilo wach xe oc i winak chu 'onquil, ique xqui jek u rakch'ixic i qui 'u' ('ilbal re chi n-'us ti que tijin i winak chu 'anic). Juntir xe oc chiquixol i winak; que siq'uinic xqui bij:

---

\* **14:12:** I Júpiter i Mercúrio are qui bi queb ch'umil; xqui bij i winak chi je dios.

**15** —¡Achiab! ¿Wuchac queje qui 'an ile? Yoj xa oj winak pacha yix. Naj oj petnak wi, col ka bij chiwe chi 'o u chac qui mayij u 'onquil tak ile. Ille n-tu chac, n-tusuc'. Xol ka bij chiwe chi xui che i Dios c'aslic chi cojo u 'ij. Are ire 'anawnak i caj, i jyub, i mar. Are ire 'anawnak wach tak i 'o chicaj, wach tak i 'o chuwach i jyub ta'aj, wach tak i 'o pa mar.

**16** Ujer canok, i Dios u yom chique i winak wach tak i cacaj quiqui 'ano, wach tak i cacaj quiqui ch'obo.

**17** Xui-ri, nic are wi, ire xu 'an i 'utz i chom chique, c'utbal-re chique wach ruxic ire. Cu ya li ka jab, cu ya ka ticon; cu ya chake wach caka tijo, cu ya chake wach coj quicot ru' —xu bij i ma Páblo chique i winak.

**18** Tupu xu bij ire ile, xak pachalo xtiqui chi qui 'atxic i winak. Lic cacaj quiqui camsaj i torib, cojbal qui 'ij i ma Páblo, i ma Bernabe.

**19** Are 'uri xe c'un jujun aj Israel winak re i tinimit Antioquía, xak re i tinimit Icónio, col qui tunu i winak chi je 'o pa Lístra. Te'uri 'is xqui coj abaj che i ma Páblo y laj xqui camsaj. Xqui ch'ob ique chi ire ya xcamic, rumal-i xqui jucuquej bi tzam tinimit.

**20** Te'uri i creyent xqui mol quib chirij chuwach i ma Páblo; are 'uri ire xwalijic y xoc chubi pa tinimit. Chucab 'ij, junam xe 'e ru' i ma Bernabe pa tinimit Dérbe.

**21** Are xe upon pa Dérbe, xqui bij chique i winak wach i quelbal chi sak u yibam i Dios. Je q'ui xqui ya quib pu'ab i Crísto rumal qui pixbanic. Te'uri xe tzalij chalok, xe ic'aw chic pa Lístra, pa Icónio, xak pa Antioquía.

**22** Xe 'e qui ya u cowil qui c'ux i creyent pa tak tinimit-le, xe 'e qui bij chique chi miqui sach u cubibal qui c'ux che i Kajwal. “Man

'o u chac caka ch'ij u q'uial c'ax, we cakaj coj oc pa cu 'at wi tzij i Dios. Xui-ri, ma ba'crij i c'ux," xqui bij chique. <sup>23</sup> Te'uri xe qui cha juban nimak tak mam'ib, y xe qui ya can piquiwi i jutak tzobaj creyent. Xco'taj i qui wa'im, xqui tz'onoj che i Dios piquiwi i kachalal; xqui tz'onoj che chi que u chajij ni'pa i qui jachom quib pu'ab.

*Qui chac i ma Páblo, i ma Bernabe pa Antioquía re i jyub Síria*

<sup>24</sup> Xe ic'aw pa tak jyub re i Pisídia, y xe upon pa jyub u cwenta i Panfilia. <sup>25</sup> Xqui paxsaj u tzij i Dios pa tinimit Pérga, te'uri xe 'e pa tinimit Atália. <sup>26</sup> Te'uri xe oc pa bárco y xe tzalij chic pa i je 'elnak wi, chi are i tinimit Antioquía. Are i creyent aj Antioquía chi qui jachom i ma Páblo i ma Bernabe che u chac i Dios; qui tz'onom che, chi que u to ru' qui chac. I chac-le ya xq'uisic, y xe tzalijic. <sup>27</sup> Are xe upon pa tinimit, xe qui mol qui chi' i creyent, y xe oc chu bixquil wach i qui to'ic u 'anom i Dios chique. Xqui bij chique chi i Kajwal je u tom i ne te aj Israel, man xak ique qui qui ta u be y qui qui rik u cubibal qui c'ux che. <sup>28</sup> Te'uri i ma Páblo i ma Bernabe xe najtin chila cu' i creyent pa tinimit Antioquía.

## 15

*I ma Páblo qui qui mol quib cu' i que uc'aw u tzam i creyent pa Jerusalen*

<sup>1</sup> Che tak i 'ij-le, je 'o jujun achiab je petnak Judéa; xe upon pa tinimit Antioquía y xe oc chu c'utic chique i creyent chi 'o u chac ca 'ani i retal circuncision che i qui ch'acul. Xui queje ile que

totaj rumal i Dios, xqui bij ique. 'O u chac quiqui 'an ni ile pacha u bim can i mam Moises, xqui bij.

<sup>2</sup> I ma Páblo i ma Bernabe xe oc chu chapic quib chi tzij cu' ique. Rumal 'uri i jutzobaj creyent xe qui cha i ma Páblo i ma Bernabe cu' juban chic achiab, y xe qui tak bi pa Jerusalen. Cacaj ique que 'e chu tz'onoxic chique i apostelab, xak i nimak tak mam'ib we 'o u chac ca 'an ni retal circuncision che i qui ch'acul i creyent.

<sup>3</sup> I jutzobaj creyent pa Antioquía xe qui to bi che i qui viáje. I comision-le, are xe 'ec xe ic'aw pa jyub u cwenta i Fenícia, xak i jyub u cwenta i Samaría. Xqui bij chique i tak jutzobaj creyent chila chi je q'ui i ne te aj Israel winak xak qui jachom quib pu'ab i Dios. Are xqui ta ile, lic xe quicotic.

<sup>4</sup> I ma Páblo i ma Bernabe, are xe upon pa Jerusalen, xe c'ulax cumal i creyent, xak cumal i apostelab, xak i nimak tak mam'ib. Xqui lap ronojel ni'pa i u 'anom i Dios chique (chi je q'ui i ne te aj Israel winak qui jachom quib pu'ab i Kajwal).

<sup>5</sup> Xui-ri, jujun aj Fariséo winak chi je creyent chic, xe taq'ui 'anok y xqui bij:

—I ne te aj Israel chi qui yom qui wach ku', 'o u chac coc i retal que i aj Israel che i qui ch'acul. Xak 'o u chac quiqui 'an na pacha i cu bij i 'atbal tzij tz'ibtal can rumal i mam Moises ujer —xe cha.

<sup>6</sup> Te'uri i apostelab xqui 'an jun nuc'bal t'isbal cu' i nimak tak mam'ib, chu ch'obic wach i quiqui bij chique i je c'un-nak. <sup>7</sup> Naj xe lapan chiquiwach; are 'uri i ma Pédro xtaq'ui 'anok y xu bij chique:

—Wachalal, iwilom yix chi o'onom lok i Dios in u chom yin chixol yix chi quin bij u tzij chique i ne te aj Israel, wach i quelbal chupam i qui mac. Craji

Dios chi xak ique quiqui coj u tzij ire. <sup>8</sup> Ire reta'am wach 'o piqui c'ux i winak chi qui jujunal (reta'am we je re ire piqui c'ux). U 'alijinsam chake chi xak que u c'ulaj i ne te aj Israel winak ru', man u yom u Tewal chique xak jun ru' pacha u yom chake yoj. <sup>9</sup> Ire xu ch'aj i canima ique rumal u cubibal qui c'ux che; queje pacha u 'anom chake yoj, xak queje xu 'an chique ique; xak jun kilic u 'anom. <sup>10</sup> ¿Wuchac 'uri quiwaj qui yoj wach u 'anom i Dios? ¿Wuchac quiwaj qui 'an pen chique chi quiqui 'an pacha cu bij i ujer 'atbal tzij? ¿Wuchac qui ya ekan chiquikul, chi me tene yoj caka ch'ijo, xak mi tene i katit ka mam? <sup>11</sup> Ile n-tusuc'. Keta'am yoj, oj 'elnak chi sak xa rumal utzil chomal re i Kajwal Jesus; xak queje ique —xu bij i ma Pédro chique.

<sup>12</sup> Conojel ni'pa i je 'o chila n-xe ch'aw ta chic. Te'uri xe oc chu cojic retalil che i qui tzij i ma Bernabe i ma Pablo. Xqui ta ni'pa i milágro, ni'pa i nimak tak 'anic xu 'an i Dios chique i ne te aj Israel winak, c'utbal-re chi ire 'o cu' i ma Pablo i ma Bernabe. <sup>13</sup> Are xe utzin ique chi ch'a'atic, i mam Jacóbo xu bij jun tzij:

—Wachalal, chitape', <sup>14</sup> i ma Simon Pédro ya xu lap chake chi Dios u jekom cuc'axic i ne te aj Israel winak; ya xu jek qui chayic chiquixol ique ni'pa i que 'el na, je re ire. <sup>15</sup> I u 'anom-le xak jun xe'el ru' i tzij pacha tz'ibtal can cumal i je ajbil u tzij i Dios ujer. Qui tz'ibam can i tzij-i chi xu bij i Dios:

**16** Co'on panok, que in to tan chic i aj Israel winak\*; quin coj tan chic pa qui 'atol tzij jun u muk u xiquin i mam David.

Quin yijba tan chic wach i wulijnak; quin yac tan chic wach i tzaknak.

**17** Queje ile quin 'ano, man conojel i winak chi majá quin qui cojo, quin qui tzucuj na.

Xak queje i ne te aj Israel chi qui qui jach na quib pin'ab, y qui qui cuxtaj in bi<sup>15.17</sup>.

**18** Queje ile cu bij i Kajwal, ire chi 'ax u 'alijinsam wi chake wach tak i cakil na.

(Queje ile tz'ibtal canok, xu bij i ma Jacóbo; te'uri xu bij:)

**19** Rumal 'uri, quin bij yin, i ne te aj Israel winak we ya xqui jalwachij i qui nojbal chi n'-us taj, y xe terej chirij i Dios, n-ta 'atbal tzij 'uri caka ya piquiwi. **20** Xui caka tak bi jun wuj chique, yabal qui no'oij. Caka tz'ibaj bi chique chi miqui tij ti'ij sujtal chuwach tiox; xak miqui kajsaj qui 'ij cu' i n-cachi'il ta quib. Xak caka tz'ibaj bi chique chi miqui tij u ti'ijlal chicop chi to' qui jitz'am; xak miqui tij quic'. **21** Queje ile caka tz'ibaj chique, man i 'atbal tzij tz'ibtal can rumal i mam Moises, 'ax ca ajlax wi pa tak molbal'ib que i tinimit pa tak uxlambal 'ij chique i aj Israel winak. (N-cakaj ta caka petsaj coywal i creyent chi je aj Israel.)

(Queje xu bij i mam Jacóbo ile chique.)

\* **15:16:** 15:16-17 I mer tzij xu bij are iri: We xic'aw iri, te'uri quin tzalij chic, y quin yac tan chic i cárpá chi tzaknak; quin yac tan chic i ch'akatak chi canajnak canok y quin yijba tan chic, man xak i juban winak qui qui tzucuj ni Kajwal, ni'pa i ne te aj Israel winak, ique chi xcuxtax in bi piquiwi. Amos 9:11-12, Jeremías 12:15.

<sup>22</sup> Te'uri i apostelab, xak i nimak tak mam'ib cu' conojel i creyent, xe oc chu ch'obic wach quiqui 'ano. Xe qui cha queb cachi'il, que qui tak bi cu' i ma Páblo i ma Bernabe che i tinimit Antioquía. I queb-le je are i ma Sílas, xak i ma Júdas (chi xak ma Barsabas quiqui bij che). Che queb achiab 'o qui 'ij chiquixol i cachi'il. <sup>23</sup> Xqui c'am bi i wuj chi tz'ibal cumal i nuc'bal t'isbal. Queje iri cu bij:

"Yoj chi oj apostelab, xak i nimak tak mam'ib aj waral, xak i juban iwachalal waral Jerusalen, caka ya pan rutzil i wach yix ix kachalal. Tupu n-ix ti aj Israel winak, ix kachalal chic; caka tak bi i wuj-i chiwe yix, ix aj Antioquía, ix aj Síria, xak ix aj Cilicia. <sup>24</sup> Yoj xka ta rason chi xe 'el jujun aj waral, xix 'e qui xibij na, xak xix qui c'achirsaj na. Xqui bij ique chi 'o u chac coc i retal circumcision che i ch'acul yix, xak xqui bij chi 'o u chac qui 'an pacha i ujer 'atbal tzij. Xui-ri, yoj n-ta je ka takom bi chu bixquil ile chiwe. <sup>25</sup> Rumal-i, junam ka wach xe ka cha bi jujun kachalal chi quix 'e quila. Que 'e junam cu' i ma Páblo i ma Bernabe, chi lic c'ax que ka na'o. <sup>26</sup> Ique lic je 'o chuwach i camic rumal u tzij i Kajwal Jesucristo. <sup>27</sup> Rumal ile chi xka nuc'u, que ka tak bi i ma Júdas i ma Sílas iwu', chu bixquil chiwe wach ka nuc'um. <sup>28</sup> I u Tewal i Dios n-craj ta cu ya mas 'atbal tzij piwi, xak yoj n-cakaj taj. Xui queb oxib tzij caka bij chiwe, are iri: <sup>29</sup> Mi tij i ti'ij chi xa camsam rumal u 'ij jun tiox; xak mi tij i quic'; xak mi tij i chicop chi to' je jitz'am. Jun achi, jun ixok, miqui kajsaj qui 'ij chiquiwach, we n-cachi'il ta quib. Yix, we qui 'an cas che i tzij-le, 'utz i qui 'ano. Xui ile i ka tzij chiwe. Chiwila iwib." (Queje ile tz'ibal chuwach i wuj chi xqui c'am bic.)

<sup>30</sup> I xe c'amaw bi i wuj, xqui maj qui be, y xe 'e pa Antioquía. Are xe uponic, xe qui siq'uij i creyent. Are qui molom chic quib, xqui jach i wuj chique. <sup>31</sup> Te'uri i creyent xcajalaj u wach i wuj; lic xe quicotic wach i bital bi chique. I tzij-le lic xu cubsaj qui c'ux. <sup>32</sup> I ma Júdas i ma Sílas xak je ajbil u tzij i Dios, man u yom i Dios chique qui qui ta usuc' wach u 'aljinsam ire chique y qui qui bij chique i juban creyent. Rumal-i, naj xe lapan cu', cowirsabal re qui c'ux, xak jicsabal re qui c'ux che i Dios. <sup>33</sup> Xe najtin chila, te'uri i creyent xe qui 'ijla chalok; xqui tz'onoj i 'utz re i Dios piquiwi, man que tzalij chic cu' i je takawnak bic. <sup>34</sup> Xui-ri, i ma Sílas xu ch'obo chi 'utz ca canajic. <sup>35</sup> Xak i ma Páblo i ma Bernabe xe canaj ru' pa Antioquía. Junam cu' u q'uial cachi'il, que tijin chu c'utic u tzij i Kajwal, xak chu paxsaxic u tzij.

*Ima Páblo cu jek tan chic qui solixic i jutak tzobaj  
creyent*

<sup>36</sup> Xo'on panok, i ma Páblo xu bij che i ma Bernabe:

—'Utz coj 'e chic pa tak tinimit pa i ka bim wi can u tzij i Kajwal; que 'e kila wach qui 'anom i creyent —xu bij.

<sup>37</sup> I ma Bernabe craj cu c'am bi i a-Wan cu', chi xak a-Márcos qui qui bij che. <sup>38</sup> I ma Páblo n-craj taj chi qui qui c'am bic, man xc'un chu c'ux chi ire je ro'tam canok are je 'o pa jyub Panfilia; i ma Wan Márcos-le xro'taj can i chac cu'. <sup>39</sup> Xqui chap quib chi tzij rumal. Xe'elok xa xqui jach qui wach; i ma Bernabe xu c'am bi i a-Márcos, xe oc bi pa bárco, y xe 'e pa Chípre. <sup>40</sup> I ma Páblo xu cha i ma Sílas

rachi'il. I creyent xqui tz'onoj i utzil chomal re i Dios piquiwi, te'uri xqui maj qui be. <sup>41</sup> Xe 'e bin pa jyub Síria, xak xe ic'aw pa jyub Cilícia, que tijin chu ya'ic u cowil qui c'ux i kachalal pa tak tzobajil re i Dios pa i que ic'aw wi.

## 16

### *I a-Timotéo ca 'e cu' i ma Páblo i ma Sílas*

<sup>1</sup> I ma Páblo i ma Sílas xe upon che i queb tinimit, Dérbe y Lístra. Pa Lístra xqui rik wi jun creyent u bi a-Timotéo. Ire, rac'al jun ixok creyent, aj Israel winak; xui-ri, i u kajaw i achi-le, aj Griégo winak. <sup>2</sup> Ni'pa i creyent pa tinimit Lístra, xak i je 'o pa tinimit Icónio, quiqui bij chi 'utz laj achi i a-Timotéo. <sup>3</sup> I ma Páblo craj cu c'am bi i a-Timotéo ru'. Rumal-i, xqui 'an i retal circuncision che u ch'acul, man ca c'ulax cumal i aj Israel winak xa ipa que ic'aw wi. I aj Israel winak, 'is queta'am chi u kajaw ire aj Griégo winak (y n-quiqui c'ulaj ta cu' we n'-antal ti circuncision che). <sup>4</sup> Are xe ic'aw pa tak tinimit, xqui bij chique i creyent wach qui nuc'um, wach qui bim i apostelab, junam cu' i nimak tak mam'ib pa Jerusalen. Xqui bij chique chi 'o u chac quiqui 'an cas wach i qui bim bic. <sup>5</sup> Rumal i qui solinic ique-le, i tzobajil creyent mas xjiqui qui c'ux che i Dios. N-xui ta la ile, 'ij 'ij ca tijin qui q'uiaric.

### *I ma Páblo crachic'aj u wach jun aj Macedonia*

<sup>6</sup> I u Tewal i Dios n-xu ya ta chique xe oc pa jyub Asia chu bixquil u tzij i Dios chila. Rumal-i, xe ic'aw pa jyub Frígia, xak xe ic'aw pa jyub Galácia, <sup>7</sup> y xe upon pa mojon re i jyub Mísia. Quiqui ch'obo

chi que 'ax pa jyub Bitínia, xui-ri, i u Tewal i Jesus n-xu ya ta chique chi que oquic. <sup>8</sup> Are u 'onquil 'uri n-xe oc ta pa Mísia, xa xe ic'aw suc'ulic. Xe kaj pa tinimit Tróas chu chi' i mar. <sup>9</sup> Chila, i ma Páblo xrachic'aj pu waram cha'ab; xrachic'aj u wach jun achi aj pa jyub Macedónia, aj ch'aka mar. I achi-le, tac'al chuwach, cu bij che: “¡Sa'aj! Chat 'ax li ku' yoj oj aj Macedónia; choj ol a to,” cutixic, xril ire. <sup>10</sup> Are xrachic'aj i ma Páblo ile, juntir xka yijba kib, 'enam-ke pa Macedónia. Lic keta'am chi Dios xoj u siq'uij bi chila chu bixquil chique wach i 'elbal chupam i qui mac.

*Wach ixqui c'ulmaj i ma Páblo i ma Sílas pa Filípos*

<sup>11</sup> Te'uri xoj oc bi pa bárco, y xoj 'el pa tinimit Tróas. I bárco 'enam re suc'ulic c'a che jun ral jyub setel pa nic'aj mar; i jyub-le u bi Samotrácia. Chucab 'ij, xoj 'e pa bárco c'a pa tinimit Neápolis, u cwenta i Macedónia. <sup>12</sup> Te'uri xoj 'e pa tinimit Filípos chi xak u cwenta i jyub Macedónia; chila je jekel wi je q'ui aj Róma winak. I tinimit Filípos mas 'o u 'ij chiquiwach i ni'pa i tinimit chirij chuwach. Xoj q'uiji q'uial 'ij chila. <sup>13</sup> Pa uxlambal 'ij, xoj 'el tzamja re i tinimit, caka tzucuj pa quiqui mol wi quib i aj Israel chu tz'onoxic che i Dios. Xoj upon chu chi' jun ya y xka rik i molbal'ib, pa qui molom wi quib juban ixokib. Xoj cubi cu' y xka bij chique wach u patan i Jesucrístico. <sup>14</sup> O jun chique ati Lídia ubi. I ixok-i, aj tinimit Tiatíra, aj c'ay chomik laj tak c'ul, lic pakal rajil\*. Ire ca tijin chu tayquil wach ca bixic, man 'ax cu coj wi u 'ij i Dios. I Dios xch'aw

---

\* **16:14:** I c'ul chi cu c'ayij, cakcoj ca tzunic, lic pakal rajil.

'uri pa ranima chi cu coj retalil che wach i cu bij i ma Páblo. <sup>15</sup> Te'uri xu tz'onoj u kajsaxic ya puwi, y xkajsax ya puwi ire xak piquiwi conojel ni'pa i je 'o ru' ja. Te'uri xu bij chake:

—We yix qui na piwanima chi yin in cojom u tzij i Kajwal, chix pet ku', y quix canaj chi kachoch —xu bij chake.

N-xu ya ta chake coj petic, xu 'an pen chake chi coj canaj cu' ru' ja. <sup>16</sup> Xo'on panok, are xoj 'e chic pa qui qui mol wi quib i winak chu tz'onoxic che i Dios, xka c'ulaj jun ali chi 'o itzel tew che. Rumal i itzel tew-le, i ali ca nanic. Je 'o u patron, pero n-qui qui toj taj, tupu q'ui i mer qui qui ch'ac chirij, rumal u nanic. <sup>17</sup> I ali-le xoj u terbej, ca siq'uin chu bixquil i tzij-i:

—I achiab-le je u takon i Dios chi 'Atz u 'Ij, col qui bij chiwe wach iwelbal chi sak —co'on i ali. <sup>18</sup> 'Ij 'ij queje ile xu 'ano; i ma Páblo lic xrix u c'ux che. Are 'uri xu pisquilij rib y xu 'ijla i itzel tew chi 'o che i ali. Xu bij:

—Rumal u cho'ab i Jesucrístico chi 'o wu', quin bij chawé jchawo'taj can i ali-le, y jat! —xu bij.

I itzel tew juntir xro'taj canok. <sup>19</sup> I rajaw i ali xquil 'uri chi n-ta chic mer qui qui ch'ac che. Rumal 'uri xe qui chap i ma Páblo i ma Sílas y xe qui c'am bi chiquiwach i 'atbal tzij. <sup>20</sup> Xe 'e qui ya chiquiwach i juez y xqui bij:

—I achiab-i je aj Israel winak, y xa que qui ch'ujersaj i winak pa ka tinimit. <sup>21</sup> Junwi i c'utunic col qui c'utu chake; n'-us taj coj naw che, man yoj oj aj Róma winak —xe cha.

<sup>22</sup> Are 'uri i winak xpe coywal y xe 'e chiquij i ma Páblo i ma Sílas. Te'uri i juez xqui tak i relsaxic qui 'u', y xqui tak qui ch'ayic ru' u 'ab che'. <sup>23</sup> Q'ui i qui lo'xic xqui ya'o, te'uri xe qui c'am bic y xe qui tz'apij pa cárcel. Xqui bij che i aj chajil cárcel chi lic 'utz i qui chajixic cu 'ano. <sup>24</sup> I aj chajil cárcel are xya' u mantar, xe u tz'apij c'a pa q'uisbal re i cárcel. Chila xu coj wi can i cakan pa che', man n-que bin ta chic.

<sup>25</sup> I ma Páblo i ma Sílas colo tiq'uil a'ab que tijin chu tz'onoxic che i Dios, xak quiqui bixaj u 'ij i Dios. I juban chic winak chi je tz'apil chila que tijin chu tayic. <sup>26</sup> Xak te'et xc'un jun nim laj ucabrakan, xu silabsaj u cubibal i cárcel. Are 'uri ni'pa i uchija xjaktaj utuquel, xak i carena, i che' chi 'o che i cakan xel chique ni'pa i je tz'apilic. <sup>27</sup> I aj chajinel, are xc'un sak chuwach, xrilo chi jaktajnak i cárcel. Cu bij ire chi ni'pa i je tz'apilic 'is je 'anmajnak chubic, rumal-i xresaj li u ch'ich' cu camsaj rib cu bij ire. <sup>28</sup> Are 'uri i ma Páblo xsiq'uin che:

—Ma 'an c'ax che awib, man konojel 'is oj 'o chi —xu bij che.

<sup>29</sup> I aj chajinel xu tz'on-la chi ca tzij i 'a'; pa'anem xoc bic y xuqui chi cakan i ma Páblo i ma Sílas, lic ca sicsat rumal u xibriquil. <sup>30</sup> Juntir xe resaj lok y xu tz'onoj chique:

—Nimak tak winak, ¿wach i quin 'ano quin el chupam in mac? —co'ono.

<sup>31</sup> —Cha cuba a c'ux che i Kajwal Jesucristo y cat el 'uri chupam a mac, xak i awixokil i awac'al, y ni'pa i je 'o chi awachoch —xqui bij che.

<sup>32</sup> Te'uri xqui c'ut u tzij i Kajwal che, xak chique conojel ni'pa i je aj pa rachoch. <sup>33</sup> Are 'uri, c'a

cha'ab, i aj chajinel xoc chu ch'ajic pa i soctal wi chique. Te'uri xkajsax ya puwi achi, xak piquiwi i je aj pa rachoch. <sup>34</sup>Xe u c'am bi i ma Páblo i ma Sílas chi rachoch y xe u tzuku. I aj chajinel, xak conojel i je 'o chi rachoch lic que quicotic rumal u cubibal qui c'ux che i Dios.

<sup>35</sup>Chucab 'ij, i juez xe qui tak bi jujun policía ru' i aj chajil cárcel, xol qui bij chi que o'tax bi i ma Páblo i ma Sílas. <sup>36</sup>Are 'uri, ire xu bij che i ma Páblo:

—I juez xqui tak li rason wu' chi quix wo'taj bic; qui qui ya chiwe chi quix 'ec, n-ta pen —xu bij chique.

<sup>37</sup>Xui-ri, i ma Páblo xu bij chique i policía:

—N-coj 'e taj man n'-us ti xqui 'an chake. Yoj oj cach aj tinimit Róma, pero xoj qui ch'ay chiqui-wach i winak y xoj qui tz'apij pa cárcel. N-ta 'atbal tzij xqui 'an chake pacha usuc', y wo'or cacaj coj co'taj ali'al. Ile n-ca majaw taj; che pet i juez, choj ol quesaj —xu bij.

<sup>38</sup>I policía xe 'e qui bij chique i juez. Ique, are xqui ta chi i ma Páblo i ma Sílas je aj Róma, xqui xij quib. <sup>39</sup>Rumal-i xe 'e cu'y xqui tz'onoj cuybal mac chique. Te'uri xe quesaj bi i ma Páblo i ma Sílas. Xqui tz'onoj pawor chique chi que 'el pa tinimit. <sup>40</sup>Are xe 'el pa cárcel, xe 'e chi rachoch i ati Lídia, pa je 'o wi i creyent. Xqui ya can u cowil qui c'ux, te'uri xe 'ec.

## 17

### *Wach i qui ch'ujeric i winak pa Tesalónica*

<sup>1</sup>I ma Páblo i ma Sílas, are xqui maj qui be, xe ic'aw pa tinimit Anfípolis, xak xe ic'aw pa tinimit Apolónia, te'uri xe upon pa tinimit Tesalónica.

Chila 'o wi jun ja pa quiqui mol wi quib i aj Israel winak. <sup>2</sup> I ma Páblo, 'ax co'on wi, are ca c'un i uxlambal 'ij, xa 'e pa ja re i molbal'ib. Xak queje xu 'an ile pa tinimit Tesalónica. Pa tak uxlambal 'ij xupon pa molbal'ib; oxmul xu 'ano man que u pixabaj i aj Israel winak. <sup>3</sup> Xu 'alijinsaj chique wach i c'ut-tal can chupam u wuj i Dios, chi i Tolque coy'em, 'o u chac cu tij ni uyej y ca cam na, te'uri ca walij tan chic. Pa q'uisbal-re xu bij chique:

—I Toliwe-le chi bital na, are i achi Jesus chi quin tijin chu bixquil chiwe —xu bij.

<sup>4</sup> Je 'o jujun chique i aj Israel winak xqui cojo wach i xqui bij, y xqui ya qui wach cu' i ma Páblo i ma Sílas. Xak je q'ui i aj Griégo winak chi 'ax qui qui 'an wi qui qui coj u 'ij i Dios, xak xqui ya qui wach cu'. Xak queje xqui 'an je q'ui ixokib chi 'o qui 'ij pa tinimit. <sup>5</sup> Xui-ri, je 'o juban aj Israel winak chi n-cacaj ta qui qui cojo; xpe coywal che chi xe oc i juban cu'. Rumal-i, xqui mol qui chi' jujun achiab chi ne te 'utz, xak to' que percat pa tak be; xe qui c'am bi cu' chi qui ch'ujersaxic i winak y xe oc chu 'anic ch'o'oj pa tak be. Xe 'e qui mina quib pa rachoch jun achi, ma Jason u bi, tzucbal que i ma Páblo i ma Sílas xqui 'ano. Cacaj ique que qui jach piqui'ab i winak. <sup>6</sup> N-xe qui rik taj, rumal-i xqui charej bi i ma Jason, junam cu' juban chic creyent chi je 'o ru', y xe qui c'am bi chuwach i 'atbal tzij. Xe siq'uin chu bixquil i tzij-i:

—I achiab-i que tijin chu c'utic i n-'us taj chique i winak ronojel u wach i jyub ta'aj, y wo'or je c'un-nak chu c'utic waral. <sup>7</sup> Xak i ma Jason-i je u c'ulam ru' chi rachoch. Conojel ique qui qui kel i ka 'atol

tzij, man quiqui bij chi 'o chic jun chic 'atol tzij, ma Jesus u bi, que cha. (Queje xqui bij i winak ile.)

<sup>8</sup> I winak, xak i aj patanib re i 'atbal tzij, are xqui ta i tzij-le, pacha xe ch'ujer rumal. <sup>9</sup> Te'uri i je aj patanib xqui bij che i ma Jason junam cu' i rachi'il, chi que tojon na; ique xqui tojo, te'uri xe o'tax bic.

*Iwinak aj Beréa lic xqui coj retalil che i u tzij i ma Páblo*

<sup>10</sup> Are xoc a'ab, i creyent xqui 'an pen chique i ma Páblo i ma Sílas chi que 'el che i tinimit-le, que 'e c'a che i tinimit Beréa. Are xe upon chila xe 'e pa molbal'ib que i aj Israel winak. <sup>11</sup> I winak chila mas je 'utz chiquiwach i je aj Tesalónica pa i je 'anmajnak wi. Que quicotic, lic xqui coj retalil wach i xbix chique. N-xui ta la ile, 'ij 'ij cacajlaj u wuj i Dios, quiqui tabej-re we katzij wach i xu bij i ma Páblo. <sup>12</sup> Je q'ui i aj Israel chila xqui cuba qui c'ux che i Jesus, xak je q'ui chique i aj Griégo. N-xui ti achiab xqui cojo, xak queje ixokib chi 'o qui 'ij pa tinimit. <sup>13</sup> Xui-ri, i je aj Israel winak pa Tesalónica, are xqui ta rason chi ma Páblo xak ca tjin chu c'utic u tzij i Dios pa tinimit Beréa, ique xe 'e c'a chila y xe oc chic chi qui ch'ujersaxic i winak. <sup>14</sup> Rumal-i, i creyent aj Beréa juntir xqui tak bi i ma Páblo c'a pa cósta; xui-ri i ma Sílas, ru' i a-Timotéo xe canaj pa Beréa. <sup>15</sup> Je 'o jujun xe 'e ru' i ma Páblo c'a pa tinimit Aténas. Te'uri xe tzalij chic pa Beréa. I ma Páblo xu bij bi chique chi quiqui bij pan chique i ma Sílas i a-Timotéo chi we' que upon ru'.

*I u c'utunic i ma Páblo chique i aj Aténas*

<sup>16</sup> I ma Páblo, tz'akat je roy'em i ma Sílas i a-Timotéo pa Aténas, lic xc'achir na man mas je q'ui

i tiox je 'o chupam i tinimit-le. <sup>17</sup> Rumal-i, lic xe u pixabaj i winak pa qui molbal'ib i aj Israel, xak queje chique i ne te aj Israel chi quiqui coj u 'ij i Dios. Xak 'ij 'ij xa 'e pa q'uebal chi lapanic cu' i winak chila.

<sup>18</sup> I winak chi quiqui chap quib chi tzij ru', je 'o jujun chique je cachi'il i je Epicúrios\* ca bixic, xak 'o i je cachi'il i je Estóicos<sup>17.18</sup> ca bixic. 'O jujun chique xqui bij:

—¿Wach cu bij i achi-le chi to' ca loxowic y n-ta reta'am? —xe cha.

Y'o juban chic que binic:

—Caka bij yoj chi xa ajbil que juban chic tiox junwi —xe cha.

Queje ile xqui bij man i ma Páblo ca tijin chu paxsaxic rason i Jesus, xak i qui walijbal i camnak. (Quiqui bij ique chi je queb tiox: i Jesus y walijbal.) <sup>19</sup> Te'uri ique xqui bij che i ma Páblo chi ca 'e cu' pa quiqui mol wi quib pa nuc'bal t'isbal, chi Areópago u bi. Are xe uponic, xqui bij che:

—Cakaj caketamaj wach usuc' i c'ac' laj c'utunic-le ca 'ano. <sup>20</sup> 'O i tzij ca bij chi n-caka ta tu be yoj, y cakaj caketamaj wach usuc' que'elok —xe cha.

<sup>21</sup> Conojel i aj Aténas, xak conojel i winak aj naj chi je jekel chila, ique xui quiqui ya quib chu tayic i c'ac' laj tak tzij, xak chu laptic ni'pa tak i nojbal c'ac'.

---

\* <sup>17:18:</sup> I Epicúrios quiqui bij chi i usuc' i ka c'aslemal xui to' re i quicotemal waral chuwach i jyub ta'aj. I je Estóicos quiqui bij chi i usuc' i ka c'aslemal xa are maka coj retalil we coj bisonic, xak mi ne we coj quicotic. I queb tzobajle, lic qui yom quib che i qui c'utunic ique.

<sup>22</sup> Are 'uri i ma Páblo xtaq'ui 'an chiquixol ique pa je 'o wi pa Areópago, y xu bij chique:

—Nimak tak winak aj Aténas, cwil yin chi lic qui coj qui 'ij i tiox, <sup>23</sup> man yin, are xin malcat pi tinimit, xwilo chi mas je q'ui i cachoch i tiox pa qui coj wi i qui 'ij. Xak xin rik jun altar i yibbam, 'o i tz'ib chuwatch chi cu bij: “I altar-i, re i Dios chi n'-etamam tu wach,” cu bij. Are i Dios-le, chi qui coj u 'ij yix, tupu n-iweta'am tu wach, are i quin tijin yin chu bixquil chiwe. <sup>24</sup> I Dios-le, chi yibawnak i jyub ta'aj xak ronojel ni'pa i 'o chuwatch, ire n-ca q'uiji ta chupam jun ja chi xa qui yibbam i winak. Ire are rajaw i ulew, rajaw i caj. <sup>25</sup> Are ire yawnak i ka c'aslemal, yawnak i kuxlab, yawnak ronojel wach i rajwaxic chake. N-ta rajwaxic che ire, wach tak quiqui ya i winak che.

<sup>26</sup> Ni'pa i oj winak chuwatch i jyub ta'aj, are ire xoj u yijba, xa jun achi i ka xebal konojel, y xu ya chake coj jeki che ronojel u wach i jyub ta'aj. Are ire nuc'uwnak pa i coj q'uiji wi; are ire nuc'uwnak ni'pa junab coj c'asi chuwatch i jyub ta'aj. <sup>27</sup> Are ire xe u yijba i winak man quiqui tzucuj ire, quiqui 'an pen u rikic. Queje ile caka tzucuj na, tupu ire n-naj ta 'o wi chake, chaka jujunal. <sup>28</sup> Katzij, i Dios n-naj ta 'o wi, man xa rumal i Dios oj c'aslic, xa rumal i Dios coj binic, xa rumal i Dios oj 'o chuwatch i jyub ta'aj. Katzij i tzij-i, chi cu bij i aj tz'ib iwe yix, chi u tz'ibam canok: “Oj u mi'al ralc'wal i Dios,” cu bij. <sup>29</sup> Bay, we oj u mi'al ralc'wal i Dios, maka bij 'uri chi Dios xa ril 'antal; n-piqui nojbal ti winak petnak wi. Ire n-queje taj pacha tak i tiox 'antal che i óro, 'antal che i pláta, 'antal che abaj cumal i

winak. <sup>30</sup> Ujer, i Dios to' xril qui mac i winak, n-ta xu bij, man n-xqui ta tu be chi n'-us ti qui qui 'ano; xui-ri wo'or u bim chique conojel, ronojel u wach jyub ta'aj, 'o u chac qui qui jalwachij i qui no'oij chi n'-us taj. <sup>31</sup> Lic 'o u chac ile, man i Dios u ch'icom chic i 'ij chi cu 'at ni tzij piquiwi i winak, wach i qui 'anom. Lic pusuc' cu 'an na ile; ya u chom chic i Achi chi ca 'anaw na. I Dios u 'alijinsam chake yoj konojel chi queje ile cu 'an na, man u walijsam chic i Achi-le chiquixol i camnak. (Queje ile xu bij i ma Páblo chique i winak pa molbal'ib.)

<sup>32</sup> Are xqui ta u c'astajic qui wach i camnak, 'o jujun xqui yo'ya, xui-ri je 'o juban chic xqui bij:

—C'a te ca bij tan chic chake co'on panok —xe cha.

<sup>33</sup> Rumal-i i ma Páblo xel chiquixol. <sup>34</sup> Xui-ri, je 'o jujun chique i xe tawic xqui cojo y xqui ya qui wach ru'. Jun chique ique, ma Dionísio u bi; ire jun chique i aj nuc'unel re i molbal'ib chi Areópago. Jun chic chi xu ya u wach cu' are i ati Dámaris. Xak je 'o chic juban chic.

## 18

### *Wach i xu 'an i ma Páblo pa Corínto*

<sup>1</sup> Xo'on chupan jubi', i ma Páblo xel pa tinimit Aténas, y xa 'e pa tinimit Corínto. <sup>2</sup> Chila xu rik wi jun aj Israel, ma Aquíla u bi; ire pa jyub Pónto alax-nak wi; c'a te c'un-nak pa Itália, rachi'il i rixokil, chi ati Priscila. Je 'elnak Itália man i 'atol tzij, ma Cláudio, xu bij chi conojel i aj Israel winak 'is que

'elsax na\*. I ma Páblo xe u solij. <sup>3</sup> Ique je aj t'isanel c'ul lic pim re i cárpa, xak queje i ropis i ma Páblo ile. Rumal-i, xa 'e jekel cu' y xe chacun junam. <sup>4</sup> Pa tak uxlambal 'ij, xa 'e pa qui molbal'ib i aj Israel winak. Chila ca tijin chu c'utic chique i aj Israel, xak i aj Griégo; cu sakij i usuc' chique chi 'o u chac quiqui cuba qui c'ux che i Jesus.

<sup>5</sup> Che tak i 'ij-le, xe c'un i ma Sílas, i aTimotéo, petic-que re i jyub Macedónia. Are xe upon ique, i ma Páblo mas xu ya rib chu c'utic u tzij i Dios; ronojel tak 'ij lic xu bij chique i je aj Israel chi Jesus are i Tolque chi coy'em. <sup>6</sup> Xui-ri, ique xe oc chu chapic quib chi tzij ru', y xqui bij itzel tak tzij che. Are 'uri i ma Páblo xu puq'uij u 'u' chiquiwach, c'utbal re chique chi nu mac ta chic ire chique. Xu bij:

—Chikul 'o wi i camic yix chupam i mac; n-in mac ta chic yin chiwe. Wo'or quin 'e cu' i ne te aj Israel winak—xu bij chique.

<sup>7</sup> Te'uri xel pa molbal'ib y xa 'e chi rachoch jun achi u bi ma Jústo. Ire, are jun achi chi lic cu coj u 'ij i Dios; i rachoch ca canaj chu c'ulel i ja re i molbal'ib. <sup>8</sup> Xui-ri i ma Críspo, chi are i caj'atzil re i molbal'ib, xu jach rib pu'ab i Kajwal Jesus, junam cu' conojel i je 'o pa rachoch. Xak queje xqui 'an je q'ui aj Corínto; are xqui ta i tzij re i Jesus chi ca tijin i ma Páblo chu c'utic, xqui cojo y xqui tz'onoj u kajsacic ya piquawi. <sup>9</sup> Che jun a'ab, i ma Páblo xril u wach i Kajwal puwach, y xu ta i tzij-i chi xu bij che:

---

\* **18:2:** I 'atol tzij u bim chi ni'pa i aj Israel 'is que 'el pa tinimit Róma, chi u capital i jyub Itália.

—Ma xij awib; ma mayij u c'utic in tzij, mat uxlan chu bixquil. <sup>10</sup> Mi jun ca tiqui chu 'onquil c'ax chawe man yin in 'o awu'. Che i tinimit-i, je q'ui quiqui coj ni in tzij. (Queje ile xu bij i Kajwal che i ma Páblo.)

<sup>11</sup> Rumal 'uri, i ma Páblo xcanaj jun junab ru' nic'aj pa tinimit Corínto ca tijin chu c'utic u tzij i Dios chique i winak.

<sup>12</sup> I tinimit-le u cwenta i jyub Acáya, i gobernador, ma Galion u bi. Pa tak i 'ij-le, i aj Israel winak xqui mol quib, y junam qui wach xqui c'am bi i ma Páblo chuwach i gobernador-le. <sup>13</sup> Xqui bij che:

—I achi-ri ca tijin chi qui tunic i winak; i u cojic u 'ij i Dios chi cu c'ut ire, n-cu maj ta che i 'atbal tzij —xqui bij.

<sup>14</sup> I ma Páblo ya cu jek te ch'awic are xch'aw i gobernador ma Galion. Ire xu bij chique i aj Israel winak:

—We tene 'o jun u mac u 'anom chuwach i 'atbal tzij, o xak we tene jun nim laj mac u 'anom chirij jun winak, quin min wib 'uri chixol yix ix aj Israel, man chinkul 'o wi u 'onquil i 'atbal tzij. <sup>15</sup> Xui-ri, ile to' tzij, to' biaj, to' i costúmbre yix, chi yijba 'uri chiwach. Yin n-cwaj ta quin 'an juez che wib puwi ile —xu bij i gobernador chique.

<sup>16</sup> Te'uri xe 'elsax li pa 'atbal tzij. <sup>17</sup> Are 'uri i aj Griégo winak xqui chap i ma Sóstenes, chi raj'atzil i molbal'ib que i aj Israel winak. Xqui ya u lo'xic chuwach i 'atbal tzij, xui-ri i gobernador ma Galion n-ta xu bij chique wach xqui 'ano.

*I ma Páblo xtzalij chic pa Antioquía, jekbal re i oxmul u viáje*

<sup>18</sup> I ma Páblo xcanaj chic u q'ual 'ij cu' pa Corínto. Te'uri xe u 'ijla can i kachalal, y xqui maj bi qui be pa Síria, junam cu' i atti Priscila, i ma Aquila. Xe upon pa tinimit Cencréa chi 'o chu chi' i mar. Chila i ma Páblo xresaj u wi, c'utbal-re chi lic cu 'an na pacha jun tzij u bim che i Dios. Te'uri xe 'an bi pa bárco, 'enam-que pa jyub Síria. <sup>19</sup> Are que tijin chi be, xe upon pa tinimit Efeso; i ma Páblo xe u canaj can i atti Priscila, i ma Aquila, y xa 'e pa qui molbal'ib i aj Israel winak. Are xuponic, xoc chi tzij cu' i je 'o chila. <sup>20</sup> Ique, are xqui maj usuc', xqui bij che i ma Páblo chi ca canaj cu', pero ire n-xu 'an taj (man xa ic'awic-re cu 'an chila). <sup>21</sup> Te'uri xe u 'ijla canok y xu bij chique:

—'O u chac quin 'ec, man ya ca c'un i nima'ij, y cwaj cwil chila pa Jerusalen. Xui-ri, we craj i Dios, quin c'un tan chic chi iwilic —xu bij.

Te'uri xa 'an chic pa bárco y xa 'ec, xel pa Efeso. <sup>22</sup> Are xupon pa tinimit Cesárea, xel pa bárco, y xa 'e c'a Jerusalen chi quilic i jutzobaj creyent chila. Te'uri xkaj pa tinimit Antioquía. <sup>23</sup> Xo'on pan queb oxib 'ij chila, te'uri xa 'e chu solixic tak i tinimit re i jyub Galácia, xak i jyub Frígia, chu ya'ic u cowil qui c'ux i jutak tzabajil creyent chila.

*I ma Apólos ca c'utun pa Efeso*

<sup>24</sup> 'O jun achi, ma Apólos u bi, xupon pa tinimit Efeso. Ire aj Israel winak, alaxnak pa tinimit Alejandría. Ire 'utz laj aj paxsanel re u tzij i Dios, xak lic reta'am wach cu bij u wuj i Dios tz'ibtal can ujer. <sup>25</sup> Xak 'o i c'utuwnak che wach i c'unic

cu 'an i Kajwal Jesucristo pacha u bim i ma Wan aj kajsanel ya. Xui i tzij-le reta'am ire chirij i Jesucristo†. Lic u yom u c'ux chu paxsacic wach i reta'am, y lic usuc' i cu bij. <sup>26</sup> Ire, co u wach, xoc chu c'utic pa qui molbal'ib i aj Israel winak pa Efeso. Are ca tijin chi c'utunic, 'o i ati Priscila i ma Aquila chila. Are xqui ta wach i xu bij, are xrelej u c'utunic, xqui siq'uij cu' quituquel, y xqui bij mas usuc' che. <sup>27</sup> Xo'on panok, i ma Apólos xraj 'enam pa jyub Acáya, are 'uri i creyent pa Efeso xqui ya qui wach che u 'enam, y xqui tz'ibaj bi jun wuj chique i creyent chila. Xqui tak bi u bixquil chique chi 'utz chiqui c'ulaj i ma Apólos cu'. Are xupon pa Acáya, xe u rik i jutzobaj creyent, chi Dios, rumal i rutzil u c'ux je u tom chu cojic u tzij. I ma Apólos xu ya mas u cowil qui c'ux. <sup>28</sup> Chiquiwach conojel i winak, xqui chap quib chi tzij cu' i aj Israel, y lic xu 'alijinsaj chique wach usuc' i tzij tz'ibtal can chupam u wuj i Dios. Xu 'alijinsaj chique chi i Jesus are i Tolque chi coy'em.

## 19

### *Wach i xu 'an i ma Pablo pa Efeso*

<sup>1</sup> Tz'akat i ma Apólos 'o pa tinimit Corínto (chi u cwenta i jyub Acáya), i ma Pablo ca solin pa tak jyub ca tijin ruponic pa tinimit Efeso. Are xupon chila, xe u rik juban creyent. <sup>2</sup> Xu tz'onoj chique:

—Yix, are xi coj u tzij i Dios, ¿xi na'o we xix uc'ax rumal i u Tewal i Dios? —xu bij.

Ique xqui bij:

---

† **18:25:** I mer tzij xu bij are iri: "Xui reta'am wach u kajsacic ya xu 'an i ma Wan." Nu tom taj chi ya c'un-nak chic i u Tewal i Dios.

—Yoj n-keta'am tene-ri we 'o u Tewal i Dios —xe cha.

<sup>3</sup> Are 'uri i ma Páblo xu tz'onoj chique:

—¿Wach i c'utunic 'uri xi cojo are xi tz'onoj u kajsacic ya piwi? —xu bij.

Ique xqui bij:

—Are i c'utunic chi xu 'an i ma Wan aj Kajsanel ya —xqui bij.

<sup>4</sup> I ma Páblo xu bij chique:

—I ma Wan xu kajsaj ya piquiwi ni'pa i xqui jalwachij qui c'aslemal, xui-ri, xak xu bij chique chi chiqui cuba qui c'ux che i Jun chi ca c'un chirij ire; i jun-le are i Jesucrístico —xu bij i ma Páblo.

<sup>5</sup> Are xqui ta ile, xqui tz'onoj u kajsacic ya piquiwi, c'utbal-re chi je re chic i Kajwal Jesus\*.

<sup>6</sup> Te'uri i ma Páblo xu ya u 'ab piquiwi, are 'uri i u Tewal i Dios xe u rajawij, y xqui jek ch'awic che jun ch'awbal c'ac'; xak xqui jek u bixquil wach u ch'obom i Dios, chi u 'alijinsam chique. <sup>7</sup> Colo je cablajuj achiab.

<sup>8</sup> Che tak i uxlambal 'ij re i oxib ic', i ma Páblo n-xu mayij ti'enam pa qui molbal'ib i aj Israel. Lic co u wach xu c'ut u tzij i Dios chique; 'olic xqui chap quib chi tzij rumal usuc'. Lic xu tij u 'ij chu c'utic chique wach i 'atbal tzij re i Dios. <sup>9</sup> Xui-ri, je 'o jujun chique lic je buy, n-xcaj ta xqui cuba qui c'ux che i Jesus. Xa xe oc chu bixquil chiquiwach conojel i winak chi n'-us ti u tzij i ma Páblo chique re u be i Dios. Rumal 'uri i ma Páblo xel cu', y xe u c'am bi ru' ni'pa i xqui cuba qui c'ux che i Jesus. Xe 'e chi rachoch jun mayes, chi ma Tiráno

\* **19:5:** I mer tzij xu bij are iri: Pu bi i Kajwal Jesus.

u bi; chila i ma Páblo xoc chu c'utic 'ij 'ij chique i winak. <sup>10</sup> Queb junab u wach, queje ile xu 'ano. Xe'elok chi conojel ni'pa i je 'o pa jyub Asia xqui ta i tzij chirij i Kajwal Jesucristo. N-xui ti je aj Israel winak xqui ta, xak xqui ta i ne te aj Israel. <sup>11</sup> I Dios xu ya pu'ab i ma Páblo chi cu 'an nimak tak milágro. <sup>12</sup> 'Olic i winak xqui tz'onoj pawor che i ma Páblo chi cu chi'maj u sut chique, o xi ntaj, u relantar, que 'e quic'awsaj chique i iwabib, 'elsabal re i yobil chique. Xak queje xqui 'an ile, 'elsabal-re itzel tak tew.

<sup>13</sup> 'O jujun aj Israel winak que bin pa tak tinimit chi relsaxic itzel tak tew chique i winak. Xak xcaj ique quiqui cuxtaj u bi i Kajwal Jesus chi relsaxic pacha cu 'an i ma Páblo. Are xqui 'ano, xqui bij chique i itzel tak tew:

—I Jesus chi cu cuxtaj i ma Páblo, ru' u bi i Jesus-le quin bij chiwe, chix el che i achi-le. (Queje ile quiqui bij.)

<sup>14</sup> 'O jun aj Israel, caj'atzil i sacerdóte, ma Escéva u bi. Ire je 'o wukub u c'ojo, xak ique-le queje quiqui 'an ile. <sup>15</sup> Are xqui 'an ique ile, i itzel tew xu la' u wach chique; xu bij:

—Weta'am u wach i Jesus, xak weta'am pachin i ma Páblo, xui-ri, ¿yix ix pachinok? —xu bij chique.

<sup>16</sup> Are 'uri, i achi chi 'o itzel tew che, xa 'e chiquij; lic xe u chapo, y xe u ch'ayo. Te'uri i achiab xe 'anmaj bi che i rachoch i achi, je ch'analytic, lic 'antal c'ax chique. <sup>17</sup> Conojel i winak je jekel pa tinimit Efeso, ni'pa i aj Israel, xak i ne te aj Israel, 'is xqui ta rason. Lic xqui xij quib rumal, y xqui bij chi lic nim u 'ij i Kajwal Jesus.

<sup>18</sup> Xak je q'ui chique i creyent xe c'unic xol qui tz'onoj cuybal mac; xqui bij chiquiwach i winak ni'pa i n'-us taj qui 'anom. <sup>19</sup> Je q'ui chique ique que nanic, xak qui 'anom pacha tak milágro, pero n-are taj. Ique-le xqui c'am li qui wuj chi n'-us taj pa qui nawsam wi quib che i nanic. Te'uri xqui poroj chiquiwach conojel i winak. Are xcajlaj ni'pa rajil i wuj-le, xe'el colo cincuénta mil quetzáles. <sup>20</sup> Queje ile, 'alaj chi u tzij i Dios lic 'o u cho'ab, ca tijin u paxsaxic u tzijol, xak je q'ui i winak que tijin chu cojic.

<sup>21</sup> Are xa 'antaj ile, i ma Páblo xu ch'obo chi ca 'e chi qui solixic i tinimit pa jyub Macedónia, xak i jyub Acáya. Xak xu ch'obo we xrelej ile, ca 'e c'a Jerusalen. Xak n-xui ti ile, xak xu ch'ob 'enam c'a pa tinimit Róma. <sup>22</sup> Rumal 'uri xe u tak bi i queb rachi'il pa jyub Macedónia; ique je are i a-Timotéo xak i ma Erásto. I ma Páblo xnajtin jubi' chic pa jyub Asia.

*I ma Demétrio cu yac ch'o'oj chirij i ma Páblo pa Efeso*

<sup>23</sup> Che tak i 'ij-le, 'o jun achi pa Efeso lic c'ax xch'aw chirij i u tzij i Kajwal. Xe u tun i winak, rumal-i lic xe ch'ujeri. <sup>24</sup> I achi-le, ma Demétrio u bi, aj ch'ayol re i chom laj ch'ich' pláta. Are i mas u chac i achi-le, are u 'onquil ral tak u q'uekwach jun rachoch tiox chi 'o pa qui tinimit. I rachoch tiox-le, cojbal u 'ij i ati Diána, chi qui tiox ique. Che i chac-le, ni'pa que chacun ru' i ma Demétrio lic nim i qui qui ch'aco. <sup>25</sup> I achi-le xe u mol qui chi' i je rachi'il, xak i juban chic chi que chacun che i chac-le, y xu bij chique:

—Achiab, yix iweta'am chi, che i kopis-i, lic coj ch'acan chirij. <sup>26</sup> Xak iwilom, i tom wach ca tijin chu bixquil i ma Páblo-le. Ire cu bij chique i winak, ni'pa tak i tiox chi xa je ril 'antalic n-ta qui 'ij; ne te sakil dios cu bij ire. Y je q'ui chic i winak qui cojom wach ca tijin chu c'utic. N-xui ti chi, pa Efeso, u c'utum wi, xak laj ronojel i jyub Asia chikij chakawach queje ile u 'anom. <sup>27</sup> Ile, lic xibin'ib ru', man i winak que oc-i chu ch'ach'axic chi n'-us ti kopis yoj, y n-ca 'ax ta chic i ka c'ay. N-xui ta la ile, xak i rachoch i ka nim laj tiox ati Diána ca kaj li u 'ij, xak queje ire, ca kaj u 'ij. Ca sach-i u wach u 'ij i ka tiox-le chi lic 'o u 'ij cumal i winak ronojel i jyub Asia, xak ronojel u wach i jyub ta'aj. (Queje ile xu bij i ma Demétrio.)

<sup>28</sup> I winak, are xqui ta ile, lic xpe coywal, y xe siq'uin chu bixquil:

—¡Nim u 'ij i ati Diána! ¡Nim u 'ij i ka tiox yoj oj aj Efeso! —xqui bij.

<sup>29</sup> Are 'uri, lic xpaxtaj i ch'okowic pa tinimit. I u quial winak xe qui chap i queb achiab je rachi'il i ma Páblo, jun, ma Gáyo u bi, y jun chic, ma Aristárco; ique je aj Macedónia. Are 'uri i winak xe qui charej bi c'a ru' i ja pa qui molbal quib. <sup>30</sup> I ma Páblo craj te oquic cu', que u 'ijla i winak cu bij ire, xui-ri i creyent n-xqui ya ta che. <sup>31</sup> Je 'o jujun rakan u 'ab i 'atbal tzij re i jyub Asia chi je ramig i ma Páblo; xak ique xqui tak bi u bixquil che, chi ma oc bi pa ja cu' i winak. <sup>32</sup> Ni'pa i winak je 'o paja, 'is que ch'okowic. Conojel que siq'uinic, xui-ri, 'is junwi i tzij quiqui bij. Katzij je q'ui chique n-queta'am tene-ri wach tak rumal qui molom quib.

**33** 'O jun achi chiquixol i winak, ma Alejándro u bi; ire aj Israel. I je rach aj Israel xqui bij che wach usuc' qui molom quib chila; xqui 'an pen che, chi ca taq'ui chiquiwach i winak. Ire xu c'ut chique ru' u 'ab chi qui qui mayij ch'okowic; xraj ire cu bij jun tzij chique, tobaj-que i aj Israel winak. **34** Xuri, are xquil u be chi ire xak aj Israel, mas xe oc chi sic', colo queb 'or xe siq'uinic.

—¡Nim u 'ij i ati Diána! ¡Nim u 'ij i ka tiox yoj oj aj Efeso! —xqui bij.

**35** Te'uri i aj tz'ib re i tinimit xtiqui chi qui 'atixic i winak, are 'uri xu bij chique:

—Achiab ix aj Efeso, conojel i winak re u wach i jyub ta'aj 'is queta'am chi yoj, chi oj aj Efeso, 'o chakakul u chajixic i rachoch i nim laj tiox ati Diána, xak i u q'uemwach chi xtzak li chicaj.

**36** Ile, mi jun cu bij chi n-katzij taj. Rumal-i, chix uylanok; lic chi ch'obo u be wach i qui 'ano, mokxa ca pe jun c'ax piwi rumal. **37** I achiab-i chi yix i c'amom lok, n-ta jun c'ax qui 'anom che i tiox-le, xak n-ta c'ax qui bim chirij. **38** I ma Demétrio xak i juban aj 'anol tiox, we cacaj qui qui coj u mac jun winak, are u chac-i je 'o i juez, xak 'o i 'atbal tzij; we cacaj, che 'e qui cojo qui mac chiquiwach i que 'ataw tzij; chila ca 'iltaj wi pachin aj mac. **39** Y we n-are ti ile qui tz'onoj, yix chi jacha 'uri chiquiwach i 'atbal tzij are qui qui mol quib ique. **40** Queje ile chi 'ana, man mokxa qui qui bij xa oj aj ch'o'oj chirij i 'atbal tzij rumal tak iri chi ka 'anom wo'or. Katzij, i ka 'anom-i, n-ta rumal; y we ca tz'onox chake, ¿wach u la'ic u wach caka 'ano? —xu bij chique.

**41** Are xrelej u bixquil ile, xe u 'ijla bic.

## 20

*U'enam i ma Páblo pa Macedónia xak pa Grécia*

<sup>1</sup> Are xuxlan i ch'okowic, i ma Páblo xe u siq'uij i creyent ru', yabal re qui nojbal. Te'uri xe u tz'ulej, xe u 'ijla canok, y xa 'e pa Macedónia. <sup>2</sup> Xe u solij i tak tinimit re i jyub-le, y xu ya u cowil qui c'ux i creyent ru' tak u tzij. Te'uri xa 'e pa Grécia. <sup>3</sup> Chila xo'on wi oxib ic'; te'uri xu yijba rib, 'enam-re pa Síria. Are ya ca 'an te pa bárco, xretamaj chi i aj Israel winak qui yijbam wach u chapic qui qui 'an che. Rumal-i, xu ch'obo n-ca 'e ta pa bárco, y xtzalijic; xu maj chubi u be pa jyub Macedónia. <sup>4</sup> Je 'ojujun creyent xcachi'ilaj bic: jun chique are i ma Sópater, aj Beréa; queb chic je aj Tesalónica, je are i ma Aristárco, i ma Segúndo; jun chic are i ma Gáyo, aj Dérbe; xak 'o i a-Timotéo; xak je 'o i ma Tíquico y ma Trófimo chi je aj pa jyub Asia. <sup>5</sup> Xui-ri, ique xe nabej bic, xe 'e c'a pa tinimit Tróas; chila xoj coy'ej wi. <sup>6</sup> Yoj xkoy'ej i ric'awic i nima'ij chi ca tijaw wi i caxlanwa n-ta cunbal che. Te'uri xoj 'an pa bárco y xoj el pa Filípos. Che i jo'ob 'ij, xe 'e ka maja pa Tróas pa oj coy'em wi; chila xoj q'uiji wi wukub 'ij.

*I q'uisbal chic c'utunic xu 'an i ma Páblo pa tinimit Tróas*

<sup>7</sup> Che i nabe 'ij re i seman, xka mol kib cu' i creyent chu tijawic ka wa. Te'uri i ma Páblo xoc chu c'utic chique i je moltajnak. Lic xnajtin chu c'utic chique, man 'o tan chic u viáje chucab 'ij. Rumal-i c'a tiq'uil a'ab ca tijin chi tzij. <sup>8</sup> I cuárto pa ka molom wi kib 'o c'a pa oxleja; chila q'ui i 'a' tzijtalic. <sup>9</sup> O jun ala cul pa wantana, a-Eutico u bi. Ire craj chic waram, man i ma Páblo xnajtin chi

ch'a'atic, y ya naj chic cha'ab. Are u 'onquil i ala-le lic xoc li u waram y xak te'et xtzak li c'a pulew. Are xqui yaco, ya camnak chic. <sup>10</sup> Te'uri i ma Páblo xkaj lók, xjupi chirij, y xu tz'ulej. Xu bij chique i creyent:

—Mi xij iwib; ire c'aslic —xu bij.

<sup>11</sup> Te'uri xel chubic y xu tij wa cu' i creyent. Are xrelej, xoc chic che u c'utunic chique c'a che u sakirbal. Te'uri xa 'ec. <sup>12</sup> I ala chi tzaknak pa wantana, xqui c'am bi chi rachoch, c'aslic; conojel xcubi qui c'ux man xc'asi chic.

### *U'enam i ma Páblo pa Miléto chu nakaj i Efeso*

<sup>13</sup> Te'uri xoj 'e yoj pa bárco c'a pa tinimit Ason, man i ma Páblo xu ch'obo chi 'utz coj nabej bi yoj; xui-ri ire n-xic'aw ta chuwi ya, xa xu ya vuélta che akan y xu bij chi caka rik kib chila pa Ason. Queje ile xka yijba chakawach. <sup>14</sup> Are xka rik kib chila ru' ire, xa 'an bi ku' pa bárco, y xoj 'e junam pa tinimit Mitiléne. <sup>15</sup> Te'uri xoj 'ec, y chucab 'ij xoj ic'aw chuwach i tinimit Quío. C'a che chic jun 'ij xoj upon pa tinimit Sámos, chi 'o chu chi' i mar. Xoj uxlan jubi' pa tinimit Trogílio, y chucab 'ij xoj upon pa tinimit Miléto. <sup>16</sup> Queje ile xka 'ano, man i ma Páblo craj uponic we' pa Jerusalen, man craj ca 'e rila i nima'ij Pentecostes\* chila. Rumal-i, n-xraj ta 'enam pa Efeso, y n-xraj ta xu bay mas rib pa jyub Asia. Rumal-i queje ile xka 'ano.

### *U tzij i ma Páblo chique i je aj c'amol u tzam i jutzobaj creyent pa Efeso*

---

\* **20:16:** Chawila i usuc' i tzij "Pentecostes" chuxe' i wuj re i página 468.

<sup>17</sup> I ma Páblo, are 'o pa Miléto, xu tak qui siq'uixic i aj c'amol u tzam chique i creyent pa tinimit Efeso.

<sup>18</sup> Are xe c'un ru', xu bij chique:

—Yix lic iwilom wach in c'aslemal chiwach; lic iwilom wach in 'anom chu jekbal lok iwu' yix waral pa Asia. <sup>19</sup> Lic xin ya wib chu 'onquil u chac i Kajwal; n-xin 'an ta nim che wib chiwach. Queje ile xin 'ano, tupu 'olic xin o' rumal u q'ual c'ax xpe pin wi cumal i aj Israel chi xcaj in chapic. <sup>20</sup> Xui-ri, n-xin xij ta wib chu bixquil chiwe ni'pa i tzij rajwaxic chiwe, xak n-xin mayij tu c'utic chiwe wach i 'utz qui 'ano. Queje ile xin 'ano are i molom iwib, xak queje xin 'an chi tak iwachoch. <sup>21</sup> Lic xin 'alijinsaj chiwe chi 'o u chac qui jalwachij i c'aslemal chuwach i Dios, xak qui cuba i c'ux che i Kajwal Jesucristo. Queje ile xin c'ut chique i aj Israel winak xak chique i ne te aj Israel. <sup>22</sup> Wo'or 'ut, quin 'e Jerusalen, man i u Tewal i Dios quin u tak bi chila. Quin 'ec, tupu n-weta'am taj wach quin c'ulmaj chila. <sup>23</sup> Xui-ri, weta'am ipa quin 'e wi pa tak tinimit, quin tij uyej; 'olic quin qui min pa cárcel. Ile weta'am, man i u Tewal i Dios ca bin chwe. <sup>24</sup> Ni'pa ile n-quin c'achir ta rumal, xak mi ne che in c'aslemal. N-ta we che, we xin camic, o we in c'aslic. Are i 'o we che, are we quin quicotic quin q'uis u 'onquil in chac chi u yom i Kajwal Jesus chinkul; i in chac-i are u paxsaxic u tzijol i c'axnabal u c'ux i Dios chique conojel.

<sup>25</sup> Wo'or weta'am chi mi jun chiwe cril chic in wach. In c'utum chiwe iwonojel wach usuc' i 'atbal tzij re i Dios pakawi. <sup>26</sup> Rumal-i, wo'or cwaj quin bij chiwe: we 'o jun chiwe yix ca sachic, n-in mac ta chic yin. <sup>27</sup> In bim chic ronojel

wach u ch'obom i Dios; lic n-ta wuwam u wach chiwe. <sup>28</sup> Chiwila iwib yix, xak che iwila i jutzobaj creyent, man i u Tewal i Dios u yom u chajixic chikul. Che i chajij pacha quiqui 'an i je aj chajil chij. Queje ile chi 'ana che i jutzobaj re i Kajwal, man ire je u lo'om ru' u quiq'uel. <sup>29</sup> Che iwila, man weta'am, are quin 'e yin, que c'un juban chic chu quichersaxic i jutzobaj; quiqui 'an na pacha quiqui 'an utiw chiquixol jutzobaj chij. <sup>30</sup> Chixol yix mismo 'o ni que walij chu t'oric i jutzobaj creyent, c'ambal bi qui wach. <sup>31</sup> Chi 'ana cwent 'u iwib; cha c'un chi c'ux chi yin oxib junab u wach, chi pa'ij, chi cha'ab, xin o'ic xix in pixabaj chi jujunal.

<sup>32</sup> Wo'or, wachalal, quix in ya can pu'ab i Dios chi quix u chajij; chi ch'obo i u tzij man are ile ca 'alijinsaw i c'axnabal u c'ux i Dios chiwe. I tzijle cu cowirsaj u cubibal i c'ux, xak quix u to chu rikic i 'utz chi cu ya i Dios piquiwi conojel i je re ire. <sup>33</sup> N-in rayim tu wach u mer jun chic, xak ni u 'u'. <sup>34</sup> Are in 'anom, in chacun-nak ru' in 'ab, ch'acbal re ni'pa i rajwaxic chwe, xak chique ni'pa i que chacun wu'. Lic iweta'am yix ile. <sup>35</sup> Ile lic 'ax in c'utum wi chiwe chi 'o u chac coj chacunic, ch'acbal-re wach caka tobej-que i niba'ib. Cha c'un chaka c'ux wach xu bij i Kajwal Jesucristo. Xu bij: "Jun winak, mas ca quicotic we ca sipanic, chuwach i jun chi cu c'am i sipon." Queje ile xu bij Kajwal —xu bij i ma Páblo chique.

<sup>36</sup> Are xrelej u bixquil ile, xe xuqui junam, y xqui tz'onoj che i Dios. <sup>37</sup> Conojel xe o'ic; xqui tz'ulej i ma Páblo, y xqui tz'ubaj. <sup>38</sup> Lic que bisonic, man

xu bij chique chi n-caquil ta chic u wach. Te'uri xcachi'ilaj bic c'a ru' i bárco.

## 21

### *U'enam i ma Páblo pa Jerusalen*

<sup>1</sup> Te'uri xe ka 'ijla canok y xoj 'e pa bárco; suc'ulic xoj 'e c'a pa jyub Cos. Chucab 'ij, xoj 'e pa tinimit Ródas, te'uri xoj 'e c'a pa tinimit Pátara. <sup>2</sup> Chila xka rik wi jun bárco chi ca 'e pa Fenícia, y xoj oc bi chupam. <sup>3</sup> Xoj 'ec y xoj ic'aw chu c'ulel i jyub Chípre chi setel chuwi mar. Xui xkil panok, y xka canaj can pa moxim, man 'enam-ke c'a pa jyub Síria. Are xoj upon chila, xoj oc pa tinimit Tíro man i bárco 'o ekan cu canaj canok. <sup>4</sup> Chila, xe ka tzucuj i creyent, y xoj canaj wukub 'ij cu'. Ique, xbix chique rumal u Tewal i Dios chi 'o i cu rik i ma Páblo pa Jerusalen; rumal-i xqui bij che chi n-ca 'e ta chila. <sup>5</sup> Xui-ri, xic'aw i u wukub 'ij, xoj 'ec. Conojel i creyent xoj 'e qui jacha tzam tinimit junam cu' i quixokil calc'wal. Are xoj upon chu chi' i mar, xoj xuqui junam, y konojel xka tz'onoj che i Dios. <sup>6</sup> Xe ka tz'ulej, xe ka 'ijla canok, y xoj 'el bi pa bárco. Te'uri xe tzalij chic chi cachoch.

<sup>7</sup> Xka maj chubi i ka be chuwi mar, y xoj 'e c'a pa tinimit Tolemáida; chila xkelej wi i ka be chuwi mar. Chila xe 'e ka 'ijla i creyent, y xoj canaj cu' jun 'ij. <sup>8</sup> Chucab 'ij, i ma Páblo y yoj chi oj rachi'il, xoj 'ec; xoj 'e c'a pa tinimit Cesaréa. Are xoj upon chila, xoj 'e ru' rachoch i ma Felípe; chila xoj canaj wi ru'. I u patan ire, aj paxsanel re u tzij i Dios pa tak tinimit. Ire-le, jun chique i wukub je chatal jela canok, je aj 'anol opis chiquixol i creyent. <sup>9</sup> I ma

Felípe je 'o cajib u mi'al, n-ta cachijil. Ique je ajbil-re chique i winak wach cu 'alijinsaj i Dios chique. **10** 'O tan chi 'ij ka 'olem ru' i ma Felípe, are 'uri xc'un jun achi, ma Agábo u bi, petnak pa Judéa; ire xak ajbil-re chique i winak wach cu 'alijinsaj i Dios che. **11** I achi-le xol oj u solij. Xu c'am i bant re i ma Páblo, y xu yut' i rakan u 'ab ire ru'. Te'uri xu bij chake:

—I u Tewal i Dios u bim chwe chi i rajaw i bant-i, queje iri ca 'an che we xupon Jerusalen; ca yut' na. Je are i aj Israel winak que 'anaw che, te'uri quiqui jach piqui'ab i ne te aj Israel —xu bij i ma Agábo.

**12** Yoj, junam cu' i creyent aj Cesaréa, are xka ta ile, lic xka tz'onoj che i ma Páblo chi n-ca 'e ta Jerusalen. **13** Xui-ri, ire xu la' u wach chake:

—¿Wach quix tijin chu 'anic? ¿Wuchac quix o'ic? xa quix tijin chu chupic u cowil in c'ux. Yin in yij chic we cacaj quin qui yut'u; y n-xui ta la ile, xak in yij chic we quin camsax pa Jerusalen rumal re i Kajwal Jesucristo —xu bij i ma Páblo.

**14** N-xoj tiqui ta chu 'atxic, rumal-i xka bij:

—Chu 'ana ni Dios pacha i craj —xoj cha.

Y n-xoj ch'aw ta chic.

**15** Te'uri xka yijba kib, y xka maj bi ka be pa Jerusalen. **16** Xoj cachi'ilaj bi juban creyent aj Cesaréa; xak xa 'e jun achi ku', ma Nason u bi chi 'o tan chi junab u cojom u tzij i Kajwal. Ire aj Chípre winak, xui-ri, 'o rachoch pa Jerusalen y cu ya chake chi coj canaj ru'.

*I ma Páblo que 'e u solij i je qui wi qui jolom i creyent pa Jerusalen*

<sup>17</sup> Are xoj upon Jerusalen, i creyent lic que quicotic xoj qui c'ulaj cu'. <sup>18</sup> Chucab 'ij, xoj 'e ru' i ma Páblo chu solixic i ma Jacóbo. Are xoj upon ru', ire je u molom ni'pa qui wi qui jolom i creyent. <sup>19</sup> I ma Páblo xe u tioxij y xoc chu laptic chique ronojel ni'pa u 'anom i Dios chique i ne te aj Israel, are xu paxsaj u tzijol i Kajwal chique. <sup>20</sup> Are xqui ta, xqui bij chi lic nim u 'ij i Dios. Te'uri xqui bij che:

—Bay, wachalal, aweta'am chi jó u q'uial mil aj Israel qui jachom quib pu 'ab i Kajwal. Conojel ique 'is qui qui bij chi lic 'o u chac chiqui 'ana pacha u tz'ibam can i mam Moises. <sup>21</sup> Xui-ri, 'o i je bin-nak chique chi yet junwi i c'utunic a 'anom chique i aj Israel chi je jekel naj. Qui tom ique chi yet a c'utum chique i winak chi n-tu chac qui qui 'ano pacha u bim can i mam Moises. Qui qui bij ique chi yet a bim chi n-tu chac we qui qui 'an i retal circuncision chique i cac'al. Xak qui qui bij chi yet a bim chi n-tu chac qui qui 'an pacha qui c'utum can i katit ka mam. Queje ile qui qui bij ique. <sup>22</sup> ¿Wach caka 'an 'ut? Man we xquetamaj i winak chi at 'o chi, qui qui mol quib. <sup>23</sup> 'Utz, caka bij yoj, we ca 'an iri pacha i caka bij chawé: cha 'ana jun rawasil pa rachoch i Dios pacha u tz'ibam can i mam Moises. Je 'o cajib achiab chakaxol cacaj qui qui tz'akatsaj jun rawasil pacha qui bim che i Dios chi qui qui 'an na. <sup>24</sup> Are que 'e ique chi rawasic quib, xak jat yet cu'; cha rawasij awib cu' y cha tojo ni'pa i qui qui sach che ile. Te'uri ique, ca 'elsax qui wi. We queje ile ca 'an yet, conojel 'uri qui qui u be chi n-katzij taj ni'pa i qui tom chawij. Qui qui 'uri chi yet lic ca 'an pacha i tz'ibtal can chupam i ujer 'atbal tzij. (Queje ile, i je aj Israel

winak, n-ta chic quiqui bij.) <sup>25</sup> Xui-ri, i creyent chi ne te aj Israel winak, ya ka takom chubi jun wuj cu'; ka bim bi chique chi n-tu chac quiqui 'an pen u 'onquil ronojel pacha i tz'ibtal can chupam i ujer 'atbal tzij. Xui 'o ú chac chi quiqui 'an iri: miqui tij i ti'ij chi xa sujtal chuwach jun tiox; xak miqui tij i quic'; xak miqui tij i ti'ij re chicop chi xa jitz'am; xak macuc'aj quib jun achi jun ixok we n-cachi'il ta quib. Queje ile ka tz'ibam bi chique i creyent chi ne te aj Israel winak, y co'on ile —xe cha che i ma Páblo.

### *U chaptajic i ma Páblo pa rachoch i Dios*

<sup>26</sup> Chucab 'ij, i ma Páblo xe rachi'ilaj bi i ca-jib achiab; y junam xqui rawasij quib pacha 'ax quiqui 'an wi i aj Israel winak, 'anbal ch'am che quib chuwach i Dios. Te'uri i ma Páblo xa 'e pa rachoch i Dios chu bixquil che i sacerdóte chi, chupam wukub 'ij, ca q'uis i 'ij re i qui rawasil; are ca q'uis i 'ij-le, ique quiqui sujuy ni qui sipon chuwach i Dios.

<sup>27</sup> Are ya ca q'uis i wukub 'ij, i ma Páblo 'o pa rachoch i Dios. Che i 'ij-le, xak je 'o juban achiab chila, je c'un-nak pa Asia. Are xquil u wach i ma Páblo xe oc chi qui ch'ujersaxic conojel i winak. Xqui chap i ma Páblo y xe siq'uin chu bixquil i tzij-i:

<sup>28</sup> —Achiab kach aj Israel, ¡choj i to! Are i achi iri chi xa ipa ca 'e wi chu c'utic chique i winak chi n-tu chac i ka 'atbal tzij yoj oj aj Israel winak. Cu bij chi n-tu chac i ujer 'atbal tzij tz'ibtal can rumal i mam Moises, xak n-cu coj tu 'ij i ka rachoch i Dios-i. Y n-xui ta la ile, wo'or je u c'amom li juban achiab ne

te aj Israel; je u c'amom li c'a paja, kajsabal re u 'ij i lo 'laj ka rachoch i Dios —xe cha.

<sup>29</sup> Queje xqui bij ile, man quilom i ma Páblo pa tinimit, rachi'il jun achi n-aj Israel taj. I achi-le chi rachi'ilam, ma Trófimo u bi, jun aj Efeso. Xqui ch'ob ique chi are ire-le chi ocnak pa rachoch i Dios ru'i ma Páblo, y n-are taj.

<sup>30</sup> Are 'uri lic xpaxtaj i ch'okowic pa tinimit, y conojel i winak xe c'un pa'anem. Xqui chap i ma Páblo y xqui charej bi chi sak. Te'uri xqui tz'ap-la i uchija re i rachoch i Dios. <sup>31</sup> Ya quiqui camsaj te'ek, xui-ri xupon rason ru'i qui capitán i soldádo re i tinimit. Xupon rason ru' chi conojel i winak pa Jerusalen pacha tak je ch'ujernak pa tak be. <sup>32</sup> Are 'uri xu mol qui chi' i soldádo, xak i caj'atzil, y xe 'e pa'anem pa qui molom wi quib i winak. Ique, are xquil u c'unic i capitán junam cu' u soldádo, xqui mayij u ch'ayic i ma Páblo. <sup>33</sup> I capitán xtejeb ru'i ma Páblo, xu chapo, y xu tak u ximic ru' queb carena; te'uri xu tz'onoj chique i winak pachin ire-le, y wach u mac u 'anom. <sup>34</sup> Xui-ri, i winak lic que ch'okowic, 'o i que siq'uin jewa, xak 'o i que siq'uin jela; 'is junwi que siq'uin chu bixquil. Rumal-i, i capitán n-cu maj ti usuc' wach quiqui bij, y xu tak u ya'ic pa cuartel. <sup>35</sup> Are xe upon che i cholchol re i cuartel, i winak lic je ch'ujernak rumal i coywal, cacaj quiqui camsaj i ma Páblo. Rumal 'uri i soldádo xqui yac la bi piqui 'ab, tobalarre. <sup>36</sup> Conojel i winak je teren bi chirij, que tijin chu bixquil:

—¡Cha camok! —xe cha.

**37** Are ya quiqui coj te bi i ma Páblo pa cuartel, ire xu bij che i capitan:

—¿Ca ya nawi chwe quin ch'aw jubi? (Ile xu bij pu ch'awbal i capitan.)

I capitan xu bij che:

—¿Ca rik bari yet i ka ch'awbal yoj chi oj aj Griégo winak? **38** ¿N-are ta bari yet i aj Egípto winak chi, jela canok, xa yac ch'o'oj chirij i 'atol tzij, y xa c'am bi u tzam chique i cajib mil je aj camsanel, chila che i jyub tz'inilic? —xu bij i capitan.

**39** I ma Páblo xu bij che:

—N-yin taj. Yin in aj Israel winak; in alaxnak pa tinimit Társo, jun tinimit nim u 'ij re i jyub Cilicia. Quin tz'onoj utzil chomal chawe, cha ya chwe que in 'ijla i winak —xu bij i ma Páblo.

**40** I capitan xu ya che chi ca ch'awic. I ma Páblo xtaq'ui che i cholchol y xu c'ut chique i winak ru' u 'ab chi che uxlan che i ch'okowic. Are xe uxlanic, xe u 'ijla piqui ch'awbal i aj Israel\* y xu bij:

## 22

**1** —Ix wachalal, ix nimak tak winak wach aj tinimit, chi ta jubi' in tzij, quin sakij chiwe chi n-ta in mac —xu bij chique.

**2** Are xqui ta chi xch'aw i ma Páblo piqui ch'awbal i aj Israel, lic xqui coj retalil che u tzij. Are 'uri ire xe u 'ijla chic, y xu bij:

**3** —Lic in aj Israel winak; in alaxnak pa tinimit Társo, re i jyub Cilicia; xui-ri, waral xin q'uiy wi pa Jerusalen. Chi xin tijoj wi wib ru' i nim laj mayes, mam Gamaliel. Xin naw ru' ire chi lic 'o u

---

\* **21:40:** I qui ch'awbal i aj Israel winak, "Hebreo" u bi.

chac quin 'an pacha cu bij i ujer 'atbal tzij chi mas ocsam u 'ij cumal i katit ka mam. 'Ax quin tjin wi chu 'onquil in patan chirij i Dios; lic in yom wib chu 'onquil, xak jun ru' pacha quix tjin yix chu 'onquil wo'or. <sup>4</sup> Yin ujer lic xin 'an ch'o'oj chiquij i creyent; xin tzucuj qui camsaxic. Xe in chapo, y xe in min pa cárcel, chi achiab, chi ixokib. <sup>5</sup> I 'atz laj sacerdóte, xak i nimak tak mam'ib queta'am chi ique mismo xqui ya pin'ab que 'e in chapa i creyent. Xqui ya bi wuj chwe, c'utbal re ile chique i kach aj tinimit chila pa tinimit Damásco. Are 'uri xin 'e chila tzucbal que i creyent; xwaj que in c'am li waral Jerusalen, 'ilbal-re wach i tojbal re qui mac quiqui 'ano.

<sup>6</sup> Are quin tjin chi be, ya mer quin upon Damásco, colo tiq'uil 'ij, xak te'et lic xrepcañ u tzunbal jun 'a' chwij chinwach, u petic chicaj. <sup>7</sup> Xin tzak pulew, y xin ta jun ch'awbal chicaj chi xu bij: "A-Sáulo, a-Sáulo, ¿wuchac ca 'an ch'o'oj chwij yin?" co'ono. <sup>8</sup> "¿At pachin yet, Nim laj Winak?" xin cha. Are 'uri xu bij: "Yin in Jesus aj Nazaret. Chwij yin ca 'an wi ch'o'oj," co'on chwe. <sup>9</sup> I je wachi'il xquil i 'a' chi xrepcañic, y xqui xij quib che; xui-ri n-xqui ta ti u ch'awbal i Jun chi xin u 'ijla. <sup>10</sup> Are 'uri, yin xin bij: "¿Wach cawaj quin 'ano, Kajwal?" xin cha. I Kajwal xu bij chwe: "Chat walijok; cha maja chubi a be Damásco. Chila ca bix wi chawe ronojel wach i ca 'ano," xin utixic. <sup>11</sup> Rumal u rep i 'a', n-xin tzun ta chic; rumal-i, i wachi'il xqui chap bi che in 'ab, y xin qui c'am bi c'a pa Damásco.

<sup>12</sup> Chila jekel wi jun achi, ma Ananías u bi. Ire lic u yom u c'ux chu 'onquil ronojel i 'atbal tzij

tz'ibal can rumal i mam Moises. Conojel i aj Israel winak chila pa Damásco quiqui bij chi ire 'utz laj mam. <sup>13</sup> I ma Ananías-le, xol in u solij. Are xc'unic, xtaq'ui chin c'ulel y xu bij chwe: "Wachalal ma Sáulo, ¡chat tzunok!" xu bij chwe. Are xbitaj ile rumal, xin tzunic, xwil u wach. <sup>14</sup> Te'uri xu bij chwe: "I Dios chi qui cojom u 'ij i katit ka mam, ire at u chom yet o'nom lok chu retamaxic wach craj ire. At u chom yet chi rilic u wach i Jun\* chi lic 'utz chuwach i Dios; at u chom yet chu tayic u ch'awbal i Jun-le. <sup>15</sup> Yet ca lap na ire chiquiwach i winak ronojel u wach i jyub ta'aj; ca bij na chique wach awilom, xak wach a tom. <sup>16</sup> Wo'or, ma bay awib. Chat walijok y cha tz'onoj u kajsaxic ya pawi, c'utbal re chi cul chic a c'ux che i Kajwal, chi ire cresaj i a mac chawij." Queje ile xu bij i ma Ananías chwe.

<sup>17</sup> Are xin el che i rachoch i ma Ananías, xin pe Jerusalen. Te'uri xin 'e pa rachoch i Dios chu 'onquil in tz'oxic che; are in 'o chila, xwil u wach i Kajwal pinwach. <sup>18</sup> Are xwiyo, xu bij chwe: "Cha bisoj awelic chi, Jerusalen; man mi jun aj waral cu coj na retalil che, are quin a lap chique." Queje ile xu bij i Kajwal chwe. <sup>19</sup> Are 'uri xin bij yin che: "Kajwal, conojel ique queta'am wach i ch'o'ojo xin 'an yin chiquij i creyent. Conojel 'is queta'am chi yin lic xin 'e pa tak molbal'ib que i aj Israel, chi qui tzucuxic ni'pa i qui jachom quib chawe. Xe in c'am bi pa cárcel, y xin 'an c'ax chique. <sup>20</sup> Are xcamsax i ma Estéban, chi a takon te'ek chu bixquil a tzij chique i winak, are xcamsax ire, yin lic xin ya in

---

\* **22:14:** I Jun-le are i Crísto.

wach che; in tac'al chi rilic are xqui camsaj, xak xin chajij qui 'u' i xe camsawic." Queje ile xin bij che i Kajwal. <sup>21</sup> Xui-ri, ire xu bij chwe: "Jat, man cat in tak bi c'a naj, cu'i ne te aj Israel chu sujuxic i cuybal mac chique." Queje ile xu bij i Kajwal chwe —xu bij i ma Páblo chique i winak.

*Chaptal i ma Páblo cumal i soldádo*

<sup>22</sup> I winak que tijin te chu tayic; xui-ri, are xqui ta i tzij chi ma Páblo xtak bi rumal i Kajwal chique i ne te aj Israel winak, xpe coywal. Xe oc chi sic' y xqui bij:

—I achi-le n-cu maj taj c'aslic, ¡cha camsaxok! —xqui bij.

<sup>23</sup> Lic n-xqui mayij ti sic'; xqui puq'uij qui 'u', y xqui c'ak uc'aj ulew chicaj rumal coywal.

<sup>24</sup> Are 'uri i capitán xu tak u ya'ic i ma Páblo pa cuartel, y xu bij chique chi qui qui ya u lo'xic, 'anbal-re che chi cu bij wach u mac u 'anom. Craj cretamaj wuchac que siq'uin i winak chirij. <sup>25</sup> Ximtal chic i ma Páblo, ya qui qui ya te u lo'xic. Are 'uri ire xu bij che i caj'atzil i soldádo:

—¿O bari pi'ab yix qui ch'ay jun aj Róma winak? ¡Peor we maja quiwetamaj we kas 'o u mac! —xu bij chique.

<sup>26</sup> I caj'atzil i soldádo, are xu ta ire ile, xa 'e u bij che i capitán:

—Cha 'ana cwent wach i ca 'ano, man i achi-le xak aj Róma winak —xu bij che.

<sup>27</sup> Are 'uri i capitán xa 'e u tz'onoj che i ma Páblo:

—¿Katzij 'uri chi yet xak at aj Róma winak? —co'ono.

I ma Páblo xu bij:

—Katzij.

<sup>28</sup> Te'uri i capitan xu bij che:

—Yin, lic nim i mer xin sacho 'elsabal re in wuj yin, 'anbal-re chwe in aj Róma winak —xu bij.

I ma Páblo xu bij che:

—Yin lic we wi in aj Róma winak chi walaxic cumal in chuch in kajaw —xu bij che.

<sup>29</sup> I que ch'ayaw te i ma Páblo, are xqui ta ile, xe tzalij chiquij. Xak i capitan, are xu ta chi ma Páblo xak aj Róma winak, xu xij rib man u chapom; n-ca majaw taj ca 'an queje ile che jun winak aj Róma we n'-etamam taj wach u mac.

*Wach xu 'an i ma Páblo chiquiwach i nuc'bal t'isbal*

<sup>30</sup> I capitan craj cretamaj wach kas u mac i ma Páblo quiqui bij i aj Israel. Rumal-i, chucab 'ij xu tak qui molic i caj'atzil i sacerdóte xak conojel i nuc'bal t'isbal. Te'uri xresaj i carena che i ma Páblo, xu c'am bi cu' i nuc'bal, y xu tac'ba chiquiwach.

## 23

<sup>1</sup> I ma Páblo xu c'am qui takexic i nuc'bal t'isbal y xu bij chique:

—Wachalal, 'ax in 'anom wi pen u 'onquil wach u bim i Dios, man n-ta cu bij in c'ux chuwach —xu bij.

<sup>2</sup> Are 'uri i 'atz laj sacerdóte, chi ma Ananías u bi, xu bij chique i je 'o chu c'ulel i ma Páblo chi chiqui ch'aya che u chi'.

<sup>3</sup> I ma Páblo xu bij che:

—Yet ¡xa queb a palaj! At cul chila chu 'onquil i 'atbal tzij pusuc', y n-ca 'an taj. I 'atbal tzij n-cu ya

ta chawe ca tak in ch'ayic. ¡I Dios cat u ch'ay ni yet!  
(Queje ile xu bij i ma Páblo che.)

<sup>4</sup> I je 'o chila xqui bij che:

—¿Queje u la'ic u wach ile ca 'an che i 'atz laj sacerdóte, aj patan chirij i Dios? —xbix che.

<sup>5</sup> I ma Páblo xu bij chique:

—Wachalal, yin n-weta'am taj we are ire-le i 'atz laj sacerdóte; chi cuyu in mac. Weta'am chi u tzij i Dios cu bij chake: “Ma bij c'ax chiquij u wi u jolom a tinimit”; queje ile tz'ibtal canok —xu bij i ma Páblo chique.

<sup>6</sup> Are 'uri i ma Páblo xril u be chi 'o jujun chique i qui molom quib je re i partido “Saducéo” qui bi; xak 'o i je re i partido “Fariséo” qui bi. Rumal 'uri, chu 'onquil, co xu bij chique:

—Wachalal, yin in aj Fariséo; xak in chuch in kajaw je aj Fariséo. In sic'tal chuwach i 'atbal tzij-i xa rumal cul in c'ux che, chi ca c'un chic sak chiquiwach i camnak. (Queje ile xu bij i ma Páblo chique.)

<sup>7</sup> Are xu bij ire ile, i je aj Fariséo, xak i je aj Saducéo, xe oc chu chapic quib chi tzij. Y xe'elok, n-junam ta chic qui wach. <sup>8</sup> Xqui chap quib chi tzij man i aj Saducéo qui qui bij chi n-ca c'un ta chic sak chiquiwach i camnak. Xak qui qui bij chi n-ta ángel, n-ta tewal, n-ta anma. Xui-ri, i aj Fariséo qui qui cojo chi ronojel ile, 'olic. <sup>9</sup> Conojel 'is que siq'uinic. Are 'uri xe taq'ui 'an jujun aj tijonel re i ujer 'atbal tzij chi je re i partido Fariséo. Cacaj qui qui ya qui wach ru' i ma Páblo, rumal-i xqui bij:

—I achi-ri n-ta jun u mac u 'anom. Y n-xui ta la ile, mokxa 'ijlam rumal jun ángel, o pent jun chic

aj takon re i Dios chi n-ca 'iltaj tu wach. Y we katzij ile, maka 'an ch'o'oj 'uri chirij i Dios —xqui bij.

<sup>10</sup> Lic que ch'okow chi tzij. I capitan xu xij rib chique, mokxa quiqui 'an ch'akatak che i ma Páblo, xu ch'ob ire. Rumal 'uri xu tak qui siq'uixic jujun soldádo, caquesbej re i ma Páblo chiquixol i winak, y xu tak chic u ya'ic pa cuartel.

<sup>11</sup> I ma Páblo, are 'o tan chic pa cuartel, i Kajwal xu c'ut rib che cha'ab, y xu bij che:

—Cha cowij a c'ux, a-Páblo, man pacha in lapis a 'anom chi, pa Jerusalen, xak queje in lapis ile ca 'an na pa Róma —xu bij che.

*Quiqui ch'obo wach u camsaxic i ma Páblo quiqui 'ano*

<sup>12</sup> Chucab 'ij, 'o jujun aj Israel winak xqui yijba chiquiwach chi quiqui camsaj i ma Páblo. Xqui bij chuwatch i Dios chi n-qui qui tij ti qui wa, xak n-qui qui tu' ti qui ya' c'a qui qui camsaj na. <sup>13</sup> Je mas che i cuarénta achiab chi xqui ch'ob u 'anic ile. <sup>14</sup> Xe 'e 'uri cu' i caj'atzil i sacerdóte, cu' i nimak tak aj Israel, y xqui bij:

—Yoj ka bim chuwatch i Dios chi n-caka tij ti ka wa, n-caka tu' ti ka ya', c'a caka camsaj ni ma Páblo. Ka bim che i Dios chi choj u c'okoj we n-caka 'an taj. <sup>15</sup> Are i cakaj yoj, are iri: yix, junam cu' iwachi'il aj nuc'bal t'isbal, chi tz'onoj che i capitan chi chwek cu c'am li ma Páblo chiwach yix. Chi bij che chi quiwaj quix taq'ui pa rakan coq'uilal we kas 'o u mac. Y yoj caka yijba kib chu camsaxic are quelsax lok. (Queje ile xqui bij chique i nimak tak mam'ib.)

**16** Xui-ri i rica' i ma Páblo xu ta rason wach que tijin chu 'onquil. Xa 'e 'uri pa cuartel chu bixquil che i ma Páblo. **17** Ire, are xu ta, xu siq'uij jun chique i caj'atzil i soldádo. Xu bij che:

—Cha c'ama bi i ala-ri chuwach i capitán, man 'o craj cu bij che —xu bij.

**18** I caj'atzil i soldádo xu c'am bi chuwach i capitán y xu bij che:

—I ma Páblo chi tz'apilic xin u siq'uij y xu bij chwe chi quin c'am li ala-ri awu', man 'o craj cu bij chawe —co'ono.

**19** I capitán xu chap bi che u 'ab i ala, y xu c'am bi ru' utuquel; xu tz'onoj che:

—¿Wach cawaj ca bij chwe? —co'ono.

**20** Are 'uri i ala xu bij:

—I aj Israel winak qui yibam chiquiwach chi qui qui tz'onoj pawor chawe, chi chwek ca c'am bi ma Páblo chiquiwach i nuc'bal t'isbal. Qui qui bij na chawe chi cacaj que taq'ui mas pa rakan we kas 'o u mac. Ile n-katzij taj. **21** Ma coj chique, man je mas che cuarénta achiaj qui yom qui wach cu' chi qui qui camsaj i ma Páblo. Are cawesaj bi ire, cacuwaj quib chu roy'exic. Qui bim chi n-qui qui tij ti qui wa, xak ni qui ya', c'a qui qui 'an ni ile. Qui bim chi che c'okox rumal i Dios we n-qui qui 'an taj. Y je yij chic chu 'onquil ile, xui chic coy'em a tzij yet. (Queje ile xu bij i ala che.)

**22** Are 'uri i capitán xu 'ijla bi i ala. Xu bij che chi lic mu lapo wach i xol u bij che.

*Qui qui tak bi ma Páblo chuwach i gobernador,  
ma Félix*

<sup>23</sup> Te'uri i capitán xe u siq'uij queb caj'atzil u soldádo y xu bij chique chi que qui yijba u q'ual soldádo, c'ambal bi re i ma Páblo pa tinimit Cesaréa. Xu bij chique chi que qui yijba queb ciénto soldádo que 'e che akan; xak seténta chi que 'e rij caway, xak queb ciénto chic je aj c'akol lánza. Xu bij chique chi que 'el bi cha'ab, a las nuéve. <sup>24</sup> Xak xu tak qui yijbaxic i caway, c'ambal bi re i ma Páblo. Lic xu ya chiquikul u chajixic i ma Páblo, man n-ta xak cu riko, y quiqui jach che i gobernador ma Félix, lic n-ta c'ax che. <sup>25</sup> I capitán xak xu tz'ibaj bi jun wuj che i gobernador; i wuj-le, queje iri tz'ibtal bi chuwach:

<sup>26</sup> —Yin in ma Cláudio Lísias chi quin tz'ibaj bi i wuj-i chawe yet, at nim laj gobernador, ma Félix. Quin ya rutzil a wach. <sup>27</sup> I aj Israel winak waral pa Jerusalen xqui chap i achi-ri y cacaj te'ek quiqui camsaj. Xui-ri, are xin ta yin chi ire aj Róma winak, xe in c'am bi in soldádo y xwesaj piqui'ab. <sup>28</sup> Xwaj retamaxic wach u mac qui cojom, rumal-i xin c'am bi chiquiwach i nuc'bal t'isbal que i aj Israel winak. <sup>29</sup> We' xin ta u be chi xa quiqui coj u mac chi ire u kelom i qui 'atbal tzij ique. Xui-ri, n-ta rumal we ca camsaxic, xak mi ne we ca tz'apix pa cárcel. <sup>30</sup> Te'uri xin ta rason chi i aj Israel qui ch'obom u camsaxic, rumal-i quin tak bi awu' yet. Xak in bim chique i que cojow u mac, chiqui yijba chawach yet. Xui ile in tzij chawe; chawila awib. (Queje i wuj ile xu tz'ibaj bi i capitán che i gobernador.)

<sup>31</sup> Te'uri i soldádo xqui yijba quib chu 'onquil pacha i xbix chique. Xquesaj li ma Páblo y xqui c'am bi cha'ab, c'a pa tinimit Antípatris. <sup>32</sup> Chucab 'ij, i soldádo chi je 'enak che akan xe tzalij chal pa

cuartel. I je 'o rij caway xqui maj chubi qui be ru' i ma Páblo. <sup>33</sup> Are xe upon pa tinimit Cesaréa, xqui ya i wuj che i gobernador, xak xqui jach can i ma Páblo che. <sup>34</sup> I gobernador, are xrajlaj u wach i wuj, xu tz'onoj che i ma Páblo aj ipa ire. Are xu ta chi aj pa tinimit Cilicia, <sup>35</sup> xu bij che:

—Te cat in siq'uij we xe c'un i que cojow a mac  
—xu bij.

Te'uri xu tak u ya'ic i ma Páblo pa nim laj rachoch i 'etz ma Heródes, y xu bij chi ca chajix cumal i soldádo.

## 24

*Iutzij i ma Páblo, tobalribchuwach i gobernador*

<sup>1</sup> Jo'ob 'ij u 'onquil ile, i 'atz laj sacerdóte, ma Ananías, xupon pa Cesaréa junam cu' juban qui wi qui jolom i aj Israel. Xak xa 'e jun licenciádo cu', ma Tértulo u bi. Ique xe upon chuwatch i gobernador, cojbal u mac i ma Páblo. <sup>2</sup> Are xqui c'am li ma Páblo chiquiwach, i ma Tértulo xu jek u cojic u mac. Xu bij che i ma Félix:

—Nim laj winak mam gobernador, c'amori che, awumal yet lic chom oj 'olic, yoj chi oj re i jyubi, n-ta jun c'ax chikij. Rumal i nim laj a no'oj, 'utz i 'atbal tzij cat tijin chu 'onquil pakawi, y wo'or mas 'utz caka na che i ka c'aslemal chuwatch i ujer.

<sup>3</sup> Queje ile que'el chake xa ipa oj 'o wi, y lic caka tioxij chawé ronojel ka c'ux, at nim laj winak mam Félix. <sup>4</sup> Keta'am chi lic latz' a wach, n-cakaj ta cat ka bay mas. Xui caka tz'onoj chawé, cha 'ana i pawor choj a ta na jubi'. <sup>5</sup> I achi-le lic n'-us ta laj winak; kilom chi cu yoj qui nojbal i winak xa ipa

ca 'e wi pa tak tinimit ronojel u wach i jyub ta'aj, cu petsaj ch'o'oj chiquixol i aj Israel winak y que'elok quiqui jach qui wach rumal. Ire xak aj c'amol u tzam chique i jutzobaj winak "aj Nazaren" ca bix chique. <sup>6</sup> Xak xraj te cu kajsaj u 'ij i rachoch i Dios; xui-ri xka chapo, xkaj te'ek caka 'an 'atbal tzij puwi pacha cu bij i ka 'atbal tzij yoj. <sup>7</sup> Xui-ri, i ma Lísiás, chi capitán, xu min rib cu' u q'uial soldádo y xu maj pa ka 'ab. <sup>8</sup> Te'uri xu bij chi je pachin que cojow u mac, 'o u chac que c'un awu'. Yet mismo, we ca tz'onoj che i aj mac-le, cawetamaj na wach usuc' u mac coj tijin chu cojic. (Que ile xu bij i ma Tértulo che i gobernador.)

<sup>9</sup> Xak i aj Israel chi je c'un-nak ru', quiqui min quib chi ch'a'atic. Quiqui bij chi lic sak laj tzij ile. <sup>10</sup> Are 'uri i gobernador xu c'ut ru' u 'ab che i ma Pablo chi ca ch'awic. I ma Pablo xu bij:

—Lic cul in c'ux quin bij in tzij chawach, tobal wib, man weta'am chi q'uial chic junab 'o chawe chi ca 'at tzij pakawi yoj, oj aj Israel re i jyub-i. <sup>11</sup> Yin, c'a te cablajuj 'ij iri wuponic pa Jerusalen chu cojic u 'ij i Dios. We cawaj cat tiqui chi tac'alem pa rakan chi sak laj tzij i quin bij. <sup>12</sup> Ni'pa i que cojow in mac, quiqui bij chi are xin uponic, xin quilo coj tijin chu chapic kib chi tzij cu' juban chic winak pa rachoch i Dios, xak quin tijin chi qui ch'ujersaxic. Xui-ri, n-katzij ti ile. N-ta xak in 'anom pacha ile, mi ne pa rachoch i Dios, mi ne pa tak molbal'ib que i aj Israel, xak mi ne pa tak be re i tinimit. <sup>13</sup> Ni'pa i que cojow in mac-i, n-que tiqui ta chu 'alijinsaxic we katzij in 'anom pacha quiqui bij. <sup>14</sup> Xui-ri, 'o i in 'anom, chi n-cacaj ti ique, are

iri: are quin coj u 'ij i Dios, chi xak i Dios que i katit ka mam, quin 'ano pacha cu bij i c'ac' c'utunic, y n'-us ti c'utunic-le, quiqui bij ique. Xui-ri, tupu quin coj i tzij-le, xak quin cojo ronojel ni'pa i tz'ibtal can rumal i mam Moises, xak cumal i ujer ajbil u tzij i Dios. <sup>15</sup> Xak cul in c'ux che, chi que walij chic i camnak, ni'pa i je 'utz, xak ni'pa i ne te 'utz. Queje ile quin coj yin, xak queje ile quiqui coj i je aj cojol in mac. <sup>16</sup> Rumal ile chi lic quin cojo, 'ax in 'anom wi pen u 'onquil wach u bim i Dios, man n-ta cu bij in c'ux chuwach ire, mi xak chiquiwach i winak.

<sup>17</sup> Q'ual junab n-in ta pa Jerusalen; te'uri xin tzalij lok, wuc'am li jubi' mer tobol que i niba'ib je wach aj Israel. Xak col in ya in sipon chuwach i Dios. <sup>18</sup> Nabe xin 'an i rawasil pacha caka 'an yoj oj aj Israel winak, 'anbal ch'am che kib chuwach i Dios, te'uri xin 'e pa rachoch i Dios chu sujuxic in sipon chuwach i Dios. Are quin tjin ile chu 'onquil, xin 'iltaj cumal jujun aj Israel je petnak Asia. N-ta u q'ual winak wu' pacha quiqui bij i aj cojol in mac-i, y n-ta xak winak quin tjin chi qui ch'ujersaxic. <sup>19</sup> I xe in 'ilaw chila, je are ique 'o u chac que c'un chi chawach, cojbal re in mac, we kas 'o in mac cacaj quiqui cojo. <sup>20</sup> Y we ique n-cacaj taj, ni'pa i je 'o chi, chiqui bij 'uri wach in mac xqui riko are in 'o wi chiquiwach i qui nuc'bal t'isbal. <sup>21</sup> Xui in mac-i xin 'an chiquiwach, co xin bij i tzij-i chique: "Wo'or quix tjin chu 'onquil 'atbal tzij chwij xa rumal quin cojo chi ca c'un chic sak chiquiwach i camnak," xin bij chiquiwach. (Queje u tzij i ma Páblo ile chuwach i gobernador, tobol rib xu 'ano.)

<sup>22</sup> I gobernador, ma Félis, reta'am usuc' i c'utunic

chirij i Jesucristo. Are xu ta i u tzij i ma Pablo, xu ch'obo chi n-co'on ta tan i 'atbal tzij. Xu bij chique:

—Are ca c'un i capitan, ma Lisiás, te'uri quin q'uis u 'onquil i 'atbal tzij —xu bij chique.

<sup>23</sup> Are 'uri xu tak chic u tz'apixic i ma Pablo, xui-ri xu bij che i caj'atzil i soldádo chi 'utz rilic chiqui 'ana man n-ta uyej cu tijo. Xak xu bij che chi miqui 'atij i pachin cacaj quiqui sipaj wach i rajwaxic che, i pachin cacaj quiqui solij.

<sup>24</sup> Che chic queb oxib 'ij, xe c'un chic i ma Félix ru' i rixokil, ati Drusila, chi aj Israel ixok. Xu tak u siq'uixic i ma Pablo man craj cu ta wach usuc' i cojonic che i Jesucristo. <sup>25</sup> I ma Pablo, are xuponic, xoc chu c'utic che; xu bij che chi pachin craj ca terej chirij i Cristo, 'o u chac chu suc'ba u c'aslemal, xak 'o u chac cu jec' u rayibal chi n'-us taj. Xak xu bij che chi ca c'un ni 'ij chi Dios cu 'at na tzij piquiwi i winak, wach tak qui 'anom. I ma Félix, are xu ta ile, lic xu xij rib. Xu bij che:

—Co'on ile; 'utz cat 'ec. Te tan chic cat in siq'uij are talan in wach —xu bij.

<sup>26</sup> Xu ch'ob i gobernador mok ca sujux mer che rumal i ma Pablo lo'bal re i relbal pa cárcel. Rumali, q'ual mul xu siq'uij i ma Pablo ru'. <sup>27</sup> Queb junab queje ile xu 'an i gobernador ma Félix che i ma Pablo, te'uri xel che u patan; are 'uri xoc i ma Pórcio Féstero pu q'uxel. I ma Félix, are xelic, n-xraj taj cu petsaj i coywal i aj Israel, rumal-i, n-xro'taj tu bi i ma Pablo.

## 25

*I u tzij i ma Pablo chuwach i c'ac' gobernador*

<sup>1</sup> I c'ac' gobernador, ma Pórcio Fésto, xoc che u patan. Che urox 'ij, xel pa Cesaréa, xa 'e Jerusalen.

<sup>2</sup> Are xupon chila, i 'atz laj sacerdóte, xak i nimak tak aj Israel xe upon ru' y xqui jek chic u cojic u mac i ma Páblo chuwach ire. <sup>3</sup> Lic xqui tz'onoj utzil chomal che; cacaj ique cu c'am li ma Páblo pa Jerusalen, man xqui ch'ob ique, we ca c'am lok, quiqui tak u camsaxic pa be. <sup>4</sup> Xui-ri, i ma Fésto xu bij chique chi ma Páblo pa Cesaréa tz'apil wi, y xak ire ya ca tzalij chic chila.

<sup>5</sup> Xu bij chique:

—Ni'pa i nimak qui patan chixol yix, chiqui yijba quib que 'e wu' pa Cesaréa. Chila 'utz quiqui tz'onoj wi 'atbal tzij chirij i achi-le, we 'o u mac — xu bij.

<sup>6</sup> I ma Fésto n-xnajtin ta pa Jerusalen, colo wa-jxakib 'ij, o lajuj 'ij, xo'on chila, te'uri xtzalij chic pa Cesaréa. Chucab 'ij xcubi che u patan, y xu tak u c'amic i ma Páblo. <sup>7</sup> Are xoc li ire chuwach i gobernador, are 'uri xe tejeb i aj Israel ru', chi je petnak Jerusalen. Xe oc chu cojic u mac; q'ui i nimak tak u mac u 'anom, xqui bij ique. Xui-ri, n-ta c'utbal-re xqui 'ano we katzij ile chi xqui bij.

<sup>8</sup> Te'uri i ma Páblo xu jek u tzij tobal rib. Xu bij:

—Yin, n-ta in mac in 'anom; n-in kelom ti ka 'atbal tzij yoj oj aj Israel, xak n-in kajsam ti u 'ij i rachochi Dios, xak n-ti in mac in 'anom chirij i nim laj ka 'atol tzij pa Róma —xu bij.

<sup>9</sup> I ma Fésto craj chi 'utz ca 'iltaj cumal i je aj Israel, rumal-i, chu 'onquil xu bij che i ma Páblo:

—¿Cawaj coj 'e Jerusalen y chila caka 'an wi i 'atbal tzij pawí? —xu bij.

<sup>10</sup> I ma Páblo xu la' u wach che.

—¿Xataba n-chuwach ti rakan u 'ab i ka 'atol tzij in 'o wi? Chuwach pues. Waral ca majaw wi ca 'ani i 'atbal tzij pinwi. N-cu maj taj quin 'e Jerusalen, man n-ta jun in mac in 'anom chique i aj Israel; aweta'am yet chi katzij ile. <sup>11</sup> We 'o jun in mac nim in 'anom chi ca majawic quin camsax rumal, quin ya wib 'uri chi camic. Xui-ri, we n-ta in mac in 'anom pacha quiqi bij ique, n-ta 'uri jun winak 'o pu'ab quin u jach piqui'ab ique. Quin tz'onoj pawor chi quin a tak bi ru' i 'atz laj ka 'atol tzij, cu 'at na tzij pinwi —xu bij.

<sup>12</sup> Are 'uri i ma Fést o xqui mol quib cu' i rakan u 'ab chu yijbaxic chiquiwach wach quiqi 'ano. Te'uri xu bij che i ma Páblo:

—A tz'onom u 'atic tzij pawi rumal i 'atz laj 'atol tzij; ru' ire 'uri cat 'e wi —xu bij.

### *I'atoltzij que i aj Israel craj cril u wach i ma Páblo*

<sup>13</sup> Xic'aw queb oxib 'ij xe upon i ma Agrípa y ati Berenice pa Cesaráea chu solixic i ma Fést o, man ire c'ac' roquic che u patan. I ma Agrípa-le are i caj'atzil i aj Israel winak. <sup>14</sup> Xqui 'an u q'ual 'ij chila, rumal-i i ma Fést o xoc chu laptic chique wach rumal tz'apil i ma Páblo. Xu bij:

—'O jun achi waral, u yom can i ma Félis pa cárcel are xa 'ec. <sup>15</sup> Yin, are jubi' woquic che in patan, xin 'e Jerusalen; are in 'o wi chila, xe upon i caj'atzil i sacerdóte wu', xak i nimak tak mam'ib que i aj Israel; xe upon chu cojic u mac i ma Páblo, y xqui tz'onoj u camsaxic chwe. <sup>16</sup> Xin bij chique chi n-cu maj taj, man n-queje ti ile cu bij i ka 'atbal tzij yoj oj aj Róm a. Jun, we cojtal u mac, 'o u chac ca ya' chiquiwach i que cojow u mac, man cu la' u

wach chique tobal rib. Queje ile cu bij i ka 'atbal tzij. <sup>17</sup> Rumal-i, n-xin baytaj ta chu ya'ic i ma Páblo chiquiwach are xe c'un pa Cesáréa. Chucab 'ij xin cubi che in patan y xin tak u c'amic i achi. <sup>18</sup> Are 'o chiquiwach, i nimak tak aj Israel xe oc chu cojic u mac, xui-ri n-are ti u mac xqui cojo pacha in ch'obom yin chi qui qui coj na. <sup>19</sup> Xui xqui chap quib chi tzij chirij i qui c'utunic wach u cojic u 'ij i Dios, xak wach tak u 'anom jun achi, ma Jesus u bi. Ire ya xcamic, xui-ri i ma Páblo cu bij chi c'aslic. <sup>20</sup> Yin n-xin rik taj wach 'atbal tzij quin 'ano pacha ile, rumal-i xin tz'onoj che i ma Páblo we craj 'enam pa Jerusalen, y ca 'an 'atbal tzij che chila, rumal u c'utunic. <sup>21</sup> Ire n-xraj taj, xa xu tz'onoj chi ca 'ani 'atbal tzij che rumal i 'atz laj ka 'atol tzij, ma Augústo. Rumal-i xin tak chic u tz'apixic, croy'ej na umpa quin tak bi ru'. (Queje ile xu bij i gobernador ma Fést.)

<sup>22</sup> Are 'uri i ma Agrípa xu bij che i ma Fést:

—Xak yin cwaj quin ta i achi-le —xu bij.

I ma Fést xu bij:

—Chwek ca ta ni u tzij —xcha.

<sup>23</sup> Chucab 'ij, i ma Agrípa, xak i ati Bereníce, xe oc pa 'o wi i ma Fést. Xe oc bi junam cu' i nimak tak caj'atzil i soldádo, xak i nimak qui patan pa tinimit. Are xe oc bic, lic chom i cocbal xqui 'ano; conojel i winak xe taq'ui'ic, lic xqui coj qui 'ij. Are 'uri i ma Fést xu tak u c'amic i ma Páblo. Xu bij che i ma Agrípa:

<sup>24</sup>—Yet, chi at 'atol tzij chique i aj Israel, xak yix chi ix nimak tak winak i molom iwib chi, ri i achi-ri 'o chiwach, chi in bim chiwe. Je q'ui i aj Israel qui qui coj u mac, n-qui qui mayij tu bixquil chi cha

camsaxok. Queje ile quiqui bij i je 'o pa Jerusalen, xak queje quiqui bij i aj waral. <sup>25</sup> Xui-ri, cwil yin n-tu mac u 'anom we ca camsaxic. Ire mísmo xu tz'onoj chi are i 'atz laj 'atol tzij ca 'anaw ni 'atbal tzij puwi, rumal-i in ch'obom quin tak bi ru'.

<sup>26</sup> Yin, 'o chinkul quin tak bi jun wuj ru', 'alijinsabal-re wach u mac, xui-ri, n-weta'am taj wach quin tz'ibaj bic, rumal-i in c'amom li chi-wach. Y yet, ma Agrípa, lic quin tz'onoj chawe chi cat taq'ui pa rakan we kas 'o u mac, y ca bij chwe wach quin tz'ibaj bic. <sup>27</sup> Cwil yin, n-cu maj taj quin tak bi jun aj prexil ru' i 'atz laj 'atol tzij we n-ta wuj quin tak bi ru', 'alijinsabal re u mac. (Queje ile xu bij i ma Fést.)

## 26

*I ma Páblo cu bij che i ma Agrípa wach ca tijin chu 'anic*

<sup>1</sup> Are 'uri, xu bij i ma Agrípa che i ma Páblo:

—'Utz cat ch'awic, tobal awib —co'ono.

I ma Páblo xu yac u 'ab, y xoc chu bixquil u tzij. Queje iri xu bij:

<sup>2</sup> —Nim laj ka 'atol tzij ma Agrípa, 'utz we yin, man xya' chwe quin bij in tzij chawach, tobal wib. 'Utz quin to wib che ronojel i quiqui bij i aj Israel winak chi quiqui coj in mac. <sup>3</sup> Quin quicotic, man yet lic aweta'am ronojel i ka costúmbre yoj, oj aj Israel winak; xak aweta'am tak i c'utunic chi caka chap kib puwi. Rumal-i, quin tz'onoj utzil chomal chawe, chin a ta ru' u nimal a c'ux.

<sup>4</sup> Conojel i aj Israel winak queta'am, wach 'ax in 'anom wi lok chiquiwach, c'a are in ala. Queta'am wach in c'aslema'l che i jyub pa in alaxnak wi, xak

wach in 'anom pa Jerusalen. <sup>5</sup> Xak queta'am chi yin, c'a in ala, xin ya li in wach cu' i aj Fariséo. We cacaj, chiqui bij ile chi katzij. Queta'am chi i je aj Fariséo lic quiqui coj u 'ij i ujer 'atbal tzij tz'ibtal can rumal i mam Moises; mi jun chic tzobajil ca 'anaw mas ile chakawach yoj, oj aj Fariséo. <sup>6</sup> Y wo'or quiqui tz'onoj 'atbal tzij chwij xa rumal cul in c'ux che, chi Dios cu 'an na pacha u bim can chique i katit ka mam. <sup>7</sup> Ni'pa i je qui muk qui xiquin i cablajuj u c'ojol i mam Israel, xak coy'em wach u sujum can i Dios; rumal-i quiqui 'an qui patan che, chi pa'ij chi cha'ab. Nim laj winak, rumal wach i quin tijin yin chu bixquil chirij ile chi u sujum i Dios, are i rumal-i i aj Israel que tijin chu cojic in mac wo'or —xu bij i ma Páblo.

<sup>8</sup> Te'uri xu bij chique conojel i je 'o chila:

—¿Xataba n-qui coj ti yix chi Dios cu c'unsaj sak chiquiwach i je camnak? ¿C'ax bawa u cojic ile?  
—xu bij.

<sup>9</sup> Te'uri xu bij:

—Xak yin ujer xin ch'obo chi ca majawic quin 'an ch'o'oj chirij i c'utunic re i Jesus aj Nazaret. <sup>10</sup> Queje ile xin 'an pa Jerusalen. I caj'atzil i sacerdóte xqui ya chwe chi que in chap i creyent y xe in tz'apij je q'ui pa cárcel. Y are quiqui bij chi que camsaxic, yin xak xin ya in wach che. <sup>11</sup> Q'ual mul xin 'an c'ax chique i creyent, 'anbal re chique chi quiqui bij na chi n-qui qui coj ta chic i Jesus. Queje xin 'an yin ile pa tak molbal'ib pa Jerusalen. Yin pacha xin ch'uher rumal i woywal chique; y xin terbej chiquij c'a pa tak tinimit naj.

*I ma Páblo cu lapo wach u jalwachixic u nojbal xu 'ano*

<sup>12</sup> Rumal-i xin maj bi in be pa tinimit Damásco chi qui tzucuxic i creyent. Wuc'am bi jun wuj yatal bi chwe cumal i caj'atzil i sacerdóte, c'utbal-re chi 'o pin'ab que in chap i creyent. <sup>13</sup> Are coj tijin chi be, colo tiq'uil 'ij, xwil jun nim laj 'a' xtzak li chicaj, pacha u tzunbal i 'ij, xui-ri mas ca walch'in chuwach ile. Xrepcañ chikij chakawach cu' i wachi'il. <sup>14</sup> Are 'uri, konojel xoj tzak pulew, y yin xin ta jun ch'awbal. 'O jun xch'aw chwe pa ka ch'awbal oj aj Israel winak y xu bij chwe: "A-Sáulo, a-Sáulo, ¿wuchac ca 'an ch'o'oj chwij? Che awib yet ca 'an wi i c'ax, pacha cu 'an i boyex are cu coj akan, xa che u tzam i puyu cu coj wi. Xa queje ile cat tijin yet chu 'onquil che awib," xin utxic. <sup>15</sup> Te'uri xin bij, "¿At pachin yet, Nim laj Winak?" xin cha. I Kajwal xu bij, "Yin in Jesus chi cat tijin chi ch'o'oj chwij. <sup>16</sup> Xui-ri, chat walijok y chat tac'alok; in c'utum wib chawe man quin 'an chawe at ajchac chwij. Ca lap na chique i winak wach awilom chwe yin wo'or, xak wach quin c'ut na chawe co'on panok. <sup>17</sup> Cat in to na chiquiwach i aj Israel winak, xak cat in to na chiquiwach i ne te aj Israel, chi wo'or cat in tak bi cu'. <sup>18</sup> Cat in tak bi cu' i je tz'apim qui ba'wach man que a tzunsaj na y n-que bin ta chic pa 'ekumal, xui-ri que bin chi sak. Cat in tak bi cu' i je 'o pu'ab i itzel, man que a 'atsaj pu'ab i Dios. Cat in tak bi cu' i je sachnak, man qui qui cuba ni qui c'ux chwe yin, qui qui rikbej re u cuybal qui mac, xak i cocbal cu' i je re chic i Dios." Queje ile xu bij i ch'awbal chwe.

*I ma Páblo n-xu kel taj wach i xbix che rumal i Kajwal*

**19** Rumal-i, nim laj winak ma Agrípa, yin n-in kelom ti ch'awbal\* chi xin ta chicaj. **20** Are i xin 'ano, nabe xin paxsaj u tzij i Kajwal pa tinimit Damásco, te'uri xin 'ax pa Jerusalen chu bixquil, te'uri queje ile xin 'ano ronojel i jyub Judéa, xak xin 'e cu'i ne te aj Israel. Xin bij chique chi'o u chac quiqui jalwachij qui c'aslemal, y quiqui jach quib pu'ab i Dios; te'uri, wach tak quiqui 'ano, chom, quiquilbej re i winak chi qui jalwachim chic qui c'aslemal. **21** Xa rumal ile, i caj'atzil i aj Israel xin qui chap pa rachoch i Dios, xin qui tz'apij, y xqui tzucuj wach in camsaxic quiqui 'ano. **22** Xui-ri, i Dios in u tom y c'a are in 'o wi wo'or, jiquil in c'ux che i Kajwal. Quin lap i Kajwal chique conojel, chi nimak chi ch'utik. Are i quin tijin chu bixquil chique, are xak jun ru' pacha i xqui bij i ajbil u tzij i Dios ujer, xak i xu bij i mam Moises chi ca 'ani na. **23** Xqui bij chi i Tolke ca camsax na, te'uri ca c'un chic sak chuwach; xqui bij chi are ire chi nabe ca c'unsax ni sak chuwach rumal i Dios, te'uri cu paxsaj ni u tzijol i elbal chi sak chake yoj oj aj Israel, xak chique i ne te aj Israel —xu bij i ma Páblo.

**24** I gobernador, ma Féstio, are xu ta ile chi xu bij i ma Páblo tobal rib, ire co xu bij:

—¡A-Páblo, xa at ch'uj! Mas a nawsam awib, y xa at ch'ujernak rumal —xu bij.

**25** I ma Páblo xu bij che:

---

\* **26:19:** I mer tzij xu bij are iri: wach i xwil pin wach.

—N-in ta ch'uj, nim laj winak ma Féstó. Ni'pa i quin bij-i 'is pusuc', 'is sak laj tzij. <sup>26</sup> Chi 'o wi i nim laj 'atol tzij ma Agrípa, ire xak reta'am ni'pa iri chi xin bij; rumal-i 'o u cowil in c'ux chu bixquil. Yin weta'am chi ire u tom chic ni'pa iri chi quin tijin chu bixquil re i Jesucristo, man ni'pa tak ile n'-antal ta ali'al —xu bij.

<sup>27</sup> Te'uri xu bij che i 'atol tzij, ma Agrípa:

—Nim laj winak, ¿ca coj yet wach i xqui bij i ajbil u tzij i Dios ujer? Yin weta'am chi ca cojo —xu bij.

<sup>28</sup> I ma Agrípa xu bij che:

—Laj xa 'an chwe quin 'an creyent che wib —co'ono.

<sup>29</sup> I ma Páblo xu bij che:

—N-ta co'ono we xa jubi' chic craj, o c'o mas craj, quin tz'onoj che i Dios chi ca 'an creyent che awib; y n-xui ta chawe yet, xak chique conojel i je 'o waral. Cwaj yin we ta conojel ni'pa i que taw in tzij wo'or quiqui 'an che quib queje pa ha yin, xui o'onom-i, n-ta carena che qui 'ab —xu bij.

<sup>30</sup> Te'uri i 'atol tzij, ma Agrípa, xwalij 'anok, xak i gobernador, xak i ati Berenice; xak i ni'pa i je 'o cu', xe walijic. <sup>31</sup> Are xe el bic, xqui bij chiquiwach:

—I achi-le n-tu mac u 'anom we ca camsaxic, mi ne cu maj che chi tz'apilic —xe cha.

<sup>32</sup> I ma Agrípa xu bij che i ma Féstó:

—I achi-le, cu majo we ta ca o'tax bic, ma ta xu tz'onoj u 'enam chuwach i 'atz laj 'atol tzij pa Róma —xu bij.

<sup>1</sup> Xo'on panok, are xnuc'tajic chi quiqui tak bi i ma Páblo pa Róma (chi u cwenta i jyub Itália), xqui yijba i ka 'enam pa bárco. Xqui jach i ma Páblo, junam cu' juban chic aj prexil, pu'ab jun capitan, ma Júlio u bi. Ire caj'atzil jutzobaj soldádo chi "re i 'atz laj 'atol tzij" ca bix chique. <sup>2</sup> Xoj 'e che jun tinimit chu chi' i mar, u bi Adramítio. Are xoj uponic, 'o jun bárco ya quel bic, 'enam-re che jujun tinimit pa jyub Asia. Xoj 'an bi chupam, y xoj 'ec. Xak 'o i kachalal, ma Aristárco ku' chi aj Tesalónica, u cwenta i jyub Macedonia. <sup>3</sup> Chucab 'ij, xoj upon pa tinimit Sidon, chi 'o chu chi' i ya. I capitan, ma Júlio, lic 'utz che i ma Páblo; xu ya che chi que 'e u solij i reta'am qui wach, man quiqui ya che, wach i rajwaxic che. <sup>4</sup> Te'uri xoj 'an chic pa bárco, y xoj el pa Sidon. N-xoj 'e ta suc'ulic rumal jun nim laj tew xpe chakawach; are u 'onquil xoj ic'aw chirij i jyub Chípre, chi setel chuwi mar pa ka moxim. <sup>5</sup> Xoj bin chuwi mar chuwach i jyub Cilicia, xak chuwach i jyub Panfília, y xoj upon pa tinimit Míra, u cwenta i jyub Lícia.

<sup>6</sup> Chila, i capitan que i soldádo xu rik jun bárco aj pa tinimit Alejandría, 'enam-re pa jyub Itália. Xu bij chake chi coj 'an bi chupam, caka majbej tan chic re i ka be. <sup>7</sup> Q'ual 'ij coq'uil xoj binic: c'ax kuponic chuwach i tinimit Nído. I tew c'a ca tijin chakawach, rumal-i xka 'at ka be, y xoj ic'aw chuwach i tinimit Salmon. Te'uri xoj ic'aw chu c'ulel i jyub Créta, chi setel chuwi mar. <sup>8</sup> C'ax ka binic xka 'an chu c'ulel i jyub-le, c'a xoj upon che jun ral tinimit, Buénos Puertos u bi, chu nakaj che i tinimit Laséa.

<sup>9</sup> Q'ual 'ij ic'awnak chic che i ka be, y c'ax chic

coj bin chuwi mar man ya xpe i 'alaj. Rumal-i i ma Páblo xu ya qui no'oj; xu bij chique:

<sup>10</sup>—Achiab, cwil yin che i ka 'enam-i, lic xibin'ib ru'; o chuwatch caka sach ni ekan, xak caka sach ni ka bárco, xak 'o ne chuwatch coj cam yoj —xu bij.

<sup>11</sup> Xui-ri i capitán que i soldado n-xu coj ta retalió che wach xu bij i ma Páblo; xa are xu coj retalió che wach xu bij i rajaw i bárco, xak wach xu bij i ca uc'aw i bárco. <sup>12</sup> I ral tinimit chu chi' i mar, pa i oj 'o wi, n-kas ta 'utz we cakoy'ej chila c'a quic'aw ni 'alaj. Rumal-i, laj conojoel xqui ch'obo chi 'utz coj el chila, caka maj chubi i ka be. Cacaj ique coj upon pa tinimit Fenice, we coj tiqui che. I Fenice-le, jun tinimit re i jyub Créta, 'o chu chi' i mar; o queb ocbal bic che, jun pa noroéste, y jun chic pa suroéste. Cacaj ique chila coj canaj wi, c'a quic'aw ni 'alaj.

### *Xqui tij uyej pa tew jab chuwi mar*

<sup>13</sup> Xu jek walijic i tew coq'uil pa sur, rumal-i xqui jek u 'anic pacha i xqui ch'obo. Are u 'onquil xqui maj bi qui be, xe bin chuwi mar chu chi' i jyub Créta. <sup>14</sup> Xa jubi' ka binic, xpe jun nim laj tew, xjekan li pa wikabim jubi' re i relbal li 'ij; lic tij u cho'ab chirij i bárco. <sup>15</sup> Lic xu charej bic. N-xojo tiqui ta chu binsaxic i bárco suc'ulic, rumal-i xka ya che, xoj c'am bi rumal i tew. <sup>16</sup> Xoj ic'aw chirij jun ral jyub setel chuwi mar, u bi Cláuda; chila, n-kas ta nim u cho'ab i tew. 'O jun canuw chi ca charex li chirij i bárco; xak pa chalo xoj tiqui chu jeq'uic ku'. <sup>17</sup> Te'uri xka yaco y xka 'ansaj chupam i bárco; te'uri, ru' juban laso, nimak u pam, xqui batz'catij chirij i bárco man n-ca pax ta rumal i tew.

Xqui xij quib che, mokxa i tew cu min bi i bárco pa seneb chu chi' i mar chila che i lugar "Sírte" ca bix che. Rumal 'uri xqui kajsaj i nimak tak c'ul\* riptal puwi i bárco. Te'uri xqui ya che i tew pa xraj xe u c'am wi bic. <sup>18</sup> Chucab 'ij, c'a nim u cho'ab i tew; rumal-i xqui jek u c'akic bi i ekan chuwi ya, 'obsabal re i ralil i bárco. <sup>19</sup> Churox 'ij, ique mismo xqui jek u toric u pam i bárco, y xqui c'ak bi chuwi ya. <sup>20</sup> Q'ual 'ij, n-xa 'iltaj tu wach i 'ij, xak mi ne i ch'umil. I tew, lic nim u cho'ab. Xe'elok, xka sach u cubibal ka c'ux chi coj totajic. <sup>21</sup> Xak n-ta chic wa caka tijo, rumal-i, i ma Páblo xtaq'ui 'an chakaxol y xu bij:

—Achiab, we tene xi 'ano pacha i xin bij, ma ta xoj el li pa jyub Créta, n-queje tene caka tij i c'ax-i, xak i uyej-i. <sup>22</sup> Xui-ri, chi cowij i c'ux; mi jun chiwe ca camic, xui i bárco ca sach u wach. <sup>23</sup> Cha'ab, i Dios xu tak li jun ángel wu'; are i Dios-le chi in 'o pu'ab, xak quin 'an u chac. <sup>24</sup> I ángel xu bij chwe: "Ma xij awib, a-Páblo, man 'o u chac cat 'e c'a Róma; cat upon chuwach i 'atz laj 'atol tzij chila. I Dios, awumal yet, que u to ni ni'pa i je 'o awu' pa bárco." Queje ile xu bij i ángel chwe. <sup>25</sup> Rumal-i achiab, chi cowij i c'ux man cul in c'ux che i Dios chi cu 'an na pacha i bital chwe. <sup>26</sup> Xui-ri, i ka bárco que u mina rib pa seneb chu chi' jun ral jyub setel chuwi ya. (Queje ile xu bij i ma Páblo chique i rachi'il.)

<sup>27</sup> Xic'aw queb seman chi xka ch'ij i c'ax chuwi ya. Oj 'o chic pa mar, Adriático† u bi, y xa coj

---

\* <sup>27:17:</sup> I nimak tak c'ul-le (vélas ca bix che) ximtal puwi i bárco. Jun bárco ca binsax chuwi ya rumal i tew are cu ya u cho'ab chuwach i c'ul-le. † <sup>27:27:</sup> I mar-le, xak Mediterráneo u bi.

retz'bej i tew. Colo tiq'uil a'ab, i que uc'aw i bárco xqui nabej chi ya coj upon chu chi' jun jyub. <sup>28</sup> Rumal-i, xqui paj u pam i ya; are xqui pajo, xe'el treintiséis métros che u choyil i ya. Jubi' chupanok, xqui paj chic u pam i ya; xe'elok xa veintisiéte métros chic u choyil. <sup>29</sup> Quiqui xij quib, mokxa que qui mina quib chuwatch abaj, rumal-i xquesaj li cajib nimak ch'ich' xoc u tzam, xak 'o laso che u 'ab. Xqui c'ak pa mar, tac'bal re i bárco pa ya; 'utz n-ca bin ta chic. Lic qui xim quib, xqui tz'onoj che i Dios chi we' ca sakiric. <sup>30</sup> Xui-ri, i que uc'aw i bárco xqui ch'obo que 'anmajic. Xqui jek u kajsaxic i canuw chuwi ya. Xqui 'an pacha quiqui c'ak chubi juban chic ch'ich' pa ya chu tzam i bárco; xui-ri, xa chu 'onquil quiqui 'ano. <sup>31</sup> I ma Páblo xu nabej wach que tijin chu 'anic, y xu bij che i capitán, xak chique i u soldádo:

—I achiab-le, we n-que canaj ta pa bárco, n-quix totaj ta 'uri yix —xu bij.

<sup>32</sup> Te'uri i soldádo xqui ca'ij i laso re i canuw y xtzak bi pa ya. (Queje ile, n-xe 'anmaj ta chic i que uc'aw i bárco.)

<sup>33</sup> Are ya ca sakiric, i ma Páblo xu bij chique chi quiqui tij qui wa. Xu bij:

—Yix, ya co'on queb seman chi n-ta wa qui tijo, xak n-ix warnak taj. <sup>34</sup> Lic quin tz'onoj pawor chiwe, chi tija i wa; ile 'o u chac we quiwaj quix c'as'ic. Mi jun chiwe ca sachic, mi tene jun i wi che i jolom —xu bij chique.

<sup>35</sup> Are xu bij ile, i ma Páblo xu chap jun caxlanwa, y xu tioxij che i Dios chiquiwach conojel. Xu piro, y xu jek u tijawic. <sup>36</sup> Te'uri, conojel xpe u cowil qui

c'ux, y xak xe oc chu tijawic. <sup>37</sup> Ni'pa i oj'o pa bárco, oj dosciéntos seténta y séis. <sup>38</sup> Conojel xqui tijo ni'pa i rajwaxic chique; are xquelej, xqui c'ak bi i trigo pa ya, 'obsabal re i ralil i bárco.

*I bárco xpax rumal i tew y xsach u wach*

<sup>39</sup> Are xsakiric, i que uc'aw i bárco xquil pan jun jyub, xui-ri n-xquetamaj taj pa i je 'o wi. Xquilo chi 'o jun rochal ya chu chi', y xqui ch'obo quiqui min i bárco chila we que tiqui che. <sup>40</sup> Rumal-i, xqui ca'ij i laso re i ch'ich' chi xoc u tzam, yukbal re i bárco; xak xqui tor i laso ximbal re i tz'alam pa tak u tzal. (I u chac i tz'alam-le, c'ambal re u wach i bárco.) Xak xqui yac 'an i c'ul chicaj, c'ambal bi u wach i bárco rumal i tew. Are 'uri, i bárco xu jek tejeb bic chu chi' i ulew, <sup>41</sup> xui-ri 'o juban seneb t'ubul chuxe' i ya, c'amtal li rumal queb u be ya. Are xupon i bárco pa 'o wi i seneb-le, xch'api u tzam chupam, lic n-cu yin ta chic rib; i chirij i bárco, xu ticba paxic rumal u wi i ya chi xu ya u cho'ab chuwach. <sup>42</sup> I soldádo xqui ch'ob qui camsaxic i aj prexil, man mokxa 'o i que muxic y que 'anmaj bic, quiqui ch'ob ique. <sup>43</sup> I capitán que i soldádo n-xu ya ta chique quiqui 'an ile, man xril tobal u wach i ma Páblo. Xu bij ire chi ni'pa i queta'am que muxinic, chi qui c'aka bi quib chuwi ya, 'axbal-que chuwach ulew. <sup>44</sup> Xak xu bij chi ni'pa i n-queta'am ti mux, chiqui chapa juban tak tz'alam, o xak ch'aka tak che' re i bárco, y che 'ax puwi. Queje ile xka 'ano, y konojel xoj totajic; xka rik i ulew n-ta c'ax chake.

## 28

*Wach xu 'an i ma Páblo are 'o pa jyub Málta*

<sup>1</sup> Are oj totajnak chic konojel, xketamaj u bi i jyub pa oj 'o wi, Málta u bi. <sup>2</sup> I winak chi je aj chila, lic 'utz kilic xqui 'ano; xqui nuc' jun nim laj 'a', man ca tijin i jab, y lic joron tew. Xoj qui siq'uij cu' chi 'a', mi'sabal kib. <sup>3</sup> I ma Páblo xu mol jubi' si' chakij; are ca tijin chu cojic pa 'a', xak te'et xel li jun cumatz rumal u c'atanal i 'a'. Xu chap u 'ab i ma Páblo. <sup>4</sup> I winak je aj chila, are xquil i cumatz tzayal che u 'ab i ma Páblo, xqui bij chiquiwach:

—I achi-le 'alaj chi aj camsanel. Tupu xtotaj pa mar, xui-ri n-ca ya' ta che ca c'as'ic. I dios chi aj 'anol suc'ulic\* n-cu ya ta che —xqui bij.

<sup>5</sup> Xui-ri i ma Páblo xu pu i cumatz che u 'ab, y xtzak pa 'a'. I ma Páblo n-ta xu riko. <sup>6</sup> Conojel 'is coy'em umpa ca sipoj 'anok, o xak ca cam 'anok. Xui-ri, naj xcoy'ej, y n-ta xu riko. Are u 'onquil xqui jalwachij qui nojbal, y xqui bij chi i ma Páblo are jun dios.

<sup>7</sup> Chu nakaj pa i oj 'o wi-le, ca canaj i rulew jun achi 'atz u patan che i jyub-le. I u bi, ma Públia. Ire xoj u c'ulaj ru', y 'utz kilic xu 'ano che oxib 'ij. <sup>8</sup> I u kajaw i ma Públia, iwab, cotz'ol chuwi u ch'at; 'o 'a' chirij, 'o quic' puj che. I ma Páblo xa 'e u solij. Are xuponic, xu tz'onoj che i Dios, te'uri xu ya u 'ab puwi, y xrutzirsaj. <sup>9</sup> Are xel rason ile, conojel i iwabib re i jyub-le, xe c'un ru' i ma Páblo y xe utzirsaxic. <sup>10</sup> Mas i utzil chomal xqui 'an chake, xak 'o i sipon xqui ya chake, tioxbal-re ni'pa i xa

\* **28:4:** I dios-le are i qui dios ique.

'ani chique. Are ya coj 'e tan chic, 'is xqui ya bi chake ni'pa i rajwaxic re i ka 'enam.

*I q'uisbal tak 'ij re ruponic i ma Páblo pa Róma*

<sup>11</sup> Xic'aw oxib ic' ka 'olem chila, te'uri xoj 'an bi che jun bárco chi xak xric'awsaj i 'alaj chila. I bárco-le petnak che i tinimit Alejandría. Chu tzam i bárco, 'antal u q'uxewwach queb tiox; i qui bi: Cástor y Pólux. <sup>12</sup> Xoj upon che i tinimit Siracúsa, 'o chu chi' i mar; chila xoj canaj wi oxib 'ij. <sup>13</sup> Te'uri xoj bin chuwi mar chu c'ulel i jyub c'a xoj upon che i tinimit Régio. Chucab 'ij xoj 'e chic y xpe jun tew pa sur, 'enam re pa ca tijin wi ka 'enam yoj, (y xoj u to che i ka be). Chucab 'ij tan chic, xoj upon pa tinimit Puteóli chu chi' i mar. <sup>14</sup> Chila xoj qui c'ulaj wi juban creyent; xqui bij chake chi coj q'uiji cu' jun seman. Je ile xka 'ano, te'uri xoj 'e pa Róma. <sup>15</sup> I creyent pa Róma queta'am chic chi coj upon yoj; rumal-i xe pe chaka c'ulaxic. Nim xqui binbej lok, c'a pa queb tinimit, Fóro de Apio u bi i jun, Tres Tabérnas u bi i jun chic. I ma Páblo, are xe rilo, lic xu tioxij che i Dios, y xq'uiji mas u cowil u c'ux. Te'uri konojel xoj 'e pa Róma. <sup>16</sup> Are xoj upon pa Róma, i capitán xe u jach i aj prexil pu'ab i caj'atzil i guárdia, xui-ri xu ya che i ma Páblo chi ca q'uiji che jun ja, xa ca chajix rumal jun soldádo.

*I ma Páblo, tupu tz'apil pa Róma, xui-ri cu c'ut u tzij i Dios*

<sup>17</sup> Xic'aw oxib 'ij che i kuponic, i ma Páblo xu tak qui siq'uixic i aj Israel nimak qui patan. Are qui molom chic quib, xu bij chique:

—Ix wachalal, yin n-ta in mac in 'anom chique i wach aj Israel, xak mi chirij i ujer c'utunic que

i katit ka mam. Tupu n-ti in mac, i nimak tak aj Israel pa Jerusalen xin qui jach piquí'ab i rakan u 'ab i 'atol tzij. <sup>18</sup> Ique, are xquelej u tz'onoxic chwe, xcaj xin co'taj man n-ta in mac xqui riko we quin camsaxic. <sup>19</sup> Xui-ri, i aj Israel n-xqui ya ta qui wach we quin o'toxic, rumal-i 'o u chac xin tz'onoj in petic waral chuwach i 'atz laj 'atol tzij; xwaj chi are ire cu 'at na tzij pinwi. Are i rumal-i xin petic, n-are ti u cojic qui mac i wach aj tinimit quin 'ano. <sup>20</sup> Rumal ni'pa ile chi xa 'anic, ix in siq'uim wu', man cwaj quix wilo y quin ch'a'at iwu'. In tz'apilic xa rumal cul in c'ux che, chi ya c'unnak chic i Tolke chi konojel yoj oj aj Israel koy'em. (Queje ile u tzij i ma Páblo chique.)

<sup>21</sup> Te'uri ique xqui bij che:

—N-ta jun wuj taktal li ku' yoj cumal i aj Judéa, cojbal re a mac; xak mi jun chique i kach aj tinimit je c'un-nak waral chu bixquil we 'o a mac. <sup>22</sup> Cakaj caka ta wach ca ch'ob yet, man keta'am chi xa ipa, i winak c'ax que ch'aw chirij i c'ac' laj c'utunic-le —xqui bij.

<sup>23</sup> Te'uri xqui ch'ic jun 'ij qui qui mol quib ru' i ma Páblo. Are xu rik i 'ij, je q'ui i winak xe moltaj ru'. Xa 'an 'ij, i ma Páblo xu jek ch'a'atic cu', y te xu mayij are xkaj i 'ij; xu bij chique wach usuc' u 'atbal tzij i Dios. Ire xu tij u 'ijol chique man qui qui ta u be chi Jesus are i Tolke. Rumal-i, xu c'unsaj chi qui c'ux wach cu bij i 'atbal tzij tz'ibtal can rumal i mam Moises, xak i tzij tz'ibtal can cumal i ujer ajbil u tzij i Dios. <sup>24</sup> 'O jujun xqui cojo wach xu bij i ma Páblo, xui-ri xak 'o i n-xqui coj taj. <sup>25</sup> Lic n-junam ti qui wach che, wach xu bij i ma Páblo,

rumal-i xqui ticba li 'elic. Are 'uri i ma Páblo xu bij chique:

—I u Tewal i Dios lic pusuc' xu bij i tzij-i chique i katit ka mam, chi tz'ibtal can rumal i mam Isaías. Xu bij:

<sup>26</sup> Jat, y cha bij i tzij-i chique i winak-i:

Yix, katzij neri, qui ta na, péro n-qui ta tu be; katzij neri, quix tzunic, péro n-ta quiwil na.

<sup>27</sup> Man i winak-i, lic n-ta cu c'ulaj i piqui c'ux, xa qui tz'apim i qui xiquin, xa qui mutz'um i qui ba'wach.

Rumal-i, n-que tzun ta ru' qui ba'wach, xak mi ne que tan ru' qui xiquin.

N-ta qui qui ta u be piqui c'ux xak n-que c'un ta wu', col qui cunbej quib.

(Queje ile u bim i Dios.)

<sup>28</sup> Chiwetamaj 'uri yix iri: i 'utz laj tzij re i 'elbal chi sak chi cu sujuy i Dios, ca sujux na wo'or chique i ne te aj Israel. Ique lic qui qui ta na —xu bij chique.

<sup>29</sup> Are xu bij ile, i aj Israel xe oc chu chadic quib chi tzij; xe walijic y xe 'ec. <sup>30</sup> I ma Páblo xq'uiji queb junab che i ja pa u tojom wi u posar. Ni'pa i que upon chu solixic, 'is que u c'ulaj ru'. <sup>31</sup> Lic xu bij chique wach usuc' i 'atbal tzij re i Dios, xak xu 'alijinsaj wach u patan i Kajwal Jesucrísto. Lic co u wach chu bixquil, xak mi jun xa 'atiw che.

**I 'utz laj tzij re i dios  
New Testament in Achi (I 'utz laj tzij re i dios)**

copyright © 2009 Wycliffe Bible Translators, Inc.

Language: Achi

Dialect: Cubulco

Translation by: Wycliffe Bible Translators, Inc.

Achi, Cubulco

Achi' is a Mayan language very closely related to K'iche' (Quiché in the older orthography). It is spoken by the Achi people, primarily in the area of Baja Verapaz in Guatemala. There are two Achi' dialects. Cubulco Achi' is spoken by approximately 48,000 people in the Cubulco area west of Rabinal area. Rabinal Achi' is spoken by approximately 37,000 people in the Rabinal area.

El Nuevo Testamento

en el idioma Achí de Cubulco de Guatemala

Ediciones anteriores

Segunda edición

©2009, Wycliffe Bible Translators

Primera edición

Publicado por

©1984, Sociedad Bíblica Internacional

**Copyright Information**

© 2009, Wycliffe Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request. If you want to revise a translation, use a translation in an adaptation, or use a translation commercially, we will consider your request.

NT:segunda edición

**The New Testament**

in Achi

© 2009, Wycliffe Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-01-05

---

PDF generated using Haiola and XeLaTeX on 11 Nov 2022 from source files dated 29 Jan 2022

9b555db1-9ba1-5605-bb0b-c5cb6002c354